

АЛИШЕР НАВОЙ

ЛАЙЛИ
ВА
МАЖНУН

ҒАФУР ФУЛОМ НОМИДАГИ
АДАБИЁТ ВА САНЪАТ
НАШРИЕТИ
ТОШКЕНТ — 1976

Насрий баённи тузувчилар
Амин Умарий ва Ҳусайназода

Тузатиш ва тўлдиришлар билан
ҳайта нашрга тайёрловчилар
Ваҳоб Раҳмонов ва Найм Норқулов

70403—187
352(06)—76 2—76

©Faфур Ғулом номидаги Адабиёт ва санъат нашриёти, 1976 й.

V

*Олдида гавҳар бир қатра сувдек туула-
диган сўз гавҳари васфида бир неча
сўз демоқ; «Беш хазина»си қошида
Қорун хазинаси вайронадек кўринади-
ган ганжа ҳакими таърифида ганж соч-
моқ; Кашмир жодулари унинг олдида
иپ эшолмайдиган ҳинд сеҳргарини
унинг гавҳари шодасига тизмоқ ва ўз
назмининг чурук ипини ва узуқ торини
ҳам уларга уламоқ*

Ҳозирги мавжуд бўлган нарсалар, олам, ҳатто борлик
ва йўқлик ҳақида тасаввур бўлмаган бир пайтда дастлабки
яратилиш шабадаси вужуд томон қўзғалди. Инсоф билан на-
зар ташлаган ҳар бир киши буни англар эди-ю, лекин сўзниг
ўзи йўқ эди.

«Кун»* амри зоҳир бўлган чоғда, «Фаяқун»** шовқими
ҳам пайдо бўлди. Демак, биринчи садо сўз экан, ҳар қандай
қўшиқнинг ҳам бошланиши сўздандир.

Эй сўз, бунчалик ажойиб гавҳарсан?! Гавҳар нимаси, мавж
урган денгизсан! У денгиз бунча дилкаш нақшларни бир тўл-
қинланиш билан ярқиратиб яратди. Ер қаъридан тортиб фа-
лак юксаклигигача бўлган нарсаларнинг жами унинг аввалги,
мавжидир.

Сени дур дейдилар. Бу — маъқул гап эмас. Сен руҳ жав-
ҳарисан, дур қуруқ сувнинг ўзи-ку. Демак, сени дурга ўхша-
тиш, худди дурни шудрингга ўхшатишдир. Айтиб совумайди-
ган қўшиқ сенсан. Сарфлайверса ҳам бўшамайдиган хазина
сенсан. Олам ҳалқи қуёш зарраларини йигиб юргани билан
қуёшнинг нури камайиб қолармиди?! Игна учи билан бир
томчидан сув олаверган билан денгиз сувини қуритиб бўлмай-
ди-ку.

У қадр ва муруватда денгиз ва фалаклардай бениҳоя,
путф ва баҳода соф гавҳардир. Қамиш қалам билан сени чиз-
ган хаттот гавҳарни қора ипакка тизди. Тил сенинг зикринг
билан юксаклик эгаси, тишлар эса унга инжу тасбехи бўлди.

* Кун — ярал.

** Фаяқун — борлик.

Ганжада маскан тутган зар сочувчи кишидан ўзга ҳеч бир киши бу тил билан мақсадига эришолмади. Унинг яширин хазинаси шараф айвон, хазиначиси эса лутф мезонидир. У маъно тангларини зарб урувчи, узлат ҳарамидаги ички розлар маҳрами. Унинг диққати калавасининг учи сертугун. Ҳар бир тугунида эса юзлаб соф дур бор. Унинг фикр хазинаси гавҳарга кон. Ундан ҳамма халқлар гавҳар теришади. Унинг кўнгил садафи гавҳар сочувчи, қамиш қалами шакар тўкувчидир. У танҳолик гавҳарини қўлига олиб, узлат камарини белига боғлаган. Маънонинг хосхонасини әгаллаган ҳам, сўз қизини турли тақинchoқларга ғарп этган ҳам у. У фазилатнинг Тур тогидаги Мусоси, қаноатнинг Қоф тогидаги Анқосидир. Агар у Мусо бўлмаса, нега унинг қалами бағрига жоду сингдирилган? Агар у Анқо бўлмаса, нега сўз Қофидা узлатга чекинишни ўзига одат қилиб олган? Назм аҳлининг энг ширин сўзи, сўз дурини тизувчи Низомийдир.

У Ганжада хазинадек яширгану, лекин беш хазинадан белги қўйиб кетган.* Унинг ҳар бир хазинасидан идрок саррофи** беҳад соф жавоҳирларни топган. Ҳар бир жавҳари мулклар хирожига тенг, шоҳлар тоҷига зеб-зийнат бергулиkdir. Бу хазина қисмлари маъно дуридан, сўз ва иборалари шу гамж тилсимидандир. Темир қўргонларни очадиган киши ҳам бу тилсимни очишига ожизлик қиласди.

Ҳиндистоннинг жоду ишида моҳири, ҳинд сеҳргари*** бу тилсимни кўриб, ўз қалами учиди саҳифага афсона ёза бошлиди ва бу саҳифа оламга ғавғо солтудек бўлиб чиқди. Унинг таҳрир этган ҳар бир шеърий саҳифаси фитнагарликда Каширнинг бир ўлкаси эди. Саҳифадаги ҳар бир нуқта бир бало, юздаги дилкаш хол эди. Ундаги ёзувлар Бобил мамлакатининг катта йўлидай, қамиш қаламининг ичи эса Бобил ҷоҳидир. Унинг сеҳрли қалами ҳийлакор ҳам истеъдоди жодули, сеҳргардир.

Сеҳргар бу мўъжизани кўргач, нима ҳам қила оларди, бу тилсим уни ожиз қилиб қўйди. Бироқ енгилганлар каби у қочишини ўзига эп кўрмай, ўша тилсим қаршисида ўз тилсимини тиклади. Беш маҳфий хазинани ўз бағрига олган тошдан яратилган қалъя рӯпарасида беш қаср тиклади. Бу қасрларнинг ҳар бири шу аср зийнати эди. Қасрларнинг ташқарисини дилкаш нақшлар билан безаб, ичларини ҳам мунаққаш этди.

* Бу ерда гап Низомийдан қолган «Хамса»—«Беш хазина» устида бормоқда.

** Сарроф — сайрафий — пул алмаштирувчи, қимматбаҳо тош ва металларни баҳоловчи заршунос.

*** Йъни, Хусрав Деҳлавий.

Мўъжиза билан сөхр орасидаги тафовут Каъба олдидағи бутчалик каттадир. Бироқ бут бўлса-да, у жонсиз эмас. Чунки уни устод бут ясовчи йўнган. У бут гулюзли паривашдир. Унинг иштиёқида юзлаб мутафаккирлар гангирағ қолишган. Унинг ишқи барчасининг бошига тушиб, ҳаммасининг қўл-оёги типирчилаб қолган. Бутнинг уларга тенг келишига гумон йўқ. Чунки у яхшидир, ёмон эмасдир.

Бу базмга Ашраф етиб, ўз насибасига эга бўлди. Менинг ҳам йўлим бу тарафга тушиб, шу азобни ўзимга лозим билдим. Бу хаёл кўнглимга келмасдан олдин жуда кўп ўйладим. Ахир Ганжада хазина яширган киши, ҳар бир хазинаси учун бир қўргон ясади. Ёки ҳинд наслидан бўлган Ҳиндистон фарзанди ҳам ўз қасрларини обод қилди. Қалъя учун шаҳар, баҳраси учун эса боғ, кўкатзорлар лозим бўлади. Қани энди менда ҳам ўшалар сарфлаган фурсатчалик вақт бўлса-ю, шаҳар ва боғ режасини чизиб чиқиб, богини гуркираган чаманзорларга айлантиrsам: шаҳрини улкан бир мамлакат ҳолига келтиrsам. Иккита аввалги достонни ёзишга киришганим ва уларни ниҳоясига етказишга бел боғлаганимда доим хаёлим шу эди. Энди эса учинчи дард достони мени ақлу ҳушимдан жудо қилди. Умидим борки, бу ва яна ёзилажак икки достон ҳам аввалгиларидан қолишмайди. Яъни Низомий ва Амир Хусравнинг «Беш хазина» ларига тенглашади. Ўйлаб кўрсам олдинги иккитасини чуқур мулоҳаза билан ёзмаганман. Мақсадимга эришаман, бундан муродимга етарман. Пирим ҳолимга лут қилган эканлар, бу мақсадим амалга ошмай қолмас.

VI

Валийлик осмонининг жаҳонга нур таратувчи юлдузи, тўғри йўл кўрсатиш конининг соғ гавҳари, шеърият авжи фалагининг ҳашамли қўёши ва маънолар жомининг тоза май ичувчи ринди, яъни мавлоно Нуриддин Абдураҳмон Жомий мадҳида нуқта сурмоқ ва унинг жомидаги дурдани симирмоқ

Сўз гулшанининг очилган атргули, илм оятини варақ-варақ кезузчи киши қадри шундай юксакликдаки: қуёш ундан қутироқда юради. Малак унинг икки ковушидан ҳал қилиб, бош оғригини қолдирадиган сандал ёғочи ўрнида ишлатади. Букулишдан ҳассаси бошида пайдо бўлган тоб, икки жаҳонни тортмоқ учун иммоқдир. Учидаги найзаси ғазабга минса, дев билан

шайтонларни кўр қилади. Тасбехига банд қилинган юз дона юз файз қушларини овлайди. Доналар белидаги торни жаҳон халқи учун маҳкам ип деб бил. Унинг ювинадиган идиши фалак денгизидир. Ундан томган ҳар қатра сув энг ноёб дур бўлади. Пошиаси теккан ер — муридлар йигиладиган давра. Бу давр аҳли учун саодат ҳалқасидир.

Унинг масжидидаги жойнамоз ва меҳроб Каъбага кирадиган эшиклардир. Меҳробининг устига оллоҳ деб ёзилган. Уйнинг эгаси ҳамиша унинг эшигига огоҳдир. Унинг боши саждага эгилганида унинг оёғи «меҳроб» сўзидағи «ҳ» сингари узалади. Балки саждага унинг жисми эгилганида «ҳ» букиклиги бирикиб кетади. У ҳар бир сажда қилганида ҳақ висолига эришади. Унинг саждасини сажда деб эмас, ҳақ висолига етмоқ деган маъқул. У фалаклар авжида юксаклик ноғорасини чалиб, фаришталарга ҳимматдан дарс беради. Лақаби ҳам жаҳонга нур таратади. Зоти билан ҳам нуран ало нурдир.* Ислим Абдураҳмон билан танилган, аммо Жомий билан шуҳрат тутгандир.

Эй, илм юзига машъал тутган, файз кўзгусига сайқал берадиган зот, дарвишлик тариқатида шундай узлатга чекиндингки, тангрининг ўзи сенга мўл-кўл файзини ато этди. Илминг денгизи тўлқинланганида еттинчи осмондан ошиб кетди. Қаламингдан маъно дурлари оқиб, нутқинг уни сўз шодасига тизди. Маъно қаламинг бағрида сайр этиб, сўнг ўша нов орқали дурга айланиб қоғозга таралади. Ўша йўлдан маъно карвони, балки маъно жаҳони келади. Хавфдан ҳадиксирамай ёппаёлғиз оламда сайёхлик қилади. У маънолар жаҳон юзинигина әмас, балки осмон кенглиги юзини ҳам тутиб кетган. Шеъриятинг наср сингари яхши; насринг эса назмдек кўнгилга тутғён соловчидир. Ушбу наср ва назм лашкари олам юзини бутунилай тутиб кетган. Ҳали «Хамса»га қўл урмай турибоқ, қаламинг сўзга киришиб кетди. Киши чуқур ўйлаб қараса, қаламингни йўниб, қатор номалар нақш этдингки, у хазиналарнинг ҳам саноғи бештадир.

«Силсила»ни яратиб, юзлаб ақлни унга шайдо қилдинг. «Туҳфа»ни ғавғо учун элга манзур этганингда, кишилар ўз жонларини унга фидо қилдилар. Қаламинг «Субҳа» талқинини тугаллаганида, фаришталар даврасида тасбех зикри бошланди. «Аҳсанул-қисас»ни ёзганинг заҳоти, қисса халқнинг суюкли асарига айланди. «Девон»ни муҳайё қилганингда,

* Шоир «Нуриддин» сўзига ишора қилиб, нур устига нур иборасини қўлламоқда.

Сурайё унинг бошига гавҳар сочди*. Шундай қилиб ғаму қийноқ тортмай уларнинг «Беш ҳазина» ларига жавобан беш ҳазина намоён этдинг.

Назминг сифати мақтодан юқори, насринг эса ундан ҳам ортиқдир. Халқ фикрий қашфиётлар ошиғи экан, улардан ҳамиша файз топади. Олам сенинг файзинг билан баҳраманддир. Мен эса олам өлининг поймолидирман.

IX

У тун дағдағаси тағрифидаки, савдои ишқ аждаҳосининг дами ўтининг тутуни ва юлдузлари оламни ўртайдиган ўша оловнинг ёлқинлари эди; шундай тунда хаёл сайёхи кўргиликлар отига миниб ҳар томон йўл олмоғи ва ишқнинг юз оғатлик даштига етмоғи; оғат ёғинларидан бало довулига қолмоғи ва бало яшинлари унинг жонига шавқ ва муҳаббат ҳароратини солмоғи; ишқ дури шамчирогини ўшқ кечака топмоқ ва у йўлчи юлдуз билан сўз майдони жавлонига чопмоқ; Лайли хаёли билан кўришмоқ ва Мажнун дардига тушмоқ

Ҳийлакор фалак ўтган кечака нур устига зулмат ёйганда, олам устидан эсаётган тун шамоли кўк бағрига қоронғулик сочар эди. Мен зим-зиёлик гумбазига қамалгач, зулмат эшикни беркитган эди. Замонни мумдай булут қоплаб, туннинг зулматига яна қоронғулик қўшилганди. Вужудим шу зулматга асири бўлиб, кўнглимга фалак зулмати қўнгган эди. Кўнгил ўйноқи хаёл отига миниб, дуч келган томонга қараб чопар эди. Тунранг хаёл оти жаҳонда кўп югурди-да, ниҳоят араб тупроғига етиб, тўхтади. Ишқнинг ҳидини сезган ҳамоно у от чопишидан ҳам қолди. Ишқ водийсига етгач, ундан нари ўтиб кетмоқ жуда мушкулдан мушкул эди. Хаёл суворийси тайсалланиб, бу ерда от ҳам оқсоқланиб қолди. Ҳаво оҳ сарсари**ни қўзгатар, булут эса тинмай ёш тўкарди. Йъни шамол янада қаттиқроқ эсар, ёмғир эса ундан ҳам даҳшатлироқ эди. Кече кўзни юмиб ёруғлик истагандай қоронғу эди.

* Бу ерда гап Жомий томонидан «Силсилатуз-заҳаб», «Субҳатул-аброр», «Гуҳфатул-аҳрор», «Юсуф ва Зулайҳо» ва «Девон» асарларининг яратилиши устида бормоқда.

** Сарсар — совуқ, кучли ва қаттиқ шамол.

Офтобдан шарқ ёришгани каби, баъзан Тур тоги устида яшин ярқиарди. Ёхуд Мусонинг орзуси билан Тур тоги устида худо жамоли жилвалангандек бўларди. У Тур тоги ва тоғ эгаси Мусо, шу ўринда нур дарёсига гарқ бўлгандек кўринар эди. Баъзан эса, бу яшин суръат билан Мадина сари борар, шуълалари билан зулмат устига нур тўкар эди. У яшин нури айрилиқда худонинг дийдорини умид қилган Хошимий авлодидан бўлган пайгамбарга ўхшар эди. Меъроҳ кечаси пайгамбар осмонга чиқиб, юзининг шуъласи билан жаҳонни ёритди. Яшиндай кўкка юксалиб, Мадинага ёлқин ташлади.

Баъзан бу яшин Қуддусни ёритиб, тун зулматига оқ нур тўкар, бу қора тутун орасида ловуллаб кўринган Халил ўтига ўхшарди. Халилнинг гулжанга тушибчи яшинга ўхшар, Намруд* юзига нурлар сепарди. Шу яшин ҳарлаҳизада Яман томондан кўриниб, ўзининг ўтлик сиртмоғини ташлар, у — Суҳайл юлдузи балқиб Яман тунини ярқиратганидек эди. Йўқ; йўқ, балки Увайс қалби ёлқини қора тунни ойдинлаштиromoқда. Гоҳ Абуқубайс тоги узра товланиб, ундан Каъба равшан бўлиб турар ёки нур ҳарамга тушиб, ундан тоғ бағридаги бинолар ҳам ярқираб кўринардилар. Айман** анори ўз шохини ёритганидек, гоҳо Изам водийсига шуъла сочарди. Салам*** ёғочларига ўрнатилган дурлардек нур билан зийнат берар, баъзан Нажд тоги устида у яшин чақнаб, у ўт осмонга нур сочар эди. Бу — қоронги ҳижрон кечасида фамгин Мажнуннинг ўтлик оҳ чекканига ўхшарди. Гоҳ муросасиз фалак, шом устида субҳ кўрсатар эди. Бу эса, Лайли карашмага майл қилиб, қора кокиллари орасидан жамолини кўрсатишига ўхшарди.

У яшин тинимсиз ҳар томонга учар, шу равшанликда Ҳай қабиласи кўринарди. Кетма-кет чақилаётган чақмоқ бир қабилани әмас, балки юзларча қабилаларни кул қилиб юборгудек. Унинг нури ҳар ёққа учиб юрганда, йиртқич ҳайвонлар ҳам кўринишиб қоларди. Йўлбарс, қоплон ва қонхўр шерлар қон тўкиш учун чанглларини ўткирлаштирап эдилар. Шу воидида танлари тупроққа айланган ошиқларнинг суяклари унда-бунда оқариб турарди. Бу суяклар чўллардаги чирик саксовулдек тўда-тўда бўлиб ётарди.

Қуёш хазинасини аждаҳолар йўқотиб, ўрнини тун аҳли қора балолари босди. Ёмғир дема, булут ёвдек эл устига ўз

* Намруд — Иброҳим (Халил) пайгамбарни ўтга ташлаган подшоҳ.

** Айман — Арабистондаги водий номи.

*** Салам — дараҳт номи.

ўқларими өғдирмоқда. Тунда булатларнинг ҳар томон қўзга-лишлари қора девларнинг наъра тортишига ўхшаб кетарди. Булатларнинг бир-бирига келиб тўқнашишлари, уларнинг гулдураш садоларидан фалак гумбази дарз кетгандек бўларди. Буни оқшом дея кўрма, балки жонга юзларча оғат келтирувчи қўрқинчли зулматdir. Югурик сайёҳ бу ҳол ҳайратидан бир қадам ҳам босолмай қолди. Унда қадам босгани мажол тугул, бунга умид ҳам йўқ эди. Юзларча оғат ичидагонини ҳовучлаган мусофири, мингларча таҳликалар туярди. Ойдинни кўрганда титилиб кетувчи қоронгиликка ўхшаб, унинг қўрқувдан мажоли қолмаган; унга на ақл йўлдош, на ҳуш. Ўзи бежон, агар жони бўлса, ҳуши йўқ. У қўрқоқ жонидан юз марта воз кечган, жаҳондан ҳам кетмоқча шай.

Оғат, балолар дастидан хаёл мусофири икки кўзини очолмай тонг отдириди. Тонг ели тун кулини супуриб, азоб булатларини ҳам ҳайдади. Хаста ва чўчиган мусофири бир лаҳза ором топиб, ўзига дерди: «Бу тунми ё бало даштинг қора куни-ми? Жаҳонда бунча ҳам баҳтсизликлар бўладими, қаерга қадам қўймайин оғат... Бу қоронги водий қандай водийки, унинг зулмати нафас йўлимни бўғаётir?»

У буни ҳали англаб етмай, ғойибдан нидо келди: «Бу ишқ даштидир; саргузашти жон оғатларидандир. Сен кўрган ҳар яшин ишқнинг ўтидир, ўша яшиннинг ҳар шуъласи ишқнинг ханжаридан чиққан учқунлардир. Зулматга чулғанган ҳар қора булат, ишқ ўтининг кўкка ўрлашган тутунидир. Баҳор томчиларини ёмғир дема, у ишқнинг ўқ өғдиришидир. Бу ишқ даштида фавго солаётган йиртқич ҳайвонлар шу даштнинг ҳар томонидаги қурт-қумурсқалардай. Бу даштга келган аждарлар қамиш ичидаги қилтириқ тола каби, ҳайбатли шерлар эса кучсиз чумолилар каби ожизланиб қолади. Бу ишқ водийсининг ғамлари қишида гаранг қилиб қўйса, ёздаги гармселлари элни илвиратиб кетади. Бу дашт тиканлари оғат алифи каби, лолаларида ишқ доғлари бор. Бунда ҳеч ким яшай олмайди, яшаш қаерда, балки ўтишга ҳам имкон тополмайди. Мозий дунё бир кишидан бошқа ҳеч кимнинг бу водийга қадам қўйганини билмайди. Унинг вужуди ғам тупроғи ва сувидан ясалган, ишқ ўти ва ели унинг манглайига ёзилгандир. Бундай кишининг қисмати доимо саргардонликда ва ғам чўлларида қуондай кеziшдан иборатдир. Унинг жисми тупроғи дард кўчасининг чанг ва ғуборларидан, суви бўлса — дард булоғидан. Жисмининг ел қисми сарсаридек оҳидан ва ўт қисми жон ўртайдиган ишқ гармселидандир.

Унинг вайрон бўлган тани ғам қушининг макони ва аламли боши ҳам қушлар уяси эди. Сочи кўргуликлар тутунига

Ўжшар, унинг ҳар толаси телбалик оғига кишан әди. Муҳаббатдаги сифати девоналик бўлгандан унинг номини жаҳонда Мажнун деб аташарди. Ушбу дашт унинг турар жойи, ўти, гулию тиканлари — унинг гулшани. У бир нодиранинг, нодира бўлганда ҳам жаҳон балосининг ишқига мубтало әди. Арабистонда ва Ажамда мислсиз бўлган бу гўзалдан Арабистон ҳам, Ажам ҳам аламда әди. Мажнун муҳаббатда ягона бўлгани сингари, ҳуснда у қиз ҳам замон офати әди.

Буларнинг дунёга машҳур бўлган афсоналарини Хусрав билан Низомийлар достон қилган, ишқдан сўз очиб, бу иккиси тўғрисида ҳикоя қилган әдилар. Шеърият осмонининг юлдузи Суҳайлий ҳам Лайли, Мажнун ҳақида сўзлашга майл қилган. Ҳозир ҳам у шеъриядта ягона бўлиб, сўзлари сочилган дурлардекдир. Суҳайлий Хусрав руҳини безовта қилса-да, лекин Низомийнинг кўз нури ҳисобланади. Бирининг руҳини ранжитсада, иккincinnisinikini қувонтиради. У дур сочувчи қаламини қўлга олиб, Лайли ва Мажнун достонини битгандир. Унинг бундан муроди: олам саҳифасида бўлмаган ажойиб бир достон яратиш әди. Низомий, Хусрав ва Суҳайлийлар бу қиссани назмга солган эсалар-да, улар бу даштдан ўтмаган, бу балолардан хабар топмаган эканлар. Улар халқ ва ривоятчилардан бу қиссани чала-чулпа әшишиб, бунга шунчалик зеб бердиларки, унинг васфида ҳеч сўз айтиб бўлмайди: сенга ҳам фалак ёр бўлиб, йўлинг шу ишқ саҳросига тушди; унинг ҳоли ва ғамкулфати қандай эканлигини билдинг.

Бу ишқ даштига кимки келиб, яна қайтиб кетар экан, бу воқеаларни айтольмайди, айтса ҳам ҳеч ким ишонмайди. Менинг ишқ йўлбощиси деган номим бор; турар жойим ҳам ишқ саҳроси. Сенга Мажнуннинг Лайли ғамида қандай куйганини бекаму кўст рост сўзлаб берай».

Гойибдан овоз берган руҳ шундай деб бу қиссани бошлаб, маънавий нафосат билан баён этди. Унинг ғам-ҳасрати, оғир кунлари шундай-шундай әди, деди. «Энди бу қиссани англадингми, дадил бўлиб, қоғоз, қаламга қўл чўз. Сендан бу ҳикояларни ёзмоқ, биздан сенга сўз билан тўгри йўл кўрсатмоқдир. Уларча ранг-баранг сўзлай олмасанг-да, ширин тил, нозиклик билан бўлмаса-да, лекин сеникида дард ва ўртанишлар ортиқроқ, кўнгил ёқувчи ҳангомалари кўпроқ бўлади. У томонда гул ва сунбул бўлса, сен кишилар қалбига ўт ёқиб, тутунини кўкка етказасан. Улар қимматбаҳо дурлар сочса, сен кўз ёшини дона-дона қилиб оқизасан. Уларда жозибали сарв унса, сеникида фифон ва оҳ дарахти ўсади».

Хаёл мусофири ишқ кўргиликларини англаб, уларни чин кўнгил билан қабул қилди. Жонига завқ асар этиб, бутун ғам

ва малолликлар бартараф бўлди. Ижод учун белни маъкам боғлади, хаёл отига чаққонлик билан сакраб минди. Ҳужрага етиб келганда, тонг отиб, муаззин аzon айтди. Бутун фарзларни адо қилганимдан сўнг, қўй давот ва қаламга борди. Гойибдан келган овоз тўғри йўл кўрсатганидек, мен ҳам афсонани бошладим.

X

*Қайснинг йўқлик мажлисидан қутулиб,
вужуд бешигига тутилгани; қон ютмоқ-
дан емиш ва ишқ доясидан парвариш
топгани; ишқ зоти баҳрасидан эл кўзи-
га ширин ва азалий дард ҳароратидан
халойиқ назарига иссиқ кўрингани*

Бу бўғовлар ҳалқасидаги ғамгин кишининг занжирлари шундай садо беради: Араб ерида бадавлат киши бўлиб, у Арабистонга ҳукмонлик қиласарди. Неча-неча қабилалар унинг ҳукмида эди, барча қабилалар унинг иқболини ўйлаб иш кўришарди. У бечора халқнинг мушкулини осон қилувчи, ҳамиша дастурхони ёзиглик, меҳмондўст киши эди. Осиғлиқ қозони ўчоқдан тушмас, тун-кун гулханида ўти пасаймас эди. Саҳрода йўлини йўқотганларга бу ўт қоронгу кечадаги ёруғ юлдуз бўлиб кўринарди. У билимни касб қилиб, сажоватни ҳунар қилиб олганди. Билим билан сажоват кўрсатарди. От, туя, қўй-қўзилари сон-саноқсиз.

У тез ўтувчи умридан куйган, боласи йўқлигидан жуда қайурарди: моли кўп, ўзи кексайган, фарзанд орзусида эди. Инсоннинг ҳаёт либоси эскиб, умр дарахти ҳам қулай деб қолганда, ёнида гўзаллиги санавбарга ўҳшаган ёш мевали ниҳол бўлса эди. Шу азамат дарахт тубидан кўчиб кетса, бу ниҳол ўсиб соя соларди; яъни йўқолган садафдан бир дур қолса, унинг қабиласи шу дурдан нур оларди. Агар бир меросхўри бўлса, унинг моли дунёда совурилишдан сақланарди. Умр қуёши ботар скан, унинг ўрнига яна ёруғ қуёш — фарзанд керак. У қуёш юксалиб, бутун қабилаларни ёритар эди.

Билгилки гулистон қуриганда булбул сайрамайди, достон айтмайди. Ҳа, ғам тунида нур таратувчи шам ўчиб қолса, парвона билан уй ёришмайди. Бирор мақсадни кўзлаганда шуни ўйла, агар етолмасанг, сабр қил.

Қабила бошлиги тангрига кўп ёлвориб, истаган умидига ётди, яъни унинг мақсади фарзанд эди, худо унга ворис бер-

ди... У ворисгина эмас, балки ишқ ахлининг мурод қабила-
сидир. Ишиқнинг туғилиши бир башарий қатрадан экан, ўша
модда маъно садафининг ишқ гавҳаридир. Шу қатра тан
хазинасининг яширин қимматбаҳо кумуши, жон гулшани-
нинг ёруғ шабадасидир.

Мұхаббат ояти унинг ёноғида товланиб, вафо фармонлари
еса, юзида кўринарди. Ишқ мулкининг шоҳи кўқдан ергача
ҳўкм қилдиким, шодмонлик билан осмон гумбазигача зийнат
бериб байрам қилсинлар. Кўқдаги абадий дард шодиёна нағ-
масини чалсин. Дунёдаги ғам лашкарлари талвасага тушиб,
севги қўшини қўзгалиб, тошди.

Бало сел оғатига йўл очаман деб, қўли билан унинг кўзи-
ни очди. Бебош фироқ унинг бошини силаб, «бу бош устига тош
ёғдирман» деди. Дард ҳам унинг оғзини ювиб, «бу ердан оҳ
ўтларини фалакка ўрлатаман» деди. Ишқ эса «бундан бошқа
пок манзил йўқ» дея унинг кўнглига мойил бўлди.

Алқисса, отаси бу дурни топганидан фажрланиб, кўп гавҳар-
лар сочиб, тортиқлар берди. Ўғлининг номини Қайс қўйди,
бу — ўз отасининг номи ҳуди. Бир неча доялар уни боқиб аср-
дилар, улғайтиришга киришдилар. Қимматбаҳо матолар билан
йўргаклаб, гунча каби юзлаб қават либос билан ўрадилар. Гул
япроги асалга тушгандек, уни бешикка боғладилар. Уни баҳт
билан саодат доя сингари одат бўйича тарбияладилар; бир
лаҳза ҳам ундан бехабар қолмай, кўз қорашибидек сақладилар.
Уни кўз ёшини сақлагандек кўзда асрдилар.

Бодомнинг ичиди мағиз сақланганидек, бу бола ҳам кўз
бешигида фароғатда яшарди. Унинг атрофини ўраб олган эл,
у томонга совуқ шамолни эсгани қўймасдилар. Унинг бўғзидан
суг ўтиши биланоқ қонга айланар, бу важдан бағри ҳам қонга
тўйлар ҳуди. Бешикка танғилиш билан унинг тани қийналиб, азоб-
лана бошлади. Ерда юришга ўрганмаган жуда кичик чоғидан
бошлаб эмаклашга ҳаракат қилас, ўтни кўрганда уни ишқ ўти
гумон қилиб, унга яширинча майл қилас ҳуди. Дард ва ғам бир
лаҳза ҳам ундан ғофил бўлмай, ҳамиша уни улғайтиб борар
ҳуди. Гўдак бешикда фифонлар тортар, аффонида эса дарднинг
нишоналари сезилар ҳуди. Унинг тили чиқиб гапирав экан, ҳар
бир гапи таъсири бўлиб, гаплашганда унинг сўзлари элнинг
ҳушини ўйқотар ҳуди. Юзида малоҳат шуълалари, нутқида фа-
соҳат нашъалари бор. Унинг ҳар бир маъноли сўзи эл кўнглига
таъсири қиласарди. Унинг фикрлари ақлга маъқул, бошдан-оёқ
манзур ҳуди.

Қабилалар ҳар томондан хабар топиб, Қайсни кўрмоқча
ошиқар ҳудилар. Атрофдан келган кишилар, бу ажойиб болани
талашиб томоша қилишарди. Баъзилар унинг юзидан ҳайратда

қолсалар, баъзилар сўзидан ўйга чўмиб қолардилар. Бенаволар уни жондан севар, ҳар ким кўрса дуо қиласди. У юзларча қариларни ўз васфида лол қилган шундай ажойиб бола эди.

Ота-онаси уни бирдай севар, гўё маъшуқ битта-ю, ошиқ иккита эди. Ундан беҳад ажойиб сўзлар эшитганлар «ёмон кўз тегмасин» дердилар. Уни жон йўргагига ўраб, кўз қорачиқларини исириқ қиласдилар. У тўрт ярим яшар бўлганида, отаси уни ўқитиш ниятига тушди. Қабилалар ичida тенги йўқ таълим берувчи устозни қидира бошлади. Токи ўғли мактабда ўқиб, бахтили бўлсин, илм-маърифатдан баҳра олсин, илмлар билан азиз бўлиб, жаҳонда ном чиқарсин.

Эй одоб ўргатувчи устоз, ақлсенинг қошингда талаба бўлди. Бу бола қўлига бир варақ тутқиз, менга бўлса, ишқдан сабоқ бергин!

XI

Қайснинг донолик мактабида илмлар варақларини ўғиргани; ишқ изгирини етиб, у варақларни совургани, яъни Лайли ҳусни гулшанидан хасталик ҳазони четлашиб, саломатлик баҳори елидан латофат гуллари очилиб, мактабга йўл олгани ва у гуллардан Қайс кўнгли оёғига ошиқлик тиканлари санчилгани

Сўз дарсидан таълим берувчи киши афсонани шундай таҳлил қилди: Қайсга одоб ва таълим берувчи кишини ҳар тарафдан изладилар. Одамзод ичida малаксимон яратилган бир ҳунарманд устод топилди. Бироқ у устод қабиладан ҳеч ерга жилмасди, дарс беришда юксак камолот соҳиби эди. У ажойиб киши қабилада иззат-ҳурматли бўлиб, ҳар ишда ҳай аҳлига ёрдамлашувчи эди. Зўр шаън-шавкатга эга, мартабасининг юқсаклиги кўкка тенг бир шахс эди. Қаҳри келганда нафаси гарм-седек, метин тошлар қўлида юмшоқ мумга айланар эди. Унинг қарам дастурхони олдида қуёш қора кулчадек қадрсиз; чексиз бўлган тун осмони унинг қабиласида эски бир отхона эди. Ўт унинг қаҳрига тенг келолмас, ел бўлса унинг қабиласидан битта гардни ҳам учирив кетолмасди. Элига олам оғатлари тушмас, чунки у ўз элининг паноҳ қўргони эди. Хазинасида дурру гавҳарлар кўп бўлиб, лекин бир дурдан алоҳида фахрланар; бўйтонида юзларча чиройли гуллар бор бўлса-да,

уларнинг биридангина унинг димоғи хушбўй әди. Бир машъалдан унинг кўзи ёруғланган әдики, унинг бир учқуни шарқ қўёши әди. Туар жойи бир шам билан безангандан; жаҳон уйи ҳам ўшандан равшан бўлган әди. Уни шам дема, балки нурларнинг чашмасидир, унинг нури ёмон кўзлар макридан йироқдир. Уни ниҳол дема, балки сарв каби хушқоматдир, сарв ҳам дема, балки шамшодга рашк соловчиидир.

Уни ой дема, балки тўлган ойдир, тўлин ой ҳам эмас, балки порлоқ қўёшдир. Икки лаби асал, лекин хурмо мазалик; икки юзи тўлган ой-у бироқ ниқобда. Қора зулфлари тунида юзи қўёшдек, гажаклар эса шу қўёшнинг устидаги умид шоми әди. Йўқ, шом эмас, балки кўнгилдан тонгнинг ёдини чиқарувчи қоронгуликнинг ёйилишидир. Туташган икки қоши ўзаро ҳусн талашиб можаро бошлаган чоқда, қора холи воқиф бўлиб орага кирган. Ўсма уларга зийнат берганда, янги ойга ўхшаган қора қоши кўқимтирир бўлиб товланар ёхуд янги ўсиб чиққан икки сарв ниҳоли шабададан икки тарафга эгилиб тургандек туюларди. Шўх, раҳмисиз икки кўзи эса, маст коғирлардек уйқусираб, ҳалиги сарвлар остида уйқу умиди билан чўзилиб ётгандек.

Киприк сафлари қора балодек, қора кўзлар устидаги сояниг қораси каби. Соя ҳам эмас, балки тўрт қатор саф тортган сурма ранг кийинган занги қўшинилариридир. Кўз очиб юмгунча киприклар икки қўшинидек қон тўкмоқ учун бир-бирига ташланади. Буларни ҳинд лашкари дема, балки чин даштининг кийикларига қўйилган қатор қопқонлардир. Чин кийиклари шу қадар мушк сочдики, у қопқонларни ҳам муаттар қилиб юборди. Юзи жаннат боғларидан нишона бўлиб, ундаги хол алдамоқ учун донадир. Жаннат донасига биргина Одам Ато илинган бўлса, бу юздаги хол донасига бутун жаҳон аҳли овлангандир. Лабининг болидан оғзи ширин бўлгани учун сўзлари ҳам ширин эди. Лабига жон заҳиралари йигилган, оғзининг суви жон ширалариридир. Уни ўпган киши ундан жон топади, шунинг учун уни оби ҳаёт дейилган.

Икки қизил лаби жон бўлса, ияқ остидаги бақбақалари «жон» сўзининг «нун» ҳарфидир. У шундай сарв қомат, нозик ниҳолки, жилvasи қиёмат қўпоради. Уни кўрган киши ўзг бир оламга ўтиб қолар экан, у ҳар дам бир қиёмат қўпорса нима айб? Белининг нозиклиги жон пардасидаги ингичка торларсимон, либосидаги ўриш-арқоқлар жон пардасидаги яширин нозик иплардандир. Унинг пок гавҳари ҳали ипга тизилмаган, лаъли эса заргар қўлидан зарар кўрмаган; тўғри даъво каби тоза, очилмаган маънодек оҳорли әди. Икки қора сочининг узунлиги интиҳосиз икки қоронғу кечади. Шунинг учун

унинг исми барот* ва қадр** кечасидаги тўлини ойдек жилва-ланарди. Кимки унинг исмини айтишни истаса Лайлидан бошқа сўёни тилга олмас эди. Бу тоза гулшан — Лайли гулдек юзи билан отасининг кўзини равшан қиласган эди. Отаси Лайлига мактаб бўлсин деб бир уйни жиҳозлаган эди. У хона нафосатда ой доирасига ўшар, Лайли шу уйда ойдек ўтиради. Боя айтилган устоз шу мактабнинг муаллими бўлиб, фариштадан ҳур таълим оларди. Кўк юзини юлдузлар қоплаганидек, у хона болалар билан лиқ тўлган эди. Йигин гули Лайли эса, талабалар орасида юлдузлар ичида ойдек ўтиради.

Қайсга келсак, отаси уни бир устозга топширса-ю, устоз унга илм ўргатса, деган фикрга келган эди. Қабилаларида Лайлининг мактабидан бошқа муносиб мактаб бўлмаганидан, арабларда бўлган расм-русларга мувофиқ, гавҳарни чексиз денгизга ташлагандек, Қайсни ҳам билимдонга топширдилар. Бундай пок гавҳарни топган денгиз жуда завқланди. Шу соатда унинг таълим таҳтасига сабогини ёзib берди, яъни олдига кумуш лавҳ қўйиб, дарҳол унга таълим берди. Ўқитувчи таълимга қаттиқ бел боғлади, Қайс унинг айтганларини яхшилаб бажарди. Унга қанча кўп сабоқ берилса, гўё илгари билгандек ўқирди, ҳамдарс болалар ўз ҳолатларига хижолат тортар эдилар. Қайс бир кун шериклари билан сабоқдош бўлса, иккинчи куни албатта ўзиб кетарди. Шундай кунлар ҳам бўлардики, беш-ён сабоқни ўқиб, англаб, янги варақлар очарди. Шу йўсиnda замона уни тез вақтда ҳамма илмлар бўйича ягона қилиб қўйди.

Замона ягонаси — Қайс мактабга кела бошлигар вақтда, Лайли демайин, ул санамдек паризод бир касалга чалинганди. Табиатига тушган қуёш каби ҳарорат унинг осойишини барбод қилганди. Ҳар кўнгилки, аслан қуйган бўлса, озгина ҳарорат ҳам унинг танини азоблайди. Чироғи ўчаёзган бечора чироғига ёғ қуайлса, яна ёнаверади. Қуёш қумни қанчалик қизитмасин, унга ўт ёқилса, яна ҳам алангаланади. У қуёш — Лайлининг мижози иссиқ бўлиб, қумларнинг эса, гарм-сели юрган эди. У хурмо ва асални яхши кўрар, май ичишга ҳам ошиқарди. Асал, май ва ўз иссиқ табиати ҳамда ҳавонинг ҳарорати — тўртталаси шуълаланиб унга ўт солдилар. Унинг оқ гулга ўхшаган жисмини иситма қизил гулга ўхшатиб юборган эди.

* Барот — ҳижрий йил ҳисобида саккизинчи ой бўлган шаъбонинг ўртаси, байрам куни.

** Қадр — рамазон ойининг «Лайлутул-қадр» (қадр кечаси) деб аталадиган 27-кутлуг туни.

Гул юзидан оққан терлар уйни гулобхона қилиб юборарди. У бўлса, ғунча каби ҳарир пардаларга ўралган, иситма унга гул зарралариdek ўт солган. Мизожидан ҳарорат кам бўлса, уни иситма қалтиратарди. Тонг елидан тераклар титраганидек, унинг шамшод қадди безгакдан титрар эди. Зилзила бўлган чоқда қоя тошлиар бир нафасда пора-пора бўлиб кетса, нозикликда гулдай мулойим бадан шамол титратишга қандай дош беради? Унинг бошида дўстлари йигилишиб, табиблар ҳозирлашар эдилар. Қон тўкувчи кўзларига чидаш қандай қийин бўлса, унинг учун парҳез қилиш ҳам шундай мушкул эди. Шу аҳволда у гул юзли сарвнинг касали узоқча чўзилди. Фалак қанча ҳасад қилмасин, унинг табиати ҳам шунчай ёрдам берар эди. Касалликда табиат меҳрибонлиги юста тажрибали табибдан яхшироқдир. Агар унинг мизожи тузалишга кўмаклашмаса, Исонинг элга жон бағишлидан нима фойда? Кишининг ўз табиати касалликларни қувиб чиқарди. Лайлита табиат муруват қилгач, хасталик йўқолиб, қувватга кирди. Ҳакимнинг кўрган чоралари кор қилиб, унинг мизожи тузалишга юз тутди. Мизожига саломатлик киргач, табиатида ҳам тинчлик туғилди. Лаъли лаби жилмайиб, қоматининг ниҳоли юксалди. Май табъига хурсандлик бағишлиди, баданига қон югуртирмоқ учун парҳезни ушатди. Яна ўша гул юзли гўзалликда бурунгидан ҳам зиёда бўлди.

У одобли ой бир кун зерикиб, мактабга бориш ҳавасига тушди. Оламга зеб бергучи гўзаллик пардоҷиси уни безантирди. Оламнинг зеб-зийнати бўлган ҳусн яна зеб устига зеб берди. Унинг сочи хад* ёнидаги долга; фам** калимасидаги нуқта оғзи устидаги холга ўхшайди.

Юзининг ўтини ёқмоқ учун гугурд — қора қошлар нилдек ҳар томонга тортилган эди. Чеҳраси гулистонида очилган олов ранг гуллар билан жаҳонга ўт солади. Унинг бошидаги анбар ҳидли қора зулфлари — гул ранг юзида қора тутун, манглайнадаги тилла қоши гўё ўтдан чиққан алангалардир. Унинг лаблари пешонаси, юзига ёққан ўтнинг чўғлари эди. Үндаги ҳинду хол жодугарлик билан ўт ичига сувни беркитгандек ёки оби ҳаёт лаби сув ичига ўт яширгандек эди. У лаълнинг ўтидан жаҳон, йўқ, йўқ, балки жон куяди. Ўтли икки кўзи сурма юқи, у сурма эса, бу ўтнинг тутунидир. Бу ўтлар орасида гарқ бўлган юзи жаҳонни куйдирмоқ учун чақин эди. Қандай чақин, оғат чақини ёки у юз, гўзаллик равшанлигидир. Юзи атрофидаги гавҳар шодаси айни ой теварагидаги юлдузлар. Унинг

* Хад — ёноқ.

** Фам — оғиз.

соchlари устидаги дурраси васл шомидаги ойдинликка ўхшарди. Гўзалликда бошдан оёғигача чиройли, севимлидир. Бу абадий балони кўрган вақтда, замона қўзголмай нима қилсин!!

Жаҳон офати шу суратда саккиз осмонга шўришлар солиб, гул юзли, аргувон чеҳрали бир неча бўйдош канизларни орқасига эргаштирди. Ҳамдарсларига ҳамдам бўлиб сайру саёҳат билан кўнглини хурсанд қилсин учун бошдан оёғигача ҳусн ва нозга тўлиб, мактаб томон жилва солиб жўнади. Муборак устоз уни қувноқ кўриб, барча ўқувчиларни озод қилиб юборди. Токи у қизлар билан боқقا бориб, гулшанни ўз жамоли билан равшан қилсин.

Кўк гумбазини қуёш ёритгандек, мактабни ҳам у паричеҳра ёритди. Барчалари уни ҳурмат қилиб, юқорига ўтказдилар. Баҳордан гулистонлар хурсанд бўлганидек, мактаб ҳам унинг жамолидан шод бўлди. Лекин ҳаёт баҳори — Лайли бир ниҳолни хазон қилди. Йўқ, йўқ, буткул ўт туташиб, у дараҳт бошдан оёғигача куйди, оловга айланди. Бир-бирига ўралиб кетган шуълаларни эл хазон барги деб тасаввур қилди. Хазин Қайс уни кўриб, юзи каҳрабодек бўлди. Чеҳраси ҳам каҳрабо ранг, кўнглида ҳам сабодек түғён. Ҳар дам йиқилишга мойил бўлиб, ҳар нафас ҳушидан кетай дерди. Унинг вужуди заифланиб, кўнглида ҳам борган сари хасталик ортарди. Қайснинг аҳволи кўзга ўзгариб тургандек кўринар, кўринаргина эмас, ҳоли ҳам нафаси ўзгача эди. Раҳмсиз ишқ зўрлик қилгани учун биринчи қадаҳдаёқ ҳушидан айрилди. Балки у май иси билан маст бўлиб, ғам тўдасидан енгилди: ғам лашкарларига бўйсунди. Кўп уринишлар туфайли соядек ерга йиқилмай ўзини зўрга ушлаб қолди.

Уни кўргач, зебо нигори ҳам ўз кўнглини сабрсиз топди. Мулойимлик билан унинг ким әканини яхшилаб фаҳмлаб олди. Унинг ишқида қарори қолмай, бечора жони шавқ ўтида ёнарди. Қайснинг ҳам ўз ишқида ўтга тушиб, изтиробга қолганини; шу ишга чора қилмаса, бу ҳолнинг элга ошкор бўлишини билди: Эл бу аҳволни пайқаб, ўртага изтироб солар, орага бир парда тушиб қолар. У пайтда Қайс бу ерда туролмайди, ундан кейин дийдор кўришиш ҳам мумкин бўлмайди. Шўх қўғирчоқ—Лайли тезлик билан туриб, «Боқقا борамиз» деган ҳавасга тушди. Болалар ҳам бу вақтни ғанимат билиб, у билан бирга боқقا жўнадилар. У шакарлаб санам таклиф қилдики, кимки мактаб ўқувчиси бўлса, бир кунгина даштни қўйиб, борда гуллар билан гашт қилсинлар. Шундай таклиф бўлгач, Қайснинг ҳам улар билан бориши зарур бўлиб қолди. Қайс уларга йўлдош бўлгач, барчалари бақамти гулшангага бориб етдилар.

Эй,ишқ гулшанининг бөгбони, бир нафас гулранг қадаҳингни келтир! Бу гулшанга қандай гуллар сочишингни, қандай гуллар очилишини маълум қиласай.

XII

Баҳор фарроши ҳар нафас эсган шабадаларни туфламоги билан лола чирогини ёритганда ва булат найрангбози лаҳзалаҳза тушган чақин чучкurmogидан тогдимогини қурилганда, ўша кўзини ҳусн чироги ёритган ва димогини ишқ савдоси қурилган одамнинг гулюзлилар билан боғ сайрига боргани ва Лайли ҳусни гуланинг шабадаси димогига етиб, бир йўла ўзидан кетгани

Қуёш ҳамалдан қутулганда, даштда қўзиқулоқлар униб чиқади, гул шамъи гулшани истайди ва унинг нури гулшани тобора равшан қиласади. Фалак эса, тўти бўлиш ҳавасига тушиб бўйнига найкамалакдан ҳалқа солади. Агар фалак тўти бўлишни орзу қилмас экан, нега ерни кўк рангга бўяди? Ё яшил фалак тўти бўлиб, ер куррасини жўжа қилиб очганда, ер юзини тутган майсалар унинг аъзосидаги янги патларга ўхшар эди. Олам наққоши кунни оқ ва тунни қора ранг билан бўяб, кофур билан мушкдан, оқ билан қорадан гўё загизон ясади. Сариқ гул устига тушган тонг ёмғири олтин табақ ичига тўлдирилган инжуларга ўхшар эди. Ёхуд ярақон* касали унинг ҳароратини ошириб, сариқ юзига тер доналари тепчитар эди.

Ер юзи себаргалардан совут кияркан, савсан бошига гурзи кўтарди. Ғунча бошида жез қалпоқ кўрган чоғ муз тифи чамани тарк этади. Мевали дараҳт кумуш гул билан безанганда, тангалар ичига кўмилгандек кўринар эди. Чинорнинг ичдан кувиши ҳам қўлида гул тангаларининг йўқлигидандир. Тог бағрида сел эмас, балки тошлар ҳам Фарҳод фироғидан ёш тўкадилар. Саҳрода учган лола япроқлари Ҳусрав Парвез кулоҳини эслатар эди. Лола ғунчаси лаъл қутичасига ўхшайди, очилганлари эса, алвон лаълдир. Лола барглари тўкила бошлиганда, даштга бағри қора қушлар ёйлади. Даشت устида шамол сайд қилганда, бағри қоралар кўкка учуб кетади. Сув ичидаги бинафша ҳар замон турна бошидек кўринади. Ёш ғунчаларга иш ортириб ёғилган дўл уларнинг оғзига тиши бўлиб қадалади. Ёхуд ғунчалар кулар экан, даврон тоши уларнинг оғзини

* Ярақон — сариқ касаллиги.

қонатади. Май шишаларига тушган гул барглари турна кўзига, ёхуд тустовуқ қонига ўхшайди. Наргис майдан баҳра олмоқчи бўлса, пўртахол* терисидан пиёла ясади. Насрин барги тўкилгач, май кўва ёғини эслатар, занбақ гулининг баргига тўкилган мушкнинг ҳиди унинг димогини қуритарди. Гўё ўша мушкнинг бўйи билан боғ ичидаги бинафшаларнинг димоги тутилиб қолгандек бўларди. Бинафша димогини даволаш учун унга шабнам томизиб туриласди. Чаманга ёғилган шудринг кўкнор гули япрогига кўкнор доналариdek доғлар сепарди. Қушчалақ ҳам жуфти билан жўшиб, бирлашиб учишар ва дарахтларга ёнма-ён қўнарди. Япроқлар ёғочларга либосс, қушларга хилват жой бўлар эди.

Одамлар кўнгил очиш учун саҳро сари қадам қўйсалар, тоза шароблар ичиб, кайф-сафо қилмоқчи бўлганларида, жайрон боласини кабоб қиласдилар. Шу фаслда Лайли ва унинг ўртоқлари қувнашиб гулшанга ёйилган эдилар. Ул гулшан жанинатта ўхшаган бўлиб, Шом аҳли уни шодлик макони қилиб олган эдилар. Бу боғда ўсган ҳар бир дараҳт шундай юксалган эдики, Хулкар юлдузи унинг мевасидек кўринарди. Нажд тогининг этагидан чиққан булоқ бу боғни яшнатар эди. Энди эса, даврон тоши у чашмани кўмиб, кўзини ёпиб қўйибди. Суҳбатдошлар боғ ва лола тамошасига тушган бўлсалар, уларнинг ҳар иккаласининг ичи лоладек дод эди. Бошқалар ғунчага интилсалар, булар ғунча каби қисилган эдилар.

Лайлиниг севгида изтироби қанчалик ошган бўлса-да, лекин ўзини тутишга уринар эди. Мафтун йигитга ишқ изтиробидан сақланиш қийин бўлганидан, ақлу ҳуши бегона бўлиб турарди. У шериклари бирор нарсанни сўрасалар фаҳм этмас, агар англаса ҳам жавобида нима дейишини билмасди. Қайс ишқини билдирмасликка ҳаракат қиласа-да, ажойиб ишлар рўй берар эди: гоҳ тўсатдан кўзидан ёшлар оқар, гоҳо ихтиёсриз оҳ чекарди. Аҳволидаги бундай ўзгаришлар кўнглидаги ғамни элга айтиб турарди. Ўзидаги бу ҳолатга даво деб, ёрига бир назар солишини орзу қиласди; лекин ёрга боқайин деганда, кўнгил ўти ловуллаб кетарди. Боқай деса қуввати йўқ, боқмай деса тоқати ҳам қолмаган эди. Гоҳо кўз қирида қараганида шундай ўтлик оҳ тортиб юборар эдики, боянинг юзини хазон рангига чулғаб, яшнаб турган япроқларни сарғайтириб юборар эди.

У ой юзли гўзал ҳам Қайсни куйдирган ўтидан хабардор бўлиш учун ногоҳ бир назар ташламоқчи бўлди. Шунда жисмидаги ўртанишларни ва кўнгилнинг изтиробларини англаб, ўз кўнглида унинг муҳаббатидан асарлар ва унинг ишқи

* Пўртахол — апельсин.

Ўтидан алангалар топиб, бошқалар хабардор бўлмасалар экан, деб бир пайт топмоқ истарди. Қурбони — Қайсга ҳаёт багишлямоқ учун бир илтифот қилиб, ҳолин сўрамоқчи, ўзининг бетоқатлиги ва ишқининг алангаларини ҳам билдиromoқчи бўларди.

Боғ жуда кенг бўлиб, бошқалар сайд қилиб юришар, дарахтлар уларнинг кўзини тўсарди. Бу чаман гулларининг бирбирига чирмашиб кетганлиги ишқ ахлига васл пардаси бўларди. Болалар ўйинга маҳлиё бўлишиб, сарв ва гул билан улфатчилик қилишардилар. Сайд чорги Лайли бир туп гул ичига кириб қолди. Бу ернинг тўрт тарафи гул шохлари билан ўралган бўлиб, кирган кишини кимса тополмас эди; Лайли очилган гулдек гулзор ичига киргач, тиканзор ичидан булбули зорини кўрди. У ерга ғамли Қайс кирган ва гул каби ёқаларини чок қилиб, ўз ҳолига зор ва бесабру қарор йиглар эди. У фироқ қўшиғини куйлаб турган пайтда бирдан ёри етишди. Лайли ўз булбули — Қайсни ёлғиз топди. Сўзлашга тоби келмай, кўнглида изтириби кўп бўлса-да, бир неча сўз айтмасликнинг иложи йўқ эди; бироқ сўзлай дэгунча, ўзидан кетиб қолгудай бўларди. Кўп хижолатлар тортиб, охири пардали қилиб шундай сўз бўшлади:

— Эй ажойиб йигит, ҳолинг қалай, қандай ғаму қайгуларинг бор? Нега ўзгалар каби на шодлигинг ва на ободлигинг бор?! Дўстлар боғу гулзор тамошасида экан, сенинг танинг яраланиб, кўнглинг қайғу билан тўлибдир. Ҳозир Наврўз еллари эсиб, йигинларга гул ҳидларини уфурган. Бог баҳордан гулларга тўлган. Сунбул эса, гул устига кокилларини ёйган. Бу фаслда гулзорга кириб, бўстон саҳнини маскан қилган киши шод бўлиб, ҳар мушкули осон бўлиши керак. Нега сен бундай нолалар чекиб, ғамли кўз ёшларини тўкасан? Ишрат чорига азоб тортишинг ва ҳасратли кўз ёши тўкишинг нимаси?! Ажабо, бундай ғам сенга қаердан йўлиқди? Бу оғир ўртанишларинг сабабчиси ким?

Дилдор сабабчини сўраганида Қайс жон ўртовчи бир оҳ чекди. Унинг ширин сўзларидан лол бўлиб, юзига қонли кўз ёшлари билан ўз ҳолини ёзди. Йўқ, йўқ, ҳол тили билан эмас, қуийдаги сўзлар билан ўз ҳолини шарҳ қилди:

— Эй жонимга ҳайрат ўтини солган, кўнглимни биринчи ҳарашда олган! Аввал, жамолидан чақин ташлаб, вужудимни ўт ичига солган! Зулф ёймоқ билан қароримни олиб, жаҳонни ҳаётим кўзига қорайтирган! Аввал афсона бошлаб сўнг кўнглимни хароб қилган! Қилғиликни қилиб, яширишинг, яна мендан сўрашинг нимаси? Эл фаҳмламасин, деб нағални тескари қоқишинг нимаси? Бу изтиробларнинг ҳаммасига са-

бабчи ўзинг-ку, бу ишни кимдан кўрайин ахир? Яширинча кўнглимни олгансан, энди уни сендан ўзим ололмайман. Сен эса, ўзингни билмасликка солиб, яна шундай сўзларни сўзлайсан. Жонимни ўртасинг кифоя, бундан тонмоқлик нега? Ут устига ёғ қўйишинг, куюк устига доғ қўйишинг нимаси?

Шу зайлда тутақиб сўзлагандан сўнг, Қайс заифлашиб ҳушидан кетди. У тупроққа шундай тушдики, ердаги нарсаларга тенг бўлди. Нигори унинг бошини тиззасига олиб, юзига кўз ёши тўка бошлади. Беҳушнинг ҳолидан изтиробга тушиб, ҳар дам юзига гулоблар сепар эди. Ўз қурбонига ғам еб, йиғлаб мотам тутарди. Лайлини излаб юрган бир-икки дилором шу воқеа устидан чиқиб қолдилар. Улар ҳам соchlаридан мушк сочувчи бўлсалар-да, Лайлиниг канизи әдилар. Уларнинг кўзларига дунё қоронғу бўлди, қўрқиб: «Бу қандай ҳол?» дедилар. Ўз қилмишидан парда кўтарилгач, у гўзал канизи олдида ер ўпди. Беҳосдан воқеъ бўлган бу ишнинг ростини ҳар иккаласига бир-бир айтиб берди. Олам сирларини ошкор этгани учун, Лайли йиғлаб улардан ғамига чора тилади. Улардан бириси шундай дардли эди, дарҳол Лайлига ҳамдард бўлиб, деди:

— Ғам ема, ҳечқиси йўқ. Ишқ ўтидан кимлар ҳалок бўлмаган? Сен тургин, буни бизга топшириб, тездан қабилага жўна. Эл яна бу ишдан хабардор бўлиб қолмасин, биз бўлсак, сен истаганча чора топайлик.

У гўзал буларнинг айтганини қилиб, кўнглини қолдириб, ўзи уйига кетди. Қизлар эса Қайсга қарашли кишини топиб, ёрдамлашдилар. Қайснинг дўсти уни қабул қилгач, у икки каниз ҳам уйга жўнадилар.

Эй, соф кўнгилли дўст, мен ожизман, ишқ қўлида зору мубтало бўлиб қолганман. Мен беҳудман, бу оғатлар мени ўлдирмоқда, бир лаҳза ҳам бошимдан кетма!

XIII

Қайснинг айрилиқ тунида шабнам гулоби юзига сочилганидан кўзи очилгани; уйқусиз булбул билан ишқ достонлари ифодасида нола қилгани ва булбул соясидек тупроққа ўиқилгани; отаси унинг булбулдек фигонларини эшишиб, бошига этгани ва маҳофа қафасига солиб олиб кетгани

Олам гулшанининг гул юзли қуёши гарбга ботгандан сўнг, тун юлдуз чечаклари билан олам юзини гулистон қилди. У илк баҳор таннози ўз дардлари билан ичини ғунчадек қон қи-

либ мафтуни — Қайс ғамидан кўнгли ўртаниб, қабила сари жўнади. Ғам устига ғам ютиб, қабиласига беҳол етди.

Ҳушсиз Қайс гулшанда ердаги чангга ўхшаб ётарди. На бошида ҳуши, на жисмидан жондан асар бор. Ярим кечада эса-ётган гул ҳидли шабада чаманга гуллар тўкар экан. Гуллар ҳидидан ҳушсиз ётган бояқиши ўзига келиб, кўзини очди-да, ўзини чамандаги гул, сарв ва ёсуманлар ичида кўрди. Булбул боши узра сайраб, аҳволига йиғлар; қизил гул Қайс ҳолига назар ташлаб, ўз ёқасини пора-пора қиласр эди. Наргис унинг аҳволини кўриб, ўзидағи шабнам томчиларини кўз ёшидек тинмай тўкарди. Бу аламзаданинг кўксидаги айрилиқ доғини кўрган лола ҳам ўз кўксини куйдириб доғлаган эди. Бинафша бу ғамзаданинг заҳми кўкини кўриб, азаси учун мотам либосига ўралибдир. Бу таъзиядан хабардор бўлган дараҳтлар ҳавога байроқ кўтаришган. Сумбул юзини қора қилиб қопқора хушбўй зулфларини ёзганди. Оқар сувлар ҳам мотам тутганлардек товуш чиқариб зор-зор йиғларди. Сарв Қайснинг бошига тушган кулфатдан холи эмас, шамшод ҳам унинг дардидан ношод эди. Уни, ишқ ўлдириб қўйди, деб печак гул ҳам ўз-ӯзига чирмашган. Сабза бутун борлигини тил қилиб, ҳар бир тили унинг ғамидан ҳикоя сўзлар эди.

Бу мотам манзараларни кўриб, Қайс ўлимдан бошқа чора тополмас эди. Ҳар томонга боқиб ёрини тополмас, аламлари ўти пасаймас эди. На атрофида дўстлари бор, на олдида гул юзли ёр. Қуёш кетиб, қоронғу келган, ёки айрилиқ куни-ю қора тусда эди. Балки айрилиқ ўти тутун бурқситиб дунё хотумонини қора қилгандир. Унинг кўнглига ғам тоги йиқилган, ғамлари эса, тог-тог йиғилган эди. Ерини соғиниб унга назар ташлаган вақтда, осмон бошига қулагандек бўлди. Дардининг чекини тополмай, дардли кўз ўшларини равона қилди. Ёқасини тортқишиб йиртиб, танидаги саломатлик либосини ечди. Йўқ, балки бу либосни ўз жисмидан олиб ўтга ташлади. Кийими оловга айланиб, унинг тутунлари ўз оҳидек фалакка етди. Йўқ, йўқ, бу тутунлар унинг оҳи эди, сомон каби заиф жисми ёнарди. Бу сомондан гоҳ тутун, гоҳ шуъла чиқиб, сомоннинг аччиқ тутуни жаҳонни тутиб кетган эди. Сомон тутатқиси фалакка етиб, фалакнинг кўзига ёш келтирарди.

У сарғайган юзини шунчалик шапатиладики, бундан юзла-ри кўкариб кетди. Гарчи унинг юзи заъфарон бўлса-да, қўлининг зарбидан кўкарған ерлар пайдо бўлганди. Бу заҳилликдан кўнгли озор топар, кулмоқ ўрнига зор-зор йиғларди. Фироқдан кўксига тош урар, иштиёқ зўридан ерга бош урар эди. Кўксига фироқ шуъласи, иштиёқи бўлса, яна шу ўт билан

аланга оларди. Аламлар қўшини кўнглига саф тортиб, оҳининг ўти байроқ кўтарар эди. Шу алам лашкари унинг ичига тавғо солиб, кўнгил мулкини оёқ ости қилас; булар ўтиб кетмасдан туриб, унинг бошига яна янги бало аскари ёғилар эди. Ҳар жафо тўдаси қўлини чўзиб, унинг кўнгил мулкини ер билан тенг қиласди. Унинг кўнглида тўплланган турли-туман гамлар сон-саноқсиз, қанча десам ундан ҳам ортиқ.

Айрилиқ азоблари шу зайлда кечатганида, тонг ўз байронини кўтариб чиқди. Тун ўзининг кўумирларини йиққанда, тонг ҳам қуёш ўтини дамлаб пуфлади. Осмоси гулзорининг гуллари тўкилиб, ғунчалар жилмайдилар. Кўк чаманининг гуллари йўқолиб, ер боғида гуллар пайдо бўлди. Кўк боғидә сочилиб кетган бор нарса, гўё бу боғда очилгандек бўлди.

Маҳлиё йигит бу ёргу жаҳонни кўриб, яна оҳ ва фифонлар торта бошлади. Гулларнинг бошидан у тонг елидек айланар, чунки гуллар севгилисиdek кўринарди. Йигит айтар эдики:

«У ширин табассумли гул қаердаки, бу гул унинг юзига ўхшайди? Буларнинг ёнида тиканлари бўлмаганда, ўша юз ёдгори ҳисобланарди...»

Гунчага тўймасдан қараб, бу ғунчани Лайлининг оғзига ҳеч ўхшатолмас; гоҳо сарв тупининг остига юзини қўйиб, оҳини шу сарвдек юксалтираш эди:

«Бу сарвда, гарчи унинг хушрафтор қомати бўлмаса ҳам, Лайлининг қаддидан нишондир», дерди.

Гоҳ бир лаҳза ҳам бошини кўтармасдан бинафшага меҳрини билдирап ва бу бинафшанинг атридан Лайлининг хушбўй зулфини исказандек муроди ҳосил бўларди. Гоҳ юзини сабзага суртиб, оҳу фифонини кўкка чиқарар:

— Бу гулшанда сайри боя қилиб юрганда ёримнинг оёғи сенга теккан,— дерди.

Наргиснинг кўзи айнан ёрининг кўзига ўхшаб, Қайсни мафтун этган эди. Кўп қийноқлар тортиб йиглаган Қайс, касал кишидек заифлашган эди. Тупроқда оёқ изини кўрар экан, юз тубан тушиб:

«Бу ерга ёр оёғи текканга ўхшайди, тупроғини сурма қилиб кетипти», дерди.

Гоҳ сувдан нишона сўраб, кўз ёшларини сувдек оқизар эди:

«У суман ҳидли жилва қилганда, зора акси бу сувга тушган бўлса», дерди.

Қайс булбул билан жўровоз наво қилас, фифони булбулни-кидан ҳам ошиб тушарди. У булбулга қараб:

— Сенинг бундай нола қилишинг ўринисиздир, чунки ёрининг билан биргасан; жойинг тоза гулшан, қўнадиган еринг эса. гуллар шохида. Сен гулшанда ҳарам маҳрамисан, гуллар ора-

сидаги суҳбатнинг азизисан. Гўё сен ўз мавқеинингни писанд қилмайсан ёки ёр васлидан тўйдингми? Минг тил билан сайраб, ҳар шом ва саҳар гавро қилиб, овозинг билан әлга озор бериб, ўзингни ошиқи зор қилиб кўрсатасан. Киши сен қаби ишқдан сўзласа, ошиқлар бунга ишонармиди? Сен висолга эришганлардансан, шунинг учун ҳажр аҳли қошида гапирма. Мен — танида руҳдан асар қолмаган бир дардманд, мажруҳ, мискинман. Яъни жисмим ғам ўтида куйган, жонимдай гўзал гул юзли ҳам йўқ. Нола қилишга мен ҳақлиман. Сен мубталолик ноласини чекмасанг ҳам бўлади. Сенинг олдингда висол боғи бўлса, менинг бағримда фироқ доғи бор; сенинг ёнингда баҳор гули бўлса, менинг кўнглимда фироқ тикани бор,— дерди.

Ғаму ноласи шу ерга етганда, Қайс яна ақлу ҳушидан жудо бўлди. У шундай оҳ тортиб йиқилдики, худди ногоҳ жони чиқиб кетди десанг бўлади. Унга қараб туришга келган киши бир гул тагига яшириниб, унинг аҳволини кузатиб турарди. Қайснинг бу ҳолини кўргач, ўрнидан туриб қабилага жўнади.

Қабилага жадал етиб боргандা, Қайснинг уйида ҳамма саросимада эди. Ўша кечада Қайснинг қабилада тунамаганини билишгандан сўнг, уни топиш учун ҳар томонга кишилар жўнга гилган эди. Қайснинг бу иши одатга хилоф бўлганидан, қабила аҳлининг ғами борган сари ортарди.

Хушхабар даракчининг хабаридан сўнг, ҳаммаларининг ҳам кўнгиллари жойига тушди. Бундан воқиф бўлган гуруҳ, ўз Юсуфларини топиш учун шошилдилар. Даракчи кўрган-билганларининг ҳаммасини бирма-бир айта бошлиди. Ҳар на кўрган, эшитган бўлса, яширмасдан ҳикоя қилиб берди. Бу можаролар аён бўлгач, Қайснинг ота-онаси беҳол бўлиб, уни келтириш учун жўнадилар. Бутун қабила аҳли ҳам уларга эргашдилар. Хабарчи қабила аҳлини бошлаб, ўша алам чекаётган Қайс ётган ерга олиб борди. У ерга боргач, уни кўйлаклари эмас, балки кўкси пора-пора бўлган бир ҳолда кўрдилар. Унинг ҳушини ишқ ғами ўғирлаб кетганидан тупроқча кўксини бериб ётарди. Ҳаммалари уни олиб кетиши учун фигон-зор билан безатилган маҳофага* тайёрладилар. Қайсни шу маҳофага жойлаштириб, манзилга қараб йўл олдилар.

Эй, ишқ сафарчилари карвонбошиси, дард карвони йўлга чиқди. Қабила томонга бир қадам ҳам босма, шу дард карвонидан ҳаргиз ажралма!

* Махофа, мухофа — кажава.

XIV

Қайснинг ҳажр шомида андуҳ гуруҳи уйидан чиқиб висол қабиласи томон юргани; у қабила ўти билан тилдошлик ва ити билан ҳамдостонлик қилиб, қабила яқинига етгани; Лайли унинг товушидан уйидан чиқиб, бир-бирларини кўргач, у ҳам, бу ҳам ҳушидан кетгани

Бу дард достони устида қалам тебратган киши ўз қаламини бундай юритди:

Ҳушдан кетиб, беҳол бўлиб қолган Қайс, бошига қандай ҳол тушганидан бехабар эди. Ҳушига келгандан сўнг, у заиф шайдо кўзини очиб атрофга қараса, шўрлик ота-онаси ғам устига ғам чекибгина қолмай, балки мотам тутар эдилар. Отаси меҳр билан Қайснинг манглайнини ўпар, онаси бўлса бошидан ўргуларди. Қайс бу ҳолни сезгач, хижолатдан аъзойи бадани сувга айлангандек бўлди. Отасидан хижолат тортар ва онасининг оёғидан бошини кўтаролмас эди: яъни Қайс уялганидан ўзидан кетиб, бошини кўтаролмасди.

Ота-онаси, бу ҳаёдан унинг ҳалок бўлиши эҳтимоли бор, деб ўйладилар. Улар Қайснинг аҳволига ачинишиб, насиҳат йўсенида ҳеч нарса демадилар. Қайснинг бошига тушган бу воқеаларни фавқулодда ҳолат билдилар. Улар: «Агар биз буннинг аҳволини суриштира берсак, хижолат уни ҳалок қилиб қўяди. Энди бу воқеани қайта такрорламас, бундай васвасани эсдан чиқаргандир. Унинг табиати софлашиб, бундан сўнг бундай ишларга бормас. Ўзининг номусини сақлаб, тақво ва зуҳд йўлини тутар», дедилар.

Шундай андишани маъқул топишиб, ота-оналари ҳам туриб кетдилар. Бири: «Қайс қизиқ ҳолга тушибди» деса, бошқаси: «Ажаб хаёлга ботибди» дерди. Уни пари йўлдан уриб кетганини билмасдан, кишилар «Дев уриб кетибди» дердилар. Ҳар ким уй-уйига кетгандан сўнг, Қайс ўз ғам ҳужрасида қолди. Уни хаёл енгиб қўйганидан, ўз ҳолатидан ҳайратда қоларди. Ўз ишига қараб туриб, бу машаққатига чора тополмасди: ишқни деб тогу тошларга чиқиб кетишга ота-онасининг ёди тўсқинлик қилиб турар; севги унинг кўнгил мулкига фавро солиб, тўғри йўл тутишга қўймас эди.

Ўзбошимча фалак, дунё юзига шом пардасини ёйганга қадар, аҳволи шундай эди. Оқлик юзини туйилган қора мушк ёпиб, кўк шамъи — ой жаҳонни ўзининг қоракуялари билан бўяди. Фамга ботган Қайс қоронғу уй ичидаги тутундек

тўлғанар эди. Ишқ ўти яна оловланиб, унинг вужудидан нишона ҳам қолдирмади. Ғам тўдаси унинг кўнгил қўргонини забт этиб, ишқ ихтиёрини қўлидан олди.

Лайлининг ғаму ҳасрати шунча зулм ўтказдики, ота-онасини ҳам эсидан чиқазди. Ошиқлари ҳолини унутди, маъшуқа уйининг йўлини тутди. Бало қабиласига, яъни у ой юзли гўзал қабиласига юз тутди. Қайсни на қадам ташлашда ҳуши, на юришда ихтиёри бор. Дам йиқилиб, дам туриб қадам босарди; на сайд этарди ва на ором оларди. Унинг йиқила-тура юриши мастлардек, ҳушсизлиги майпарастлардек эди. Қабила ўти кўрингач, бу зору-шайдо ўша ўт ичра куйди. Кўнглини алангаларап қоплаб, шу алангаларап қарори қолмади. Оловли оҳи кўкка ўрлаб, тутун каби ўша ўтга юз урди. У ўт алана чиқаргандек, Қайс ҳам куйлаш учун тилини ростлади. Ўтли нафас билан ўтга қараб шундай сўз дурларини соча бошлади:

«Эй, айрилиқ тунидаги ишқ ахтари, чақмоқдай ярқираган ишқ гавҳари! Эй, эркинлик машъали ёки шамчироқ гавҳари. Тутунлар аро алангаларнинг ҳужуми, ғам шомидаги юлдузларнинг ғужуми. Ҳар томонни қоплаб олган тун зулматида шуъла баҳт йўлини кўрсатади. Тутунинг билан анбарга бурканди, у тутун эмас, балки мақсад манзилининг белгисидир. Кулинг ичига кўмилган ҳар бир патир кўк дастурхонидаги нурли ойга ўхшайди. Тутунинг кўзларни ёшлатиб, учган кулларинг унга сурма тортади. Агар кулларинг кўзларни ёриштирмаса, кўзлар нега сурма ранг бўлди?! Ёки ўшандай кўзни очмоқ учун сурма ўзини кулга ўхшатдимикан? Чўғларнинг ҳар бири, ўтли ёқутдай, кўзларни куйдиради. Бу лаъл анорга ўхшаб, ранги ҳам, табиати ҳам ўтдай. Тож устидаги лаълдан-ку шод бўлишади, бу лаълнинг устига тилла тож қўйиш нимаси энди?! Қайгу оқшомлари қўлимдан тутиб, айрилиқ тунларимда кўзимни ёритдинг. Эй олов! Сенинг яхшилигинг ва мақтовингни қайси тил билан изҳор этайнин? Ой билан кун иккиси сен ёниб турадиган, ўчоқ-манқал; уд, сандал ёғочлари сенга тутантариқ бўлсин. Доим сен шу ҳунарингни тут, ёрга ҳам, жаҳонга ҳам ёруғлик соч». Қайс шундай оҳу зор чекиб, ўт билан сўзлашиб улгурмасдан қабила томондан ит фифони эшитилди. Йигитнинг кўнглига изтироб тушиб, баданлари ҳам жимиллаб, қалтираб кетди. Дарҳол ўша итга жўр бўлиб фарёд қилди, юз хил фифону зор чекди. Фалак бахтсизлигига йўлиқиб, кечаси карвондан адашиб қолган кишилар, мадад излаб, бир-бирларини қандай чақирган бўлсалар, булар ҳам шу ахволда эди. Чунки адашган кишилар бир-бирларининг овози келган томонга интилиб, мақсад манзилига етиб оладилар.

Қайс ўзини билмай итга бундай муножот қиларди:

«Эй, мунгли иоланг жонимга хушхабарчи, эй, ғамгин овозинг руҳимга озиқ берувчи! Ғам тунининг вафодори, адашгандарнинг раҳнамоси! Сен у манзилдан ўргилиб, бошингни қўйибсан, кошки мен ҳам сенинг бошингдан ўргилсан. Кимки у манзилга ёмон ният билан кирса, панжанг ва тишларинг билан баданларини юмдалаб ташлайсан. Эл қони оёқларинга хино, ўша оёқларга жоним бўлсни фидо. Сен у ернинг посбонисан. Мен эса бу баҳтга эришмадим. Иккимиз ҳамдам бўлсакда мен — хор, сен — азизсан. Сен ёр эшигига шодсан, мен айрилиқда маҳрум ва ғарибман. Сен ёр маконида урарсан жавлон, мен биёбонларда зор-нолон. Сен ёр манзилида ётарсан тошга қўйиб бош, менинг бошимга фироқ ёғдирап тош. Сен вафода ҳам, тўғрилик ва покликда ҳам мендан баландсан. Йўқса, фалакнинг гардиши нима учун мени хор этиб, сенинг мартағанни сширид? Қонхўр дунё сени яхшилик билан ҳурматлагани, мени эса хор қилгани учун, менинг фифонимни өсда тутиб, гоҳо ўша даргоҳни менинг учун ўпид, тавоб қил!»

Ит билан шундай можаролар тузгандан сўнг қабиланинг қораси кўриниб қолди. Паришон Қайснинг кўнглига беадад гавғо тушиб, юришга ҳам мажоли қолмади. Юрай-юрай деб шунча тиришса ҳам, оёғи чалишиб йиқиляди. Неча марта йиғи́лса ҳам яна турар, ер ўпмоқ унинг баҳонаси эди. Йиқила-тура қабиласа етган чоқда, жони оғзига келиб, ҳушидан кетди. У гоҳ ҳушда, гоҳ беҳуш ҳай қабиласи қўргони атрофида айланар эди. Бу қўргон, ғам лашкарларининг жуда баланд пояси ва фитна қўшинининг ниҳоясидир. Қайснинг ҳар лаҳза чеккан фифони жонни куйдирса, ўтлик нафаси жаҳонни куйдиради.

Лайли арабнинг офати бўлса-да, Қайснинг мубталоси эди. У ўз дардини кўнглига яшириб, уйқу ва овқатни унугтган; кечакундуз Қайсни ўйлаб, унинг васлига етишиш орзуси билан банд эди. Ўша кеча шу вақтга қадар қайгу Лайлининг кўзига уйқу йўлатмаган эди. Ҳамиша зулфидек буралар, оғзи каби сабру қарори ҳам йўқ эди.

Ёруғ кун қора тунга айланган чоқда, бирдан бир мунгли овоз эшитилди. У товушдан Лайлининг ичига ўт тушди, кўнглини изтироб босди. Кўнглидан қарор ва ороми йўқолиб, туриб у овоз томон юриб кетди. Бу пайтда ишқ асири Лайлидан ўзга бутун қабила маст уйқуда эди. Беишқ ҳалқнинг мақсади — уйқу; ишқ аҳлига уйқу ҳаром. Унинг ишқ офати билан тортган азобларидан воқиф дояси Қайсга ҳам меҳрибон; унинг орзусида жонни фидо қилгудек эди. Мактабда ҳам бу меҳрибон кампир унинг аҳволидан хабардор бўлиб турар эди. Кампир ўзини Қайсга нисбатан ҳам доядек тутар, Қайс ҳам

унинг фарзандидек бўлиб қолган эди. У ой ташқарига чиққанда, кампир ҳам соядек унинг орқасидан борди. Раҳмсиз ишқ Лайлини ғамили Қайс турган ергача тортар эди. Кўнгил беришганлар бир-бирларини кўргач, шундай ўтли оҳ чекдиларки, уларнинг ўтидан жаҳон ёришиб, хирмонларига шуъла тушгандек бўлди. Уларнинг ҳуш хирмони ёниб кул бўлгандан сўнг, иккиси беҳуш бўлиб йиқилди. Доя бу пок ишқни ва куйдирувчи шуълани кўрди. Бу икки ишқ ўтида куйгандарнинг оғизлари ноладан садаф сингари очиқ эди. Шундай висол муяссар бўлган чоқда, сўзламоқ учун мадорлари қолмаган эди. На буниси дард-ҳасратини айта олар, на униси жонини ачиттан аламини сўзлай оларди. Бу ҳол кечаси бўлмасдан қуёш ботгандек ёки сел келмасдан девор йиқилгандек эди. Доя ҳасрат-надомат билан ҳар иккисининг аҳволига мотамзадалардек зор-зор йиглади. Улар то ўзларига келгунча, бирор билиб қолмасмикан, деган ваҳимага тушди. Акс ҳолда, бу шўрликларнинг жони хавф-хатарда қолган бўларди. Балки ҳар иккиси нобуд бўларди. Кекса осмон қуёшни орқалагандек, бу ҳам бирини орқасига астагина кўтарди. Кампирнинг юк кўтаришдаги букчайиши, қари фалакнинг эгилишига ўхшарди. Уни келтирибоқ тўшакка ётқизди-ю, яна дарҳол қайтиб, мафтун Қайснинг ҳушсиз тупроққа ботиб ётган еригача борди: унинг ғамида оналарча куйиб, уни дам кўтариб, дам судраб, элнинг ваҳим ва гумонидан чеккароққа, қабиладан узоқроққа элтиб қўйди. Бу ёқимсиз ҳолни бирор кўриб, тагин унинг жонига зарар бермасин деб, у девонани йироқроққа қўйиб, ўзи пари ёнига қайтиб кетди. Икки ошиқни ётқизди-ю, доя бечора ўзи ётди. Ким билади, замона эртага қандай ўйинлар чиқарар экан?

Эй, замона золи, дастингдан дод! Болаларингга токайгача зулм қиласан?! Буларни ҳалок этиш билан ўз бағрингни чок этасан-ку!

XV

Қайснинг гойиб бўлганидан қабила аҳли хабардор бўлиб, елдек тог ва водийга етиб, унинг бир қум ичидаги беҳуш ётганини кўриб, ел хашакни учирганидек ўйга келтирганлар; Қайснинг у пари ишқида ақлу ҳушини йўқотиб, Мажнунлик билан шуҳрат топгани

Аlam тунидан афсоналар келтирувчи бу қиссага шундай зебу зийнатлар таҳди:

Ўша кечада кўнгли яраланган Қайс Лайли қабиласи томон жўнади: Лайли даргоҳига яқинлашганда, унинг бошига турли кулфатлар тушган эди. Кундузи Қайснинг йўқлигини кўрган эл, яна мусибатга тушдилар. Отаси ғоят қайғу-ҳасратдан йиглаб, онаси дод-фарёд бошлади. Ундан хабар топиш учун ҳар томонга кишилар жўнатилди. Изловчилар Қайснинг Лайли уйи томон кетган изини топишгач, ўша ёққа равона бўлдилар; у из ҳай қабиласи чегарасига етгач, қабиладан яна икки из чиқиб қўшилганини кўрдилар. Уччови из бирлашгач, қум устида иккитасининг узалиб ётганлигидан қумда нишона қолган эди. Бундан воқиф бўлган қидирувчилар: «Бу икки беҳуш бўлганлар кимлар эканлар?» деган ўйга толдилар. Бу келган изларнинг қайтиши эса, мастрарнинг қадами сингари чаламичакки эди. Бири девона каби тез биёбон томон судралиб, қайтиб кетган бўлса, бири паридек ёки тунда қуёш ботгандек ғойиб бўлган эди. Қабиладан чиққан яна бир из қабила томонга қайтган. Қидирувчилар учун бу аҳвол, уларнинг нима қилишлари кераклигига далолат берарди. Улар қумда судралиб кетган излар орқасидан йўл олдилар. Қайсни қумлар орасида кўмилган ҳолда топдилар; шамол учирган қумлар унинг жисмини кўмиб юборган экан. У бошдан оёғигача тупроққа кўмилганидан, у билан ўликнинг фарқи қолмаган эди. Унинг қум ичига кўмилган ва азобланган жисми тупроқ каби жонсиз эди. Қидирувчи кишилар унинг қошида ёқала-рини чок қилиб зор-зор йиглардилар. Улар гүё Қайсни бирорлар яширинча ўлдириб кўмганмикинлар, деб ўйладилар. Уни тортиб олаётуб, тупроқларни очиб бошларига сочар эканлар, бир дард асири унинг гоҳ-гоҳ нафас олишини сезиб қолди. Шукур қилиб яна шод бўлдилар, девона кўнгилларини обод қилдилар. Қайсни бир кишининг устига тангиб, қабила сари жадал жўнадилар.

Унинг бундай аҳволини кўрган ота йиглади ва маъюслиги кучайди. Онаси ҳам фифонлар тортиб, кўзидан юзларига қонлар оқизди. Қайс ҳушига келгач, турди-да, бошини қуийи солиб жим ўтирди. Ўз ҳолида яхшилик йўқлигини билар, эл эса ҳар ёқдан уни маломат қилар эди.

Бири: «Бу сенга нима ҳавас?» деса, яна бири: «Ҳавас бўлса, шунчаси ҳам басдир-да», деярди. Ҳар томондан айтилган насиҳатлар унга қон тўкувчи найзадек ботарди. Насиҳат тариқасида айтилган қаттиқ сўзлар девонанинг бошига тошдек ёғиларди. Кўзга кўринмасдан отилган бу тошлар, унинг танинингина эмас, ҳатто суякларини ҳам майдаларди. Баъзилар: «Қулоғига панду насиҳат қилиш керак» десалар, баъзилар: «Оёғига кишан солиш керак», дердилар.

Уша куни шундай сўзлар билан кеч бўлди, лекин паришон йигитнинг бу сўзлардан хабари ҳам йўқ эди. На унинг руҳига қийналиш малол келар, на табиатига хурсандчилик ёқарди. Олам қўёши чироғини яширгач, тун ҳам чуқур ғамгинликка тушди. Эл уйқуга берилганида, унинг бошига тушган савдо, уйда кўнглини сиқа бошлади. Қабиладан тез югуриб чиқиб, дилбарининг уйига қараб чопди. Тонг отгач, яна у изловчи бечоралар фифонлар билан ҳар тарафга югурдилар. Уни яна дард ичидা, аввалгидан ортиқ зор ва ғамгин ҳолда топдилар. Ҳар кеча унинг шиори шу зайлда қочиш, ота-оналарининг иши уни қидириш бўлиб қолди. Бошига тушган балолар ҳаддан ошиб, бу можарони тузатиш қийинлашиб қолди. Ҳушёр одамларнинг девонага қилган насиҳатлари, девонанинг оқил кишиларга сўзлаганидек кўринар эди. Ҳар кун унинг давосини ахтарадилар, лекин унинг балоси ҳар лаҳза ошар эди. Тузатиш учун қанча сеҳр ва «куф-суф»лар ишлатсалар-да, у дам билан ўти баттар туташарди. Бу аҳволдан ота-онаси ва барча қариндош-уруглари ожиз әдилар. Насиҳатчилари ҳамиша ундан енгилар, кулфати эса, борган сари ортарди. Эл унинг дардига даво топишда кучсиз бўлса, унинг жунуни шу қадар зўраяди. Бу савдолар уни турли ҳолларга солганидан, болалар ҳам унинг кетидан тинмай югуришиб, уни Мажнун деб аташар, у ҳам ким нима деса жавоб қайтарарди. Одамлар жигари қон у бечорани кўрганда: «Мажнун келди, Мажнун келди», дердилар. Мажнун ўз отини ҳам унутган, балки от ўзи нима эканини ҳам билмасди. Лайлининг отидан бошқа ўз ва қавми кариндошларининг номи ҳам ёдига келмасди. Қайс «Лайли, Лайли», деб фарёд чекса, эл уни «Мажнундир, ушбу Мажнун», дердилар. Шу зайлда ҳар тонг ва шомда у Лайли уйи томон йўлга тушар, қабиласи атрофидан айланиб, кўксига тош уриб, ўзини жабрлар эди. Ҳар қадамда кўксига тош уриб, қадам ўрнига бошини қўярди. Ҳар айланишда: «Агар қоним тўкилса, қабиласига жоним фидо бўлсин», дерди. Шундан сўнг кўз ёшларини селдек оқизиб, саҳрога майл этар, ўзига манзур бўлган дилором қабиласидан аста-аста орқасига тисарилиб кетарди. Агар ўртага бирор тўсиқ кирса, дашт сари ўтирилиб кетарди.

Эй, ишиқ даштини ватан қилган! Йўлимдан адашдим, бир лаҳза воқиф бўл. Чарчадим, мадад қилиб қўлимдан тутгин ва менга йўл кўрсатиб карам қилгин.

XVI

*Мажнуннинг бехабар ошиқлигидан Лайлининг отаси хабардор бўлиб, Мажнуннинг отасига тил найзаси, балки найза тили билан захми забон*лар юборгани; бу ҳалокатли заҳарни ишиб, сингдириб Мажнуннинг отаси ўғлини кишсанга солгани*

Бу саҳифани безатувчи ўз афсонасини шундай баён этади:

Замона гардиши Мажнун ҳақидаги сўзни эл ичидা афсонага айлантириди. Унинг қилмишлари тилдан-тилга кўчиб, бутун Арабистонга ёйилиб кетди. Бу сирларни меҳрибон бирекки дўстлари Лайлининг отасига етказдилар: «Омир қабиласидаги бахти қаро Қайс бу қабилага келиб илм ўрганиб, илм-ҳунарга эга бўлиб, ҳам олим, мутафаккир бўлган эди. У ҳозир ақлдан озиб, гўё ҳамма нарсадан воз кечибди. Дашибу саҳроларда ҳамиша фифон тортиб кезиш унга одат бўлибди. Паришонлиги чексиз, девоналиги ҳам беҳад зўрайибди. Бироқ эл орасида шундай гап тарқалганки, унинг ақли ва ҳушига талон солган, бир ҳурсифат гўзал ишқининг ғами балосидан эмиш».

Лайлининг отаси бу сўзларни эшитгач, ҳайрат бармоқларини тишлаб, деди: «Ҳей, бечора! Уни кўп мақташар эдилар, гўё унга кўз тегиздилар. У қобил, ювош, назокатли, кўнгли очиқ бечорапарвар эди. Унинг ақли расолиги, ширин сўзлиги менга ҳам жуда маъқул тушган. Энди отасининг ҳоли нима кечиб, бечора онаси қандай азоблар тортаётган экан? Унинг бунчалик тобланиши қайси ўтдан ва кўнглидаги изтироби нимадан бўлсайкин? Қайси гулнинг иштиёқи уни бу ҳолга солиб, қайси сарвқомат унинг кўз ёшларини сувдек оқизган экан? Унинг бу ҳолига сабабчи ким ва унинг сигинадигани қайси қабила экан?»

Сўзловчи деди: «Эй, азиз муҳтарам! Модомики сен сўрар экансан, жавоб бериш ҳам бурчимиздир. Унинг ишқи ёмонми, яхшими, ҳар ҳолда, халқ бизнинг қабилага нисбат бермоқдадар. Элнинг гумони тўғри бўлса ажаб эмас, бунинг учун далил ҳам кўпdir. Бу даштда қабила жуда кўп, унинг кўнгли бирор тасига чопмайди. Лекин унинг ҳар тун ва саҳар бу қабилага келмасдан тинчи йўқ. Ҳам жонининг қибласи, ҳам жаҳони жони шу қабила бўлиб қолган. Бу қабила иффат ҳарами эди, бун-

* З а х м и з а б о н — тилдан (гапдан) етган озор.

га иффат насимидан бўлак нарса аралашмасди. Унинг атрофига пардалар тортилган бўлиб, унинг ўриш ва арқоғи поклик ва зуҳддан эди. Бироқ унинг қўрқмас оҳи етса кўк пардаларини ҳам парчалаб юборади. Унинг ҳамма фигонлари бехабарларча, сўзлари буткул сир очишликдан иборат. Таъбининг яхшилиги, назмининг равонлиги сенга ҳам маълумдир. Унинг шеърларида бир исм такрорланади, уни сенга айтиш учун бизнинг кучимиз етмайди. Биз билганимизни айтдик, буёғи сенинг ихтиёрингдадир».

Бу сўзларни эшитувчи, бу аҳволдан беҳузур бўлиб, қамиш ичидаги нозик қилтириқдек тўлғонди. Бошини қўйи солиб турди, бирор яхши-ёмон сўз айтмади. Бироз сабр этгач, шўр пешоналардек сўзлай бошлади. Уларга шундай деди:

— Омир қабиласининг бошлиғига шуни тездан бориб айт: Бундай сўзлар сенга ҳам, бизга ҳам номуносиб. Эл оғзида тарқалган бу ғалати ҳолларнинг сендан бўлиши қизиқ туюлди. Шундай ишнинг ошкора ҳолда эканини билсанг ҳам шу чоққача муроса қилиб келяпсан. Кимки жиннилик билан иш қилар экан, ундей одамни кишанлаш даркор! Шаън-шавкатимни ва араблар орасидаги молу давлатимни билмайсанми? Ўғлингни ҳам, сени ҳам нима қиласман десам — қиласман. Лекин сен буни билмасдан, нодонларча гафлатда қолибсан. Бу сўзларимни эшитгач, ўғлингни албатта қўлга олгин! Бундан кейингисини худо кўрсатмасин! Агар шундай ҳолат янга такрорланса, аввал унинг ишини тугатаман. Ўзингни ҳам қаҳримга учратиб, бутун авлодинг билан бу даштдан йўқотаман!

У шундай қаҳрли сўз ўқларини сочиб, элчиларни жўнатди. Элчилар унинг сўзларини Мажнуннинг отасига битталаб айтиб бердилар. Тингловчи унинг сўзларини англаб, жавоб қайтариш учун сўз тополмади. Бу ишдан унинг кўнгли ранжиди, бироқ чорасизликдан қабул қилди. Элчилар туриб йўлга тушганларида, бу қабилага нотинчлик тушди. Бутун қабила аҳли, Мажнуннинг эсини йиғиш учун қидириб, тог-тошга югурдилар: уни қароқчи талаган кишидек бир қўмлоқ ичидаги нола қилиб ётгани ҳолда топдилар. Унинг даштда қолишига йўл бермай, ўз ихтиёрига қўймасдан уйига келтирдилар. Мажнунни беҳуд ҳоли-ча занжирга солиб, бир уйга қамаб қўйдилар. Унинг бутун вужуди занжирбанд этилган, занжир ҳалқалари ҳам ўралган ва эгилган эдилар.

Эй, жунун занжирига боғланган зот, бу занжирда шод бўлгин. Кимки бу занжирда хурсанд бўлса, озодликка юз маротаба сазовор бўлади.

XVII

*Мажнуннинг фироқ чоҳида тандир ичи-
даги ўтдек ўрганиши; айрилиқ бандида
тузоққа тушган қушдек изтироби: та-
биг афсунидан телвалигининг туғёни ва
табиб парҳезидан иситмасининг галаёт-
ни; ўз бахтсизлигига тўккан аччиқ кўз
ёшлари ва бу ёшлардан комида аччиқ-
аччиқ хунобаси; кўнгил ўтидан темир
банди сув бўлгани ва сувдек саҳро то-
мон юриб кўз ёшларидан водийлар тўл-
гани*

Бу ҳалқага илиниб асир бўлган киши, сўз ипларининг чи-
гallariini шундай очади:

Занжирбанд этилган телба юз хил офат ва бахтсизликлар-
нинг асири бўлган эди. Бир неча кун уйда оёқлари боғлиқ ётди;
у гоҳ баланд, гоҳ секин фарёд чекарди. Кечакундуз на овқат
ер, на ухларди, гўё тузоққа тушган қушдек изтиробда эди. Кў-
зидан уйқу қочиб, ҳар киприги уйқуга қарши бир ханжар
бўлган эди. Кўз ёши бир лаҳза тўхтамаган кўзда қандай қи-
либ уйқу тура олсин! Кўнглида ҳушдан хабар йўқ, фақат ҳуш
эмас, унда кўнглидан ҳам асар йўқ эди. Бало ўтининг шидда-
тидан танида кўнгли ва кўнглида ҳуши қолмаганди. Лайли
савдосининг ўтидан чироги ёниб, унинг тутунлари эса, Маж-
нуннинг ҳушини ўраб олган эди. Бу тутунларнинг тобора зў-
райиши ундаги тақво ва ақл юзини ҳам қорайтиарди. Ақл
 билан тақво юкини ташиб кетгандан сўнг, унинг ўрнида тел-
балик шоҳи таҳт қуриб олди. Савдо ўтининг тутунлари қўшин
тортиб, ҳар дам ғавғо соларди. Шу тарзда унинг фикри ғав-
ғоларга тўлиб, кўнгли топталганди. Кўнгли ғам ханжари би-
лан яраланганина эмас, балки парча-парча бўлган эди. Унинг
ғам ва балолари ана шу зайлда ҳаддан ошганда отаси умид-
ворлик билан ўғлининг бошига ҳаким-табиб келтирди.

Бироқ у ҳаким на ишқ офатидан хабардор ва на кўнглида
ишқ алансининг учқунлари бор эди. Мажнуннинг изтироби-
ни англамаган табиб, тобора унга азоб берарди: гоҳ насиҳат-
омуз сўзлар билан унинг ўтини шу нафасдан яна оширап, гоҳ
Мажнунни шарбат ичишга даъват қилиб, унинг қон ютишини
oshirap эди. Мажнунга баҳра олсин учун берилган овқатлар
унга зарарли луқмалардай бўларди. Қонли кўз ёш оқизишини

ман этиб, унинг оҳ ва фигонларини яна ҳам орттирар эди. «Кўп фигон тортма!» деса, унинг қонли ёшлари борган сари ортарди. Табиб унинг жинини қувмоқчи бўлиб калтаклар, лекин ҳуркак вужуд кулги билан ҳолдан кетарди. Унинг кулгисидан хижолатда қолган табиб, йигисидан ҳам ташвишга тушарди. Унга тинимсиз жафолар берганидан табиб Мажнунга балодек кўринар эди. Бедард ҳаким Мажнуннинг қандай ўтда ёнаётгани ва қандай дардан жафо чекаётганини англамасди. Мажнун танини ишқ наизаларидан халос этаман, деб табиб унинг жисмини яна чок-чок этарди. Бу чокларни тикадиган меҳрибонлар, игна билан эмас, балки наиза билан тикардилар. Ўқ учларини топаман деб табиб бемор баданини ёрган бўлса, бу кишилар уни тикмоқ учун ўқ келтирадилар. Булар ўқ ахтариб, овора бўлардилар, ҳолбуки ғам ўтида ўқ эриб сув бўлган эди. У сувларнинг бариси унинг қўзидан оқар, у бечора ҳам шу кўз ёшларидек ўзидан кетиб бораради. У гоҳ ўзига келар, гоҳ ҳушидан кетар; қўзларидан эса, гоҳ сув, гоҳ қон оқарди. Неча вақтгача унинг аҳволи шу тарзда бўлиб, лаҳза сайин азоби ортарди.

Зулмат сочувчи фалак бир кеча кун варагини қорайтиради. Бу тун эмас, балки қора бало, кундуз хазинасини босиб ёттан аждаҳодир. Ғам дўзахининг қоп-қора тутун айрилиқ оловхонасининг қуруми эди. Бу тутундан малак қанотлари қорайиб, кеча узунлигидан осмон ҳам қартайган эди. Шу узун кеча тонг булбулининг тумшуғини боғлар, кўршапалакларнинг ҳам қанотларини сустлантиради. Бу кеча аввалини унуттандек, охирини ҳам соғинмасди. Бу кеча эмас, балки ошиқ ва дардманларни азоблаб ўлдирувчи жаллоддир. Севги билан телбаланган ҳар бир шўрликка бу кеча бир кўргилик жаҳони эди. Бу кеча бедардларни маст уйқуга солиб, дард аҳлининг ишини хароб қилганди. Бу кечада, дардли маҳзун, яъни ҳижрон тунига асир тушган Мажнун, ўз аҳволини ўйлади, ғам чақини тегиб унинг вужудини кул қилди. Ўз ҳолига йифлаб, ҳар бир дардини шундай нола билан тасвирлади:

«Борлигим бўлмаса нима бўларди ёки вужудим йўқ бўлиб кетса бўлмасми? Мен хастани яратиб, балоларга дучор этишдан қисмат маҳсади нима әкан? Жисмимга руҳ бериб қўйибди, шуни бермаса нима қиласади? Жисмимга жон кирган чоқ, туғилган вақтдаёқ кошки ўлсам эди. Ўлганимни кўришгач, танимни ит олдига ташлаб, жонимни бу машақатлардан халос этиб, бу балолардан қутқарсалар нима бўларди? Танимни итлар талашиб, қонимни ялашсалар эди. Қон ва томирларимдан баҳра олиб, суякларимни чайнаб, ушатсалар эди. Бу

таомнинг устида улишиб ва уриш-талаш билан есалар эди. Балки бу овқатга ит ҳам ҳайф, уни ҳам балога дучор этишнинг нима кераги бор? Ит танимни тишлаганда, шу ондаёқ қутуриб, телба бўлар, жаҳонга ва юзларча хаста нотавонларга ўт солар. У вақт ҳалқ, ит нафасининг чироғини қорайтириб, уни ҳам тутиб ўлдиради. Энг яхшиси мени тўполон бошлаб, ўтга ташлаб куйдириш эди. У ўт ичидаги таним буралиб, қийналиб куйса яхши бўларди. Ўтдан нишона бўлиб қолган кулни ҳам кўкка совурсалар эди. У куллар кўкка ҳам касофат етказиб, балки у ерда ҳам бирор бахтсизлик рўй берарди. Энди эса, у ҳам бўлмади, бу ҳам. Аттанг, вужудим тириклик сари йўл солди. Ишқ азобини тортмасдан бурун, икки кўзим кошки кўр бўлса эди. Ўз бечоралигимни изҳор қилиб, бир парча нон учун тиланчилик қиласайдим. Кишиларнинг қўлларига муҳтоҷ бўлиб, эшикма-эшик юрсам эди. Бир луқмани деб мен бало чексам, яна бир луқмаҳўр ҳассамни тутиб мени етаклаб юрса эди. Бу ҳалокат ҳодисалари ичидаги, етакчисиз бир қопқоронгу чуқурга йиқилганимда, шундай машаққат ва балоларни тортардиму бу хилда ишқ аламларига мубтало бўлмасдим. Кўзим туфайли ўнчага қайғу ва юзларча дарду балоларга учрадим. Мотам кийимидағи шу икки кўз бошимга битган икки қон тўкувчи бало бўлмагандаги, бирорвга қарапидим ва кишини манзур қиласидим?! Назар ишига мағлуб бўлиб, бирорвга кўнгил берган бўларидим? Хуллас, у жон офати, йўқ, жоннинг ҳам эмас, бутун жаҳоннинг балоси бўлди. Агар ел унинг юзидағи ниқобини очиб, офтобдек жамолини кўрсатса эди, бир ярқирашидан бутун жаҳон, балки тўққиз осмонга ўт тушар, у ўт ичидаги қўёш бир патирдек, ойни айтаб ҳам ўтирамайман, чунки у куйған кулчадек бўлиб қоларди. Мен дунёда бир заиф хасман, жисман шу хасчалик ҳам эмасман. Кўз кўриб ҳавас йигди ва ўша ўтга бу хасни ўлжа қилди. Бунчалик шафқатсиз ишқ, яъни минг яшин — унинг қаршисида хас-ҳашакдир. Мен мубталони ишқ зўрлаб, катта-катта балоларга йўлиқтиради. У ўтга тушгач, унга хос бўлолмагандек ўртаниш билан ҳам холос бўлолмайди. Унга ҳижрон ўти насиб бўлиб, куйиб-ёниши минг чандон ортиқ бўлади. Шу айрилиқ ўтида ҳам телбаликка солиб, хилма-хил азоб-уқубатларга гирифтор этади. Бу балолар билан қониқмай, яна кишини занжирбанд қилиб зинданга ҳам солади. Ҳуш ва ақлини йўқотгач, қизиқки, бошига табиб ҳам келтиради. Юз хил азоб-уқубат бир ёқда, бедард табибининг дарди бир ёқда. Ҳаким жонни яралашга киришади, насиҳат қилувчилар эса, бу ярага туз сепади. Юз ўнчага умрни кемирувчи гам бўлса ҳам майли, тоғ-даштларда кезувчи бўлсайдим. Гоҳ тоғларда нола қилиб, гоҳ чўлу биё-

бонларга югурсам эди. Шу вақтдагина кўнгилни бир лаҳза ғамлардан бўшатиш эҳтимоли бўлар эди. Агар бир уй ўтга жой бўлиб, эшик-туйнуклари беркитилса, у уй албатта ёрилади, балки ҳар тарафдан тешилади. Ўт ҳар тарафини тешиб кетгач, у уй албатта қулашга юз тутар. Қайғу кўнглим уйини зиндан этди, вужуд уйи ундан баттар қоронги зинданdir. Эшик-туйнуклари маҳкам парчинланган ўша зинданда таним маҳбусидир. Ичкари уйда гуссадан ўртанишлар, балки айрилиқ ўтининг ёлқинлари бўларкан, уйларнинг ёрилишидан, бир-бири устига ииқилишидан ажабланмаса ҳам бўлади. У ўтнинг тобига бу икки-уч уй нима деган гап, унга ети-саккиз юксак кўк ҳам бардош беролмайди. У ўтнинг ҳарорати билан ларзага тушган уйларнинг ҳар бири юзларча дарз кетади.

Э воҳ, бу ўтдан тобу тоқатим қолмади, йўқ-йўқ, унинг ичидаги изтиробларим ҳам ошиб кетди. Кулбамда ва жойимда шу ўт, ҳатто жону танимда ҳам шу ўтнинг ўзи. Одатда бирорни ўт ичига ташлаганда оёғидан кишинини оладилар. Туар жойим кишан билан ўтда бўлди, менинг гуноҳим шундай катта эканми? Ўти-ку унча эмас, унинг қора тутуни, балки мудҳиши қорага бўялган шоми, жонимга қора бало бўлиб, кўнглимни шу балоларга дучор этди. Мени тун эмас қора босган ёки ғам тоғининг балолари босган. Агар у оғир юк танимни босмаган бўлса, нега бундай беҳаракат бўлиб қолдим? Э жон қуши хасдек жисимидан учдими? Қафасини ташлаб ватан йўлини олдими?»

Мажнуннинг қимиirlашга ҳам ихтиёри йўқ эди: ўлган тан харакатсиз бўлади. Унинг жисмини ҳар хил гумонлар тинчитган бўлса-да, лекин унинг иши ҳадеб толпинмоқ эди. Жисми гоятда заиф, оёқ-қўли гоятда кучсизланган эди. Оёқ-қўлларини ёшиб жон ишига ҳаракат келтириб чиранганда, боғланган ёғоч синиб, оёқларидан темир кишанлар чиқиб кетди. Бу қийноқлардан ором олиб, ул гариб бечора оёғини қимиirlатар экан, оёғи, икки қўлини ва бўйнининг ҳам бўчалганини кўргач, юз шукурлар билан, кўзларидан ёшлар тўкиб юзини ерга суртди. Шундан сўнг у оҳисталик билан туриб эшикни очди-да, кучсиз оёғи етганича узоқларга қочиб кетди. Ниҳоят бир даштига етдики, у ерга бориши гумондан ҳам йироқ эди.

Эй, замона занжирига боғланниб шод бўлган, ўзлигинг оғир кишан туюлган киши! Ўзлигиндан ўзингни қутқаргин, токи фано даштига шодлик билан киргайсан.

XVIII

Лайлининг хиромон сарви гулишандан уйи сарига юрганда Ибн Салом кўнгли қуши у сарв томон парвоз қилгани, у парвозда баҳор шабадаси гул япрогини тўккандек танга сочиб умид ниҳолидан мақсад гули очилгани ва ўша шабада титратишидан гул юзли сарв соядек шикаст тупрогига йиқилгани

Бу сўз инжуларини сочувчи ўз ноёб фикрини шундай баён қиласди:

Гул танли суманбар шом пайтида боғдан уйи сари қайтар экан, ўз чеҳрасидан оламга гул очиб, юздаги тер билан ерга гулоб сочиб, шу гул ва гулобни намойиш этар, ишқ ўтидан юзлари жуда бошқача бўлиб кетган эди. Ҳар бир қадам босишида юзларча латофат, йўқ-йўқ, балки жаҳонга офат сочар эди. У сарв теласида очилган гул ёки гул кўтариб келаётган сарвнинг ўзгинаси эди. Жамоли таъриф қилингандан юз мартаба ортиқ бўлса, сифатлашга сазовор бўлган юз мингча назокати бор эди. Лекин ишқ ғамидан паришон париваш уйга қайтар чоқда, араб элидаги бир бадавлат ёш йигит уни йўлда кўриб қолди. Зотида ҳеч қандай нуқсони йўқ, соғлом бу кишини баҳт Ибн Салом деб атаган эди. Унинг отлари ҳам беҳисоб, қўй сурувлари ҳам чексиз эди. Саҳрони тоғдек туялари тутиб кетган, беҳисоб мол-давлат эгаси бўлиб, ҳар қандай мушкул ишни осонлик билан ҳал этар эди. Фам тунида йўл йўқотган киши тангада йўлчи юлдуз кўрса, унга не ғам. Ибн Салом Лайлини кўргач, хаста жони шавқ ўтига тушди. У Лайлига етишмоқ ҳаёлига ва бу ишнинг чорасига тездан киришди. Дарҳол қабиласига қайтиб бориб, бутун мол-давлатини йигишира бошлади. Юз хил қимматбаҳо ҳадя ва нодир тухфаларни тайёрлаб, бир неча сўзамол, шайхсимон оқил кишиларни атрофига тўплаб, бу ҳақдаги барча орзуларини бирин-бирин сўзлаб берди. Ибн Салом ҳам мақсадини айтиб бўлди, йигилган кишилар унинг ҳамма сўзини маъқулладилар. Совчилар бутун хазина ва тортиқларини юклаб, Лайли уйи томон равона бўлдилар. Лайлининг отаси эса, бу хушхабарни эшиттач, жуда хурсанд бўлди. У Ибн Саломни илгари ҳам барчадан яхшироқ танир эди. У — оқил ва фаросатли йигит эканини, ҳисобсиз мол ва ашёга эгалигини; Бани асад қабиласига бошлиқ бўлиб, моли Бани асад қабиласига нисбатан юз баравар кўплигини биларди. Бундай баҳтга эришгани учун у Ибн Салом

меҳмонларини катта қизғинлик билан қаршилади. Меҳмонлар уни бу қадар иссиқ ва очиқ юз билан кўргач, тортинасадан сўзлай бошладилар. Бутун қимматли тортиқларини беришгач, ундан сўнг бирин-кетин сўзга тушдилар. Ҳалимлик билан оёққа туриб, балоғат ва фасоҳат билан маъноли сўзлар сўзладилар. Лойиқ таърифларни изҳор этишгач, ўз муддаоларини билдиридилар. Мақсадларини билдиришгач, бошларини қуий солиб жавоб кутдилар. Тингловчи уларнинг муддаоларини англаб шундай деди:

— Тангри мадад берсин. Агар у менга ўғил бўлиш тилагида экан, мен ҳам унинг отаси бўлайин. Менинг дурим унинг бошидаги тожнинг зебу зийнати бўлсин. Иншооллоҳ мартабаси ҳам баланд бўлғусидир. Лекин унинг бир оз сабр қилиши ҳам керак. Чунки гулимнинг шохи синиқроқ. Ҳали бу умид ниҳоли ёш, яъни бу қуёшим ҳали ҳилолдир. Кўнглидан дардлари кетиб, соғайсин ва ҳам бўйга етсин. Ана ўшандан кейин бу азиз фарзанд қандай орзу-ҳавасда бўлса, келсин-да, висол жомидан ичиб, сарв бўлиб гул билан қовушсин.

Барчалари умидворлик билан хурсанд бўлишиб, уйларига қараб жўнадилар.

Лайли гулшандаги гуллар ичида товланиб, боғнинг ҳар тарафини тез-тез қезар, қон тўкувчи ишқ эса, гуллар очар эди. Шу вақт гулларнинг ҳар бири роз бошлади, уларнинг ҳар биридан қон ҳиди анқирди. Яъни, улар раҳмсиз тифни қиндан сугуриб унинг кўнглини чок-чок этдилар. Гунчадек Лайли кўнгли пора-пора бўлгач, ишқ ичида унга шундай гуллар очилди. Йўқ, йўқ, балки чамандаги дард ғунчаси чок бўларкан, олов ранг гуллар очилди. Ишқ бу қизил гулинин очгач, гул барглари каби учқунлар сочди. Бу ўт билан Лайлиниң жони, балки ожиз тани ҳам қуишига тушди. Ишқ ўтида қуиши ет-масмидики, бунинг устига ҳажр ғаминиң босқинчиси ҳам келиб етди. Жаннатта ўхшаган бўстонда фариштасийм ошиқ — кўнгли паришон Лайли, кўзига уйқу келмай, иштаҳаси бўғилиб, шу томон йўл олган эди. Борган сари мадорсизлануб, ҳар нафаасда noctorlаниб борар эди. Бу можаро уни ҳам ҳамиша машгул қиласар, сайд ва томошада экан, ҳар қадамда малоли ошиб кетар эди. Унинг танига иситма қасд қилиб келар, хасталик унга ҳамроҳ бўларди. Ўзларини дўст, кўмакдош ҳисоблаб келганлар унинг қуишига ишонардилар. Лекин уларнинг баъзилари унда яширин бир сир борлигини билар эдилар.

Дояси билан бир неча сирдошлари унинг кўнглини овутар эдилар: Лайли ранжидан ғамгин бўлиб, дардига кўнгил берардилар. У жигарига қуиған доя, ҳам бир неча ғамхўр маҳрам-

ларига агар Ибн Саломнинг совчи юборганини бу ҳур фаҳмлаб қолса, кўнгли ранжир, ҳам аҳволи баттар оғирлашуви, ҳам дарди зўрайиши маълум эди. Бу аҳволни гул юзли Лайли бил-масин дейишиб, ундан беҳад яширап эдилар. Қиз ишқ ўтидан ташвишли, ишқ ўти унинг ичидаганаланар эди.

Кунлардан бир кун бир неча ошна ва қариндош-уруғлари Лайлини кўришга, яна тўғрироғи, унинг ғам-кулфатларини ошириш учун келган эдилар. Жирканч, ақли паст, эсини еган, бемаъни, лақма бир кампир кўнгилсиз Лайлининг кўнглини хуш қиласман, деб сўзга тушди. Унинг сўзлари сўз эмас, жаллод тигига ўхшар эди. У кампир, яширин тутилган ғамни ошкор этиб, орага бу можарони солди:

— Эй соchlари юзига анбар сочган суманбар қиз, ғам емагин! Эрта-индин баданларинг согайиб, саломатликка юз тутгач, баҳтинг очилади ва бутун муродинг ҳосил бўлади. Ўзинг дунёда тенгсиз бўлганингдек, ёрликка ҳам жуда кўнгилга ёқадиган киши тўғри келди. Ой юзиллар орасида сенинг баҳтинг ҳақида сўз юрибди; улар иқболингни орзу қиласидилар. Лекин уларнинг орзуси рўёбга чиқмайди, чунки баҳт ҳаракат билангина қўлга кирмайди. Тангрига шукрлар бўлсинки, баҳтинг очилиб, шундай гаройиб ишлар бўлди.

У кампир юқоридаги достонни айтганидек, Ибн Саломнинг отини ва сифатларини таърифлаб берди. Бу сўзларни эшитган Лайли нима ишлар бўлаётганини англаб олди. Бундай мусибатлар Лайли кўнглини бузиб, уни беҳуш қилиб, ўзидан кеткизиб қўйди.

Эй, ўзи кўринмай зоҳир бўлган, кўзга кўринмасдан кўнглида ҳозир бўлган! Кўнгил чироғини ёқар экансан, менинг кўзларим олдида ҳам жилва қилгин.

XIX

У мушкин оҳу овига бани Асад аҳлиниг қасди маълум бўлиб қуёшнинг олтин жайрони гарб авлоқ гўшиасида саргайиб, титраб шафақ тўйкандек у оҳунинг хилват уйда тупроқ ва қон аро изтироб чеккани; фалак золидек онаси у ишдан воқиғ бўлиб, унинг ҳолига дод-фарёд соглани

Сўз булогини қазган киши, бу чашмадан чиққан сувни шундай таради:

Олий мартабали сарв дард зўридан соядек ётар эди. У ҳушига келгач, ўзини хафа қилган ўша сўзларни яна эслади. Хафалиги дам-бадам ортар, кўнглини ундан бўшатолмас эди. Бу кулфатлар ичida ўзини ҳалок бўлишини ва умр тўнининг чок бўлиши аниқлигини кўриб, доясига қараб шикоят қилди; юзларча ожизлик билан сўз бошлади:

— Эй аҳволим чорагари, сирларим сенга маълумдир. Сендан ҳеч сирни яширганим йўқ, бутун дардимдан хабардорсан. Шундай бир сўз эшигдимки, унинг шуъласидан димогим куймоқда. Афтидан сен ҳам буни биласану, лекин мендан яширасан. Агар сен уни даф эта олганингда, ҳаракат қилган бўлур эдинг. Агар даф этишга қодир бўлмасанг, у чоқ сени кечиришим аниқ. Бироқ сендан илтимосим шуки, бир нафас эшик олдида пойлаб турсанг. Чунки кўнглим ғамдан бениҳоя ўксиган, гавғолардан ҳам жуда безган. Бир лаҳзагина эл менинг олдимга кирмаса-ю, мен ўз дардларимни тортсам.

Доя қўлинин кўз устига қўйиб, таъзим қилиб чиқди-да, ёшикни занжирлади. У одамларга: «Уй яқинига келманг, ой кўзига уйқу келди», деди. Лайли уйни кишилардан холи кўшиб, ёқасини чок-чок этиб, фарёд кўтарди. Гоҳ баҳтининг кўзига, гоҳ бошига тупроқ соҷди. Кўксини уриб яралади, тирноти билан тирнаб моматалоқ қилди. Кўз ёш қатраларини сочавериб, танининг тупрогига ғам уруғларини экди. Қонли ёшлар тўкиб, юзининг саҳифаларидан боблар очди. Бало китобининг ҳар бобида ғам дарсининг ҳисоби ёзилди. Ҳасрат чапакларини уриб, жон ўртовчи фифонлар чекарди. Унинг чеккан фифонидан тобора иқбол ва шодлик қушлари ҳурка бошлар эдилар. Гўё қуёш чашмасига нилуфар гулини эккандек, юзига шапалоқ уриб кўқартирап эди: у юзга ёт кишининг маҳрам бўлиши сезилганидан унга мотам либосини кийдиради.

«Эй, золим фалак! Менинг ҳолимга шикаст етказишдан муродинг нима? Сенинг қўл остингдаги ёш жонимга шикаст устига шикаст етказиб нима қилмоқчисан? Мендай ёш новданни осонгина синдиридинг, қаддимни тупроқ билан тенг қилдинг. Яна жафо тешасини тортиб, уни юз парча қилганинг нимаси?! Оғир жафони раво кўриб, зулминг билан қаддимни банд-бандидан айирдинг-ку. Уни майда-майдага қилиб, бало ўтхонасига солмогинг яна нимаси?! Мен ёш, янги ниҳол эдим, шохимда эса тиканлар, атрофимда хаслар ҳам йўқ эди. Яйраган шохларимда ва бошларим устида топ-тоза янги гуллар очила бошлаган; ҳали ниҳолим мева кўрмаган; баргларимга оғат ели тегмаган эди. Мен кимнинг кўксига тикан урибман, қайси кўкда бош кўтардим экан? Ишқ ели билан уни букиб, даҳшатли қуюнинг билан уни яралаб, вужудини пора-пора қилиб

ташладинг. Уни титиб ташладингу, лекин бундан хурсанд ҳам бўлмадинг. Куйдириш учун ҳар бир парчасини олдингда, уларни ғам дўзахига ташладинг. У хабар менга дўзах бўлди, жонимга эса ўтидан учқунлар сочилиди. Йўқ, йўқ, у учқун эмас, офат яшинидир. Унга бутун олам гарқ бўлади. Агар бу офат олови оламга туташса, унинг тутунлари фалакдан ҳам ошса, ундан менга бир учқун тесса, кул бўлишдан бошқа чора йўқ...

Айниқса, бу нотавонга туташиб, ундан жаҳонга учқунлар тушиб, ҳам дунёни оловга қориширади, ҳам тутунлари кўкка чўзилади. Ўша ўт орасида мен қучсиз ғамгин ҳам эмас, ҳашакка ўхшаган; ҳашак ҳам эмас, балки жонини ҳам кўтаришга мажоли қолмаган бир ожиз чумолиман. Шу чумолининг бошига бундай дўзах азоби тушса, эвоҳ, қандай тоқат қила олар экан? Ўша дўзахга тушган чўлоқ чумоли — мен мубталоман. Эй фалак, бир чумоли нима ҳам қила оларди? Нима қилишни билармиди? Унинг қасдига жадаллаб, мингларча яшинларинг билан қасос олмоқчисан. Мен бу зайл бало тутқини, юз хил жафога мубталоман. У зор, ожиз, чорасиз Қайс менинг асиримдир. Ажабо, менинг ғамирдан нозик қилтириқ тани қандоқ экан? Ишқим ўтида ёнармикан, ҳажрим ғамига қандай чидар экан? Шавқим унинг оҳини чиқарармикан, тортган оҳи жисмини сомондек учирармикан? Сочимнинг ғамида ишқ кўргилигини тортиб, ҳар замон телбалиги қандай авж оларкин? Қоматимни деб наво тузганида, фифони қай ҳолда юксаларкин? Жамолимни тилаб йиғлаганида, кўзларидан гул япроқларидек ёш тўкармикан? Гажакларимни эслаб, буралиб қайрилса, жисмига қандай тоблар тушаркин... Нозу карашмаларимни ўйлаганда, кўксига ниш санчилармикан? Лабларимни деб кўз ёшларини тўйканда, ўзи ҳам сувдек эриб кетармикан? Менинг оғзим ҳақида сўзлагандан, йўқлик* дунёсида йўқолармикан? Хаёли белимга тушганида, вужудининг омон қолиш эҳтимоли бормикан? Эгма қошим ғамида оҳ-воҳ тортганида қомати ёйдек эгилармикан? Фикри ёди киприклиримда бўлганида, кўнгли юзлаб тиканлар орасида қолиб, ҳоли не кечар экан? Кўзларим можаросида унинг кўзига на оқ, на қора кўринарди. Дудоҳларим унинг кўз ёшларини Жайҳун қилса, кўзидан қизил майдек ёшлар оқармикан? Холим ғамини еб тўярмикан, аламидан ўз кўз қорачигини ўярмикан?

* Классик адабиётда маъшуқа оғзини кичрайтиб тасвирлаш ҳодисаси кучлидир. Оғизни пистага, мим ҳарфига, нуқтага ўхшатиш билан чекланмай, гоҳо оғзи йўқ эди деб юборар эдилар. Бу ерда йўқликка ишорадан мақсад оғиз кичикилигига ишорадир. (B. P.)

Қирговул юришларимни ўйлаб, тузогимга тушармикан? Ҳар кун юзларимни истаб, ҳар тун сочларимни йўқлармикан? Менинг дарду аламимни ўзига одат қилдимикан ё ҳажримдан харобмикан? Бунчалик ғаму гуссалар устига бу воқеани ҳам эшилса нима қилас экан? Бу номуборак ишнинг бўлиши эҳтимолдан узоқ эмас. Бутун дунё аҳли бир томон бўлсалар ҳам, бу ишга эриша олмайдилар! Лекин у машақватлар дўсти: «Бу ишга у рози бўлган», деб ўйлади. Ҳамма ғамга чидасам ҳам, бу ғамга ҳеч тоқат қилолмайман. Фарёдки, ўладиган ҳолатда ғамим бор, шунинг учун ўзимга мотам тутсам ажабланарли эмас.

Хилватда унинг иши шундай фарёллардан иборат эди, онаси эса, эшикда пайт пойлаб турарди. Қизини бу баҳтсизликка учраганини билган она, ғамдан изтиробга тушди. Она кечакундуз шу ой парчасининг ўй-хаёли билан бўлиб, дард ва ғамига чора излар эди.

Эй чорагар! Бу ишдан қўлингни торт, менинг дардимга чора излаш мушкул. Чора топиш умидидан чекин, билгинки, бечоралик бизга чорадир!

XX

Мажнуннинг отаси уни ишқ биёбонидан келтириб, Каъба зиёратига олиб боргани ва у мунохот баҳонаси билан кўнглидаги яраларни ёргани ва дуо қилмоқ оҳанги билан кўнглидаги маҳфий мақсадини тилидан чиқаргани ва Арафот^{} аҳлидан арасот^{**} кўтаргани*

Маънолар нақлгари бу нафис сўзларни шундай баён қиласди:

Уша кеча Мажнун ўз уйидан ҳуркандек қочиб кетган эди. Тонг отганда, бутун қариндошлар унинг уйда йўқлигини билib, яна дод-фарёд кўтардилар. Улар яёву отлиқ ҳар томонни қидириб, уни тополмай, хижолат чекиб қайтдилар. Ғам отасининг қаддини яна букиб, онасини мунгли ва беҳол қилиб қўйди. Ҳар иккала шўрлик турли ўйларга бордилар, лекин ўз гумонларини ўzlари рад қилдилар. Кўп гап-сўздан кейин, охири

* Макка шаҳри атрофидаги тонг номи.

** Ғавғо, тўполон, қиёмат.

шундай қарорга келдилар: кўрган чоралари натижа бермагач, умидни узиб, охир тангригагина ёлвориб, ҳар иккалалари ҳам йўқолган ўғилнинг топилишини ҳақдан тилаб, муҳтож кишиларни хушнуд қилиб, дард аҳлининг эса, кўнглини тинчтиб, тарки дунё қилган сўфилардан, бечоралардан Мажнун учун дуолар олсалар, бу икки бечорага худонинг раҳми келиб, уни топиб ота-онасига бергай...

Иттифоқо, ҳаж мавсуми эди, Каъбага бориш тараддудини кўрдилар. Бир неча кун ўзлари ва бегоналар хўб қидириб, ниҳоят Мажнунни топиб келтирдилар. Унга ҳажга бориш ниятини билдиришди; унинг кўнглига ҳам бу маъқул эди. Худди ўтни манқалга согландек, уни кажава ичига ўтиргиздилар. Ҳамма фурсатни ғанимат билиб, Каъбага қараб равона бўлдилар. Каъбага, йўқ, йўқ, Каъбага эмас, арши аъзамга яқинлашдилар. Каъба ер устида фалакдан нишона берар ёки тупроқ устидаги осмондай эди. Каъбанинг шарофатидан ер осмонга, у ер осмоннинг устидаги аршга ўхшарди. Ер юзининг барча улуғ ва кичик одамлари бу манзилга келиб, зиёрат қилдилар. Ёки у Каъба кўринишида, кўнглида тангридан бошқа ҳеч кими бўлмаган сўғига ўхшарди. Ёки ўша сўфининг чопон кийиб, ерда чўккаласб ўтирганига ўхшарди. Ўрнида қимирламай туриши қутб юлдузи, атрофидаги майдо тошлар майдо юлдузлардир. Бу қутб юлдузи эмас, балки зўр авлиёдирки, кўп авлиёлар киприклари билан унинг эшигини супурганлар. Ҳеч ким у ердан қийинчилик хашагини топмайди, чунки уларни фаришталар қанотининг шамоли учирив кетган. Фаришталар, унинг тепасида худди кечалари чарх урган кўршалалаклардек учиб юрадилар. Унинг пойдевори сўздай маҳкам, кўзга ўхшаб қора мотам либоси кийган. Унинг зиёрати элга подшоҳлик сояси каби, атрофи эса, фалакнинг саждагоҳидир.

Каъбанинг бундай салобатини кўриб, Мажнуннинг кўнглига ваҳималар тушди. Ишқ уни ташвишга солиб, ҳавас-шавқ кўнглига ўт ёқди. Кўз ёшларини ёғдириб, оҳ уриб чақиндек сакради. У Каъбанинг теварагида, ер атрофида фалак айлангандек айланана бошлади. Юзи билан тошларга зарҳал бериб, ҳалқа-ҳалқа кўз ёшларини оқизди; юзи билан у эшикни супурса, қўллари билан эшик ҳалқасини маҳкам ушлади. Ҳамма бармоқлари букилиб, бир ҳалқага неча-нечча панжа тушгандек бўлди. Мурод ҳалқасининг ичига муҳаббат бармоқлари маҳкам ёпишди. Панжалари ўша ҳалқага осилганча, фарёд қила бошлади. У шундай фарёд кўтардики, унинг тутуни билан ғам лашкари тўпланди. Мажнун бу тутун билан фалак либосини ҳам Каъба тунидек қорайтириб юборди. У мотам тут-

ган кишидек фарёд кўтариб, Каъбани азахонага айлантириди. Ундан сўнг, шундай деди:

— Эй, ҳукмига ҳоким бўлган доно ва қудратли ҳаким! Эй ишқ ўтини жаҳон куйдирувчи қилган, ишқ ўти билан мендек бечоранинг ҳам жонини куйдирган! Эй, у ўтни хирмонимга, хирмон ҳам эмас, балки жоним ва танимга урган! Эй, ишқни кимсага ҳамроҳ қилиб, айрилиқ ўтини лойиқ кўрган! Эй, бирони ишққа кишанлаб, панд-насиҳатларни унга аччиқ қилган! Эй, ишқ билан унинг донгини чиқариб, болалар тошбурунига қолдирган! Эй, бирони пари чеҳра этиб, уни девонасига бемеҳр қилган! Эй, жонга ишқ оловини солиб, кўнгил садафига ишқ гавҳарини тўлдирган! Мен ишқ дардидан шикаст еб, бугун қўл-оёғи боғланган бир асир бўлиб келдим. Танимнинг ҳар бир томири ишққа банд, жонимнинг иплари эса, ишқнинг каманди бўлибди. Баданимдаги асаб ва томирларнинг бўгинлари ишқ чилвирларининг тугунлариdir. Вужудимдаги чексиз доғлар ишқ ўтлари белгилариidir. Унинг ўти билан жоним ва суякларимнинг илклари тўлгандир.

Бу ишқ ўтини баён қилиш билан, ҳалокат келтирувчи гами ни ҳам аён этаман. Ишқ ғамидан қутқариб, мени шодлантири, демайман! Аксинча, бу ўтни ҳар дам кўпайтирангу сира кам қилмасанг, дейман! Кўзимга ишқ тўтиёсини сур, юрагимга ишқ кимиёсини* ур! Кўнглим жилвагоҳи ишқ саҳнаси бўлсин, ишқ насимидан жонимни яйрат! Ишқ бўйидан нафасими ни хушбўй эт, ишқ ўтидан юзимга ранг бер! «Ишқ» сўзининг «айн» ҳарфини** бўйнимга ҳалқа ва «шин»ини кўнглимга шавқ шуъласи деб кирит. «Қоф»ини менга ғам тоги эт-да, ғамини эса кўнглимга тоф-тоф қилиб орт. Уч нуқтасини учқун айлаб, икки нуқтасини қаттиқ тошга айлантири. У шуълага ҳам учқун керак бўлгани каби, бу ғам тогига ҳам тош парчалари лозим. Ўша учқунларни ҳам жонимга сол, тош парчалирини эса, бошимга ёғдир!

Эл менга юз шунча азоб берса ҳам қайтарма, минг шунча азобларга мени қондирма! Кўнглимни ғам билан тўқ этгил, раббим; ишқ ичидан мени йўқ этгил, раббим!

Менга «Ишқни унутиб, Лайли ғамидан узоқлаш», деб ҳам айтадилар. Ажабо, бу нима деган сўз, тангри у кишиларни афв қилсин. Ё раббим, бу лаззатли бодани талабим жомига кўпроқ қўй! Вафо майдидан менга қўша-қўша тут, токи ҳушимга ҳаргиз келмайин! Лайлининг ишқини танимда жон этиб, Лайлига бўлган ўтли эҳтиросимни юрагимда қон қил! Эй,

* К и м и ё — алхимиклар тасаввурicha, мўъжизали тош.

** Ишқ сўзи эски ёзувда айн, шин ва қоф ҳарфларида ифодаланади.

тандри, Лайли дардини нажотим айла, ёдени эса ҳаётим айла! Бир лаҳза ҳам унинг хаёлини кўнглим уйидан чиқарма! Ишқ ўти бўлмаган оловни менга насиб этма! «Ёху»ларим унинг ғамидан бўлмаса, ундаи оҳни мен девонанинг дамидан чиқарма! Унинг хаёлини дардимга табиб эт! Васлини жонимга насиб эт! Кўзимни Лайлидан ўзгасига туширма, унинг меҳрини менга абадий эт! Мен ҳаёт эканман, унинг ишқ савдосини танимда жондай сақла! Бу нотавон танимдан жон чиқса, унинг ёди билангина жаҳондан чиқар! Марҳумлар тирила бошласа, менинг танимни Лайли маконининг ели билан тирилтири. Абадий дўзахга тушиш менинг қисматим бўлса, уни Лайли ишқи ўтидан қизит! Манглайимда жаннатга тушиш битилган бўлса, унинг васл ҳарамини биҳиштим эт! Усиз мени бир нафас ҳам яшатма, унингиз тирик бўлсанм нобуд қил!

Бу муножот уни шундай қизитиб юбордики, атрофдаги ҳожат аҳллари ҳайрон бўлиб қолдилар. У сўйлар экан, теварағидаги ғам асиirlари: «Омин!» дердилар. Бечора отаси ҳушнидан кетиб, қариндош-уруглари ҳайрон бўлиб қолдилар. Мажнуннинг бу фарёди, кўз ёши ва нолишини кўрган кишилар, унинг ишидан қўл ювдилар. У ҳам дардли йигисини тугаггач, яна ақл ва ҳушидан жудо бўлди. Охири бир неча бағри эзилганлар Мажнунини кўтариб, манзиллари талабида бўлдилар.

Ишқ ўти кўнгилни куйдирган пайтда, уни ўчириш учун сув қуйилса ёғ бўлади. Ишқни камайтиришни тилаб, ҳажни зиёрат этгач, у ишқ янада зўрайиб кетди.

Эй, саодатли Каъбанинг зиёратчиси, марҳаматингдан бебаҳра қолмайин! Дуода бизни ҳам ёд этиб, бу ишқ ўтининг шуъласини яна ҳам ошир!

XXI

Мажнуннинг ваҳшатли элдан улфатлик ипини узгани ва биёбон ваҳший ҳайвонлари билан дўстлик йўлини тутгани, кийиклар билан Навфал ови орагигида қолгани; Навфалнинг висол ваъзаси сиртмогини унинг бўйнига солгани ва кийикларни озод қилиб, уни тутгани ва кўнглини овлагани

Бу ривоятни суриштирган баёнчи қиссани бундай давом эттириди:

Ҳаж зиёратидан ҳар ким ўз ватанига қараб қайта бошлади. Мажнуннинг отасини абадий ғам босиб, ўғлидан буткул

умидини узди. Мажнунни сақлаш мумкин эмаслигини ва бу йўлдаги уринишларнинг натижа бермаслигини билгач, ҳамма уруг-аймоқлари ва отаси ҳам маъюс ҳолда жаҳонни кўз ёшлиари билан тўлдириб қайтдилар. Девона Мажнун ҳам жадал қайтиб, тоғу биёбонларни кезиб юрди. У ҳар кун бир тарафга кетиб, ҳар тун бир тоғ этагини макон тутар эди. На туришга қарори ва на юришга ихтиёри бор эди. «Лайли» деган сўздан бошқа сўз айтишга: майлсиз; тилдаги зикри ҳам Лайли, кўнглидаги фикри ҳам Лайли эди. Қаёққа боқмасин, унинг кўзига Лайли жилваланарди. Юзини хаёлида тасаввур этар, кўз олдида эса қомати гавдаланарди. Бу иккисини у гўё сарв устидаги гул деб тасаввур қиласиди. Мажнуң ҳам сарв олдинга бошини қўяр, ҳам гул учун кўз ёши тўкарди.

У Лайли хаёлида ўйга чўмиб, юзларча дурдона байт ва газаллар айтар, уларнинг қофияси Лайлининг сифати бўлса, барча радиофлари унинг исмидан иборат эди. Гамгин ва шод кишилар унинг газалларини юз завқ ва севинчга тўлиб ёд олардилар. Байтларининг мазмуни оловли, назми димогдан тутун чиқарар эди. Унинг ҳар бир сўзи ичига шавқ ҳарфлари яширинган, ҳар ҳарфига ишқ сирлари сингдирилганди.

Мажнун назмлардан наво тушиб, эл орасига ҳай-ҳуй соларди. Сўлғинларга жон киргизиб, маъюсларни ошиқи зор этарди. У ҳушига келганда тоза дур сингари байтлар айтар, аммо ҳушидан кетганида телбалардек беҳуда сўзлар айтиш унинг одати эди. Элнинг сўзига тушунмас ва ўзи ҳам нима деганини билмас эди. Кўнгли жунун ғамида қолиб куйганидан, ўзи турли ҳолатларга тушарди. Бир нафас ҳам ҳуши ўзига келмас, сахро ваҳшийлари каби хуруш қила бошларди. На йигисида газаб кўринарди, на кулишида сабаб. Юзлари шапалоқ зарбидан кўкарган, аъзосида руҳдан асар қолмаганди. Гоҳо бу ҳолатидан ўзи ҳам ваҳимага тушиб, «Лоҳавла» дуосини ўқир эди. Бу қўрқув изларини қўрқмас ишқ кўнглидан дарҳол ювиб, топ-тоза қиласиди. Овози тоғларда сабодек таралар, тани эса қўмдаги қуруқ гиёҳдек бўлиб қолган эди. Ёш болалардек фарёд кўтариб йиғлар, лекин ота-онасини эсламасди. Балони ёру ошно қилиб, ёру ошнони соғинмас эди. Ичмоқ ва емокни ҳам унутиб, ғамдан озиқланар, жафо майнини ичарди. У кўз ёшларидек тинмас, жайрон каби одамлардан ҳуркиб қочарди. У нафс итлигидан кечиб, даштдаги кийиклар билан улфатлашди. У қайси қумга қадам босмасин, бир дашт кийиги унга эргашар эди. Чор атрофини кийиклар ўраб олишар, бу бўлса ўртада чўпондек юрарди. Баъзиларининг пешонасини ўпар, баъзиларининг сағрисини силарди. Ҳар томонда қўриқчи итдек, йўқ-йўқ, янглищдим, чўпон итидек бўрилар кезар; уларнинг

йўли бу даштга тушганида фигону зорлари кўкка еттудек улишарди...

Араб мамлакатида нодир, тиф ва ўқ отмоққа моҳир бўлган Навфал исмли бир баҳодир бор эди. Араблар орасида яхшилик билан довруқ тараттган бўлиб, бу ерлар ҳам унга қарапди. Навфал ўша куни катта ҳавас билан овга чиқиши тараддудини кўрган; барча қабилалардан кишилар тўплаб, саҳрого от сурган эди. Мажнун бир пайт овчилар қуршовида қолди, унинг атрофига кийиклар гуж бўлди. Кийиклар Навфал йигитларини кўриб, тўш-тўшдан Мажнун томонга югурдилар. Улар Мажнунга ялиниб, иложи борича унинг паноҳига сиғиндилар. Навфал гайри табиий бу ҳолни кўргач, ҳайратда қолиб, мадори кетди. У йигитларидан сўради: «Бу ғаройиб, кўнглимга ваҳм солаётган манзарани сиз ҳам кўряпсизми ё йўқми ёки менинг кўзимга шундай бўлиб кўриняптими?»

У кишиларнинг баъзилари Мажнун ишидан тўла воқиф эдилар. Улар Навфалга Мажнун ҳикоясини бошдан-оёқ сўзлаб бердилар. Навфал ҳам бир вақтлар ишқ можаросини бошидан кечирган ва ғам даштида юргран эди. У бу воқеадан хабардор бўлгач, қақшаб йиғлади ва ов қилишдан воз кечди.

У деди: «Ишқ — гавҳар, у кўз қамаштирувчи порлоқ нур. Ишқ кимни ғамга солса, унинг қалбини кирдан пок этади. Шунинг учун ҳам одам билан дўстлашмайдиган ёввойи ҳайвонлар унингсиз саҳрода ором ололмайдилар. Ишқ унинг бужудини шундай эртибидики, унинг инсонлиги шунчалик йўқолибидики, ваҳшийлар ундан қўрқмайдилар. Чунки ундан инсонлик кетганида, ваҳшат ҳам кетади».

Навфал кийикларга озор беришдан воз кечиб, йигитларга:

— Ўқ-ёйни ташланг! Итлигингизни дарҳол йўқотинг, итлъингизни эса маҳкам боғланг! — деди.

Одамларига шундай деб буюриб, отдан тушди ва Мажнун тарафга қараб юрди. Мажнун Навфални қадрдонсимон кўриб, келганига хурсанд бўлди. Навфални кўриб, ҳалиги ёввойи ва хонаки ҳайвонлар қочсалар-да, ҳуркак Мажнун қочмади. Навфал бориб салом берди, Мажнун унга эҳтиром кўрсатди. Мажнун деди:

— Эй муборак сиймо, чеҳрангда поклик нурини кўраман. Юзлингда меҳр балқииди, эгнингда вафо нури жилваланади. Сен бутун маҳсадларингга эришгансан. Лекин бир нарса қизиқ кўринидики, ғофил кишилар каби ўқ отиб, ов гўшти билан қорин тўйғазиши истагига тушибсан. Нафс севинчи учун шунча элни бошлаб, қон тўкишга кўнглинг майл этади. Бу озуққа эҳтиёжманд эмассан-ку? Нечун уларга озор берасан? Шундай зулм билан уларни овқат қилишни сен ўзингга раво кўрасан-

ми? Агар оёғингга тикан санчилса, оёғинг учун кўнглинг эзилади-ку. Зулм ёйини тўғрилаб, ўқ отиб, жониворларни уришдан нима фойда?! Ҳақ буларга ҳам жон бериб, ҳаётнинг гўзал нишоналарини бағишлади. Энди бу ҳуркак ожизларнинг жонидан кеч, бу бегуноҳ галанинг қонини тўқма!

Навфал Мажнуннинг бундай дур сочувчи сўзларини эшитиб, унинг олдида бош эгиб, ер ўпди ва деди:

— Эй фариштага ўхшаб, сифатинг одамга ўхшамаган! Бу сўзларингдан муродинг нималигини билдим; ҳар нима деган бўлсанг, барини қабул қилдим. Еу ҳуркак кийик сурувига урадиган қилич ва ўқларни ўз жонимга раво кўрайин. Энди сен ҳикояларингни айтиб бердинг, мендан ҳам бир ҳикоя эшиш.

Мажнун унга қулоқ солиб: «Эй соҳибжамол, айтгин», деди.

Навфал деди:

— Бу қўрқоқ ҳайвонларни азоблама, деб менга тўғри йўл кўрсатдинг. Бу сўзларинг ҳаловатини билдим; уларга бўлган адоваратни тарқ қилдим. Сен элдан айрилиб, булар билан ошна бўлибсан. Эл билан ортиқ улфатчилигинг йўқ; бу ахир одатга хилоф иш-ку? Инсон ақл чироги, қолаверса бутун коинот кўзининг нуридир. Одамлардан қочиб, ҳайвонлар билан улфатдош бўлишинг ақл олдида сабабсиз кўринди; бу ҳолат менга жуда қизиқ туюлди. Менга бир гул юзли бунинг юрагига иштиёқ солган, деб айтдилар. Агар шундай ҳодиса юз берган бўлса ва бу ишнинг сабаби шу бўлса, бу ҳуркак ҳайвонлардан қуттулиб, мен билан кезиб, кунларингни шод кечир. Бу ерда зору мубтало бўлиб, ғам тузогига илинган экансан, мен қўлимдан келганча уриниб, уни сенга ёстиқдош қилайин. Агар пулу молга кўнмаса, аскар кучи билан ҳал этайин. Е тухфа-тортиқ ва яхшилик билан, бунга кўнмаса, роса зарб-зўрлик билан ишни тўғрилай. Агар фалак менга мадад берса, бу иш қайси йўл билан ҳам бўлса, бу чигал тугунлардан сени қутқариб, муродмақсадингга етказай. Агар унга мусассар бўлинмаса, унинг ўрнига бошқаси ҳам бор: сени ўзимга фарзанд этайин, миннатингни кўзим устига қўяйин. Лекин сен бу ҳайвонлардан узоқлашиб, мен билан бирга бўл. Одам билан ҳайвонларнинг жинс дошлиги оз, фақат одам билан одам ҳамжинсдир. Агар мақсадинг ёрга етишмоқ бўлса, гайрат керак.

Мажнун висол сўзини эшигтгач, шавқи бурунгидан ҳам зиёд бўлди. Шодлигидан беҳол бўлди, беҳолликдан эса, тили сўзга келмай қолди. Юз ҳаракат билан кўзида ёш, оғзида табассум билан деди:

— Сенинг айтган ҳамма сўзларингга жавобим бор эди. Висол сўзини айтишинг билан ўзимни унутдим, уларнинг

барчасидан йироқлашдим. Бу берган ваъдаларингга вафо қилмасанг ҳам, юзим кўйк отингнинг туёғи бўлсин, бошим отингнинг оёғи бўлсин.

Икки томон шундай меҳрибончилик билан қизгин қадрдонлашдилар. Буларнинг қадрдонлиги кўп хурсандчиликка сабаб бўлди. Навфал висолдан хушхабар бериб, Мажнунни ўз уйига олиб кетди.

Эй, айрилиқда жисми нотавон бўлган одам, жонинг васлнинг хушхабарларини топди! Ёрга етиш гарчи мушкул иш бўлса ҳам, ҳар ҳолда бу хушхабар яхшидир.

XXII

Навфалнинг Лайли гавҳарини Мажнун шодаси тизимиға тизиш учун гавҳардек сўзларни назм ишига тизиб Лайли отасига юборгани; унинг сўз гавҳарини синдириб, алоқа ишини узгани; Навфал лашкар тортиб, у ҳам адоват қўшинини тузгани ва ўч майдонига от суриб дов тилашганлари; фалак тадбири билан бир-бираига баравар келмоқлари ва хилват жойларни истеҳком қилиб тушганлари

Бу даштни босиб ўтган сайёҳ шундай афсона сўзлади:

Навфал билан Мажнун бир-бирларига ёр бўлиб уйга раона бўлдилар. Навфал ҳар қандай мушкул иш тушса, тўғри кенгаш берувчи бир неча доно кишиларни уйига чорлади. Бўлган ҳодисани бирма-бир айтиб, уларни Лайлининг отасиниқига жўнатди. Лайли отасига юборилган дарак шундай эди:

«Эй, бахт ва толенинг ўйноқи отини ром қилган! Араблар ичida мислсиз ва илму ҳунарлари эл оғзига кўчиб, шуҳрат топган Қайс Лайлига пок ишқ боғлаб, унинг орзусида юрган эмиш. Унинг ҳаддан зиёд ҳаё ва хижолати ўз дардини айтишга қўймаганидан, у қавм-қариндошларини унутиб, ишқ кўйида даштни ўзига макон қилган эмиш. Ишқда шундай шайдо эканки, эл уни «Мажнун» дер эмиш. У сенинг қабилангда ўқиб, оламдаги бутун илму ҳунарни ўрганган эмиш. Ўзинг ҳам унинг ишларидан хабардор бўлиб, доим уни мақтар экансан.

Унинг ишққа мубтало бўлганини кўрган отаси нима фикр қилди экан? У сенинг фарзандинг бўлмаса ҳам фарзандингга

монанд эди-ку? Сен яна кишилардан унинг аҳволини сўра-масдан, бепарволик қилиб, уни ғамга асир этибсан; у бўлса гоҳ дашт, гоҳ тоғларга чиқиб кетибди. Ахир муруват, одам-гарчилик ва саҳоват ҳам шунаقا бўладими?

Ўтган ишга пушаймон қилмаслик керак, чунки у энди қайтиб келмайди. Мен даштда кезиб, уни топдим-да, ўзим билан ўйимга олиб келдим. Уни ўзимга дўст ва фарзанд әтдим. Унинг аввалги комил ақл-ҳуши ўзига келди.

Энди илтимос ва талабим шуки, икковининг никоҳини қилиб, тўйини ўтказсак. Расм-одатларни кўз устига қўйиб, маҳрига жонни тиксак. Тож устида дур — ҳар қандай нуқсондан холи. Унинг ёнида лаъл бўлса, яна ҳам яхши. Агар бу ишдан бўйин товласанг, кўнгил қолищдан қўрқишинг керак».

Навфал шу сўзларни тушунтириб, кўп тортиқлар билан элчиларни жўнатди. Лайлининг отаси бундан огоҳ бўлгач, яқин кишиларини тўплаб, кўнгилдагидек маслаҳат қилди. Хабар элтувчиларни ҳурмат билан қарши олди. Улар Навфалнинг юборган дарагини айтишди. Бу хабар Лайли отасининг қулогига гоят қаттиқ текканидан газабидан бениҳоя тўлғонди. Ранжиб, шундай сўз бошлади:

— Тақдири азал шундай экан. Бу Чин санами ва Фархор* ойи боғимнинг гулими, тиканими, ҳар ҳолда ўзга бир киши унинг маҳбуби ва дўсти бўлиб, унга насиб этади. Алқисса тақдир уни бошقا бирорвга раво кўрди. Борди-ю, бундай бўлмаганда ҳам, менинг Навфал сўзига итоат этиб, амр қилган ишини бажаришга унча зарурат йўқ. Айниқса сўзининг бир қисмини умидворлик билан, бир қисмини ваҳима билан тўлдириб, умид билан кўнглимни курсанд қилмоқчи-ю, ваҳимаси билан хотиримни паришон қилмоқчи бўлгани-я! Ҳисобсиз кишиларни ўзига асир этган у ой, ҳозир бирорвга номзод этилган. Агар у айтган сўзидан пушаймонлик тортса, у нари-ю, биз бери — тинч қолаверамиз. Агар борди-ю, у бу сўзларимдан қаноатланмаса, лутф кўргазадими ёки қасд оладими ихтиёри: лутф кўрсатса хотиржам ўтиарамиз, ўч олмоқчи бўлса ҳам тайёрмиз. У мабодо бизни «ўчимдан қўрқади» деб ўйламасин. У уруш очса, биз юриш бошлаймиз, юриш бошласа — уруш очамиз!

Гапини шу жойда тутатгач: «Боринг, сўзим шу эди», деди. Келган кишилар хижолат тортиб, Навфалга Лайли отасидан малоллик хабарини етказдилар. Навфалга бу қисса маълум бўлгач, бу хабардан жуда ғамга ботди. Мажнунга ваъда берган

* Қадимда гўзал қизлари билан машҳур бўлган Ўрта Осиёдаги шаҳар.

чогида шундай бўлишини билган эди. Бутун қабилалардан одамлар тўплаб, дарҳол урушга майл өтди. Мажнунни ҳам ўз ёнига олиб, у ўтни шамолдек чопқир отга миндириди. Ўнга яхши тўнлар кийгизиб, бошига салла ўратди.

Лекин Мажнун бу ишларнинг тагига етолмай, гоҳ нола қилар, гоҳ оҳ тортар эди. От қаёққа борса ҳам индамас, тўхтаса юришга қистамайди. Тайёр қилинган каллакесар аскарларнинг ҳаммаси ҳам қонга ташна әдилар. Мажнуннинг ишини ҳал қилиш учун Навфал бутун кучни Лайли қабиласига сурди. Улар ҳам бу воқеадан хабардор бўлишгач, дарҳол қаршилик кўрсатишга қарор қилишиди. Ҳар томонга одам чоптириб, эл тўпладилар, газаб билан маҳкам бел bogладилар. Ўша ондаётк душман билан юзма-юз бўлиб, гайрат билан саф тортдилар. Буларнинг бундай қаҳр ва газабларини фалак ҳам англаб ҳар дам офаринлар ўқиди.

Навфалнинг аскарлари ҳам саф чекиб, маст туялар каби оғзидан кўпиклар сочарди. Бу икки қон тўкувчи қўшин, шу тарзда даҳшат билан ўлим бозорини қизитиш учун бир-бирларига яқинлашдилар. Отлар шамоли жанг майдонини супуриб, шафқат ва марҳамат гиёҳларини совурди. Худди баҳор ёмғири қўйгандек, майдонга ўқлар ёғилди. Даштдаги барча от ва туялар ҳам қуюн каби тўс-тўполон ичида қолди. Айлантириб урилган найзалар боши янчилган илон каби буралиб кўринарди. Найзаларнинг дастаси офтоб доирасидек эгилиб кетди. Учи бўлса, тол баргидек эди. Кескир қиличлар элни ҳалок әтар, устарадек бош олар. Бу ўткир қиличлар покидек тез бўлиб, соч ўрнига бош қирқар эди. Ўқ қушлари ҳавога учиб, балога йўл кўрсатиб борар эди. Ўқ қушлари қанотини ёзганда, ёвнинг танидан ҳаёти учиб кетар эди. Кўкка қараб учган камон ўқлари бахтсизлик келтирувчи юзларча юлдузлардек барчани ўлдирап эди. Ҳар танага ажал ўтини ёққанда умр юлдузи бардош беролмай ботар эди. Ҳар томондан қўтарилиган учар юлдуга ўхшаган ёлқинли қилич ва ханжарлар зарб билан урилар. Бу қилич ва ханжарлар совут кўйлаклардан худди ҳарир шоҳидан ўтган игналардай ўтарди. Ханжар доимо ўзини тилга ўхшатса-да, қон тўкиш уни қизил тилга айлантиради. Унинг иши доимо эл бағрини тешиб, ярадор қилмоқ ва зиён етказмоқдир. Гурзи ҳалқнинг бошини чақади, ҳар вақт элнинг миясида ўшанинг гавгоси. Ногоҳ у бошга тушса, бош косалари унинг ғилофи бўлар эди. Қўшин булути наъра тортиб кирди; бу булутнинг чақмоғи эса кескир тиғлар эди. У бало булути бўлса, бу оғат чақмоғидир; бутун олам шулардан оғатга гарқ бўлади. Шамол булутларни ҳайдаганидек, буларни осталаридаги ваҳшатли отлар суришарди. Тезликда яшиндек,

қайтишда эса, отлари чақиндек ялтирайди. Отлиқлар жанг кунидаги Рустамдек ўлдиришга киришганлар. Ҳар бир мутаасиб араб душманлик ўтини қизитиб, ўч шуъласини равшан ёндирган. Унинг алангаси кўкка туташ; дарё суви ҳам уни пасайтиrolmas әди. Мана шу зайдаги икки қотил қўшин бирбирига дуч келшиди. Навфал аскарлари кўпроқ ва қаҳрининг ўти жуда ёлқинлироқ әди.

Душманлари бу шуъла иссиқлигини кўриб, ярашиш йўлини истардилар. Бу ишдан элга оғат қўрқинчи бўлгани учун, бир бирларига тездан мойил бўлдилар. Уша куни кун кеч бўлиб, бирор томонга шикаст ҳам етмади. Навфал ҳам хурсаҷчилик билан қайтиб, аскарларини маҳкам бир жойга туширди.

Ҳар икки қўшин тинчланди, улар орасидаги адоват ҳам тўхтади. Қоронгулик қўшини соя солгач, юлдузлар шу қўшиннинг кузатувчиси бўлиб чиқа бошладилар. Чин шоҳи — қуёш ўз тахтини тарқ этди. Ер юзини эса қоронгулик босди. Ҳар икки томоннинг келишуви маълум бўлди ва бир қарорга келдилар. Кузатувчилар: «Эртага нима бўлар экан?» деб айланниб юрар әдилар.

Эй, ишқ әлининг қиличбозлари, менга ҳам ғам қўшиннинг зўри тушди. Менга май тут, бир нафас курсанд бўлайинда, у қўшин томон бош яланг чопайин.

XXIII

Лайлининг отаси ўз кишиларини Навфал лашкари қошида кучсиз кўриб, душманга тортган тигини ўз жигарига урмоқчи бўлгани; яъни Лайли қонини оқизай дегани; у қуёшни Мажнун тушида кўриб, ботишдан саҳлагани ва мотамзада тундек Навфал олдида кўз ёшлари юлдузларини оқизгани ва Навфалнинг ўти пасайиб қайтгани

Тил найзаларини узатган ёзувчи, қалам жиловини шундай бурди:

Уша куни уруш тўхтатилгач, аскарлар бир жойга қўниб, ётишга тутиндилар. Душмани урушқоқ Навфалнинг ғолиб ке-

лишидан ваҳимага тушар эди. Лайлининг отаси ўз элининг кучизилигини кўриб, чора ахтариш учун белини маҳкам бофлади. Тездан ўз уруғининг бошлиқларини чақириб, улар билан кенгаш ясади. Кўп гап-сўзлар билан бу можаро жуда чўзилди. Охири гапни қисса қилиб, бундай деди:

— Худо кўрсатмасин, бизнинг одамлар қочиб, Навфалга фатҳ қўмак бериб, у саройимга от солдирса, амирлардек ҳукмини юргизиб, Лайлини асири этиб, қўлга олади. Бундай ачинарли ҳол қабилам бошига тушаркан, ору номусим қаро ер билан яксон бўлади. У вақтда ишим бир бало бўлиб ё ўлишга, ё ватандан кетишга тўғри келади. У чоқ араблар ичидан бош кўтаргандан кўра, қаро ерга кирмоқ афзалроқ бўлади. Бундай кўнгилсиз, аянч аҳволга тушгандан кўра, шундай фикрни қилмоқ яхшироқдир: эртага Лайлини топиб, бир дамда ишини тамомлай; ўқ игнаси билан либосини тикиб, ханжар сувидан хиносини эзайин. Унинг ниҳол қаддини тупроққа кўмайин-да, ҳилоддек қошини ерга киргизай! Гарчи у кўзимнинг чироги бўлиб, жоним гуркираган боғи бўлса ҳам, оғат елидан чирогим учиб, боғим ҳазон ва торож этилса, душман маҳсадига етиб, номусим барбод бўлгандан кўра, бу яхшироқ!

У шундай деб сўзини тамомлагач, барчалари таҳсин айтишиб, хурсанд бўлдилар. Навфалнинг қўли баланд келган эди. Аскарлари ҳам ғолиб бўлиб чиқишга ишонган; кўнгиллари кўтарилиган эди.

Мажнун эса, ажойиб бир ҳолда қолиб, гоҳ завққа тўлар, гоҳ мусибат тортар эди. У ёрнинг васлини эслаб, кўнгли умидворлик билан шодланар эди. Лекин ёри томонининг маглуб бўлиши унинг кўнглини тобора бузар эди. Ошиқлик иши ожизлик, кулфат ҷоҳига бош тубан тушишдан иборатdir.

Бу қайгулар бедил Мажнунни талвасага туширгач, баҳт келиб унинг кўзига уйқу солди. У тушида нигори зебони бошдан оёғигача ғоят ҳарир ипак кийимларга ўралган ҳолда келаётганини кўрди. Йўқ, у нигори эмас, гул юзли сарв, сарв ҳам эмас, гул ҳам эмас, балки қуёшнинг ҳам рашкини келтирувчи париваш эди. У кўз чашмасининг беғубор суви эди. Жон гулшанида этилган ниҳолга ўхшар эди. Латофат саҳросининг лоласи, йўқ, балки хуш исли кийигидир. Малоҳат дарёсининг гавҳари, гавҳар ҳам эмас, балки қуёшнинг аксидир. Кўз корачигидек кўнгилга ёқимлидирки, доимо ёши тўкилар. Ҳажр ўтида оламни ёндирувчи бир шамъдирки, ҳамма вақт иши кувиш ва ёнишдан иборат. Кўз ёшини яширган тонгга ўхшадирки, меҳр гулидан дам уран. Унинг сабрини кўз ёшининг сели оқизган, яъни у ою куннинг рашкини келтирган Лайли

еди. Унинг оғзида иштиёқ оҳи, товушида фироқ ноласи бор эди.

Лайли яқинлашгач, алифдек қоматини әгиб, дол қилиб, дардол Мажнун оёгини ўпди. Сўнгра қучоқлашга мойил бўлиб, қўлинни Мажнуннинг бўйнига солди. Деди: «Эй жондан азиз дўстим, йўқ-йўқ, балки абадий қадрдоним. Сенинг ишқингдан отам мени ажратмоқчи бўлди, барча эл ҳам у билан иттифоқ бўлиб, эртага мени ўлдирмоқчи ва қоним билан ерни бўямоқчилар. Қуёшимга завол келтириб, қонимни эса шафақ мисол қилмоқчилар. Қоним билан қуёшим шафақранг бўлса, мени ерга кўмадилар. Сенинг ишқингда қурбон бўлиш менинг мақсадим эди. Даврон мақсадимга етказди. Барча истакларимни муҳайё қилди. Ишқингда ҳарна орзу қилган бўлсам, ҳаммасига ҳам эришдим. Менинг олдимга ажаб йўл тўғри келди, энди сен яхши қол ва омон бўл!»

Шу сўзлар билан кўзидан дарёдек ёш оқизиб, девонаси билан видолашди. У ой Мажнунга бу сўзларни айтгач, Мажнун ҳам «Вой!» деб сесканди. Бу товушдан эл кўзидан уйқу ўчиб: «Нима бўлди экан?» деб, ҳайратга тушдилар. Мажнун мотамзадалар каби ҳўнграб, кўз ёшларидек Навфал томон югурди. Етгач ер ўпиб, сўзга тушди:

— Эй душманига ғолиб келиб, устунлик қозонган, тангри ҳақи, ортиқ тиф тортмагин. Ўч ва урущни бас қил! Тифинг кўнгилни тешиб, унинг уруши эса, жонимга қасд этади. Эртага яна уруш бошлама, ҳаётим пайвандини узмагин ахир! Ўч ёйини қўлингдан йўқот, токи жонимга ўқ тегмасин!

Навфал бу ишнинг одатга хилоф эканини билиб, ҳайратга тушиб суриштирди. Мажнун ўз аҳволини билдирагч, Навфал әшишиб ғамга тушди. «Бу воқеа балки чинdir: Мажнуннинг туши шубҳасиз тўғридир», деб йўлади. Навфал Мажнун кўнглининг поклигини, балки оинаи жаҳоннамо эканлигини англаган эди. У оинаи жаҳоннамода фақат тўғрилик жамолининг жилvasигина кўринади.

Араб туни мусофиirlарча отларини хайлхоналарга тушириди. Кўк сабзазорига юлдузлар гўзали, яъни қуёш бемалол чодирини тикди. Бу хабарни эшитган барча эл, унинг сўзини маъқул, деб билдилар. У санамга зиён-захмат етмасин, деб Навфал ўз саройига тезликда жўнаб кетди. Мажнун ҳам дашт томон жўнади. Уруш зафари ҳам яқинлашган эди.

Эй менинг яқин ҳамдамим! Юз минг оғаринларга сазоворсан. Агар мени бошинг ҳақи учун шу ғамлардан қутқариб, севинтиранг, банданг бўлар эдим.

XXIV

*Мажнуннинг Навфалдан айрилгани
ва елоёқ отини шамолдек суреб, биё-
бонга йўл олгани; Зайдга йўлиқиб, аҳ-
волини маълум қилгани ва унга етган
бедодликдан бунинг ҳам кўнглига алам
етгани; унга таскин бермоқ учун ўзи-
нинг ҳамма нарсасини топшириб, Лай-
ли қабиласи кўчган ерга кетгани*

Бу саҳифаларга нақш берувчи наққош сўзни бундай ёзади:
Вафодор Навфал қайтиб кетгандан сўнг, Лайлининг эли
ўйга тушиб қолди. Чунки Навфалнинг бу иши уларга қизиқ
туюлди. Қайтишининг сабабини билолмадилар. «У ҳийла қи-
лаётир. Бизни гафлатда қолдириб бошимизга етади», деган
ваҳимага тушдилар. Ҳажга кетаётган кўчли карвоилардек,
улар ҳам даштдан кўча бошладилар. Бутун молдавлатларини
ортишиб, бошқа бир манзилга жойлашдилар.

У толеи баланд, душманига ғолиб келган, бахтининг шамъи
ўта шуълаланган, уй ва рўзгорларини куйдирган, иқбол оти
чақонлик билан сакраган, лекин ўзини тупроққа ташлаган
бахтининг чаманида битган гул ҳидидан бошига дардлар йи-
ғилган; яъни кўнгли ҳурккан Мажнун оромсиз кетиб борар
эди. Ногоҳ замонасидан бахтсизликка учраган бир дардмандаға
йўлиқди. Мажнун унинг юзида ғам белгиларини кўргач, қай-
ғуга тушиб сўради:

— Фалак бошинингга нималар солди? Сени ким бундай муш-
кул аҳволга мубтало қилди? Нима учун сен мендек ғамга бот-
гансан, худо ҳаққи, аҳволингга нима бўлди? Айт!

У, дард билан тўлган ғамгин киши, оҳ тортиб, бундай
деди:

— Эй жўмард! Мен араблар ичидаги хўрланган, бедавлат
бир бахти қаро одамман. Менинг ожиз ва бенаволигим шу да-
ражадаки, кунларимни тиланчилик билан ўтказаман. Лайли
сарайи — менинг паноҳим. Ҳай тупроғи эса — менинг суянчи-
ғимдир. У қабила одамлари мени «Зайд» деб чақирадилар.
Ўзим эса аёлманд бир кишиман. Шу вақт Навфал деган жа-
фокор, Мажнунга дўст бўлиб, унинг хизматини бажариб, яраш
йўлини тўсида-да, Лайли элига қўшин тортиди. Орада ҳеч иш
бўлмай, яна манзилига қайтди. Лайли эли эса, Навфални, эл-
ни огоҳлантирмасдан, гафлатда қолдириб, ногоҳ етиб келар-
да, яна истаганича ўлдирав, ёндирав, деб ваҳимага тушди-

лар. Иш қўлдан кетгандан кейин юз тадбир қилсанг ҳам фойда бермайди.

Душман олдида шодлик қилиш журъатдандир. Шундай бўлса ҳам эҳтиёт бўлмоқ керак. Бу сўзга маҳлиё бўлишиб, ҳалқни бир пана жойга кўчиришга тушдилар. Қабила аҳли кечаси йўлга тушдилар, тун эса, оламга зулмат сочар эди. Мен эсам кўчувчи элдан кўзимни олдим, натижада кўз очиб-юмгунча адашиб қолдим. Улар манзилга жойланибдилар; мен эса бошқа томонга кетибман. Қуёш тонг йўлини ёритган чогда, икки туя минган киши йўлимни тўсди. Навфал қўшинларини тарқатиб юборганидан сўнг, булар ҳам ўз уйларига қайтиб кетишаётган экан. Улардан бирор пана ерга қочиб қутулмоқ менга қийин эди. Халтамда бўлган озиқ-овқатларимни ва икки-уч танга пулимни ҳам, бошқа бор-йўғимни ҳам тортиб олдилар. Буниси ҳам унчалик эмас эди-я, улар мени қамчиладилар! «Пулингни нима қилдинг, айт, кўмган жойингни кўрсат!» деб урдилар. Баданларимни тилка-тилка қилиб юбордилар. Охири ҳеч нарса тополмагач, мени қўйиб, улар ўз йўлларига жўнадилар. Мен эса фурсатни ғанимат билиб бу тарафга юришга ошиқдим; энди эса, сенга йўлиқдим. Сен ҳам агар ўшалардан бўлиб, саҳрова одам таловчилардан бўлсанг, киссамда пулдан дарак ҳам йўқ; керак бўлса фақат нақд жоним бор.

Мажнун бу можарони эшитиб, отдан тушиб, уни қучоқлади. Йиглаб, деди:

— Эй мажруҳ дўст! Сенга жонимни фидо қилсанг бўлмайдими? Жоним баданингга шифо бўлсин. Бошим қадамингга фидо бўлсин. Навфал эли томонидан шундай ҳодисалар қилиниб, бунга сабабчи Мажнун бўлса, ўша сен айтган бахти қаро Мажнун мен бўламан; қўлингга тиф ол-да, кўнглинг тилаганини қил. Жиссимни истаганингча яралаб, кўнглимни ҳам пора-пора эт. Бу ишдан қўрқма; мен хижолатдаман, ҳар нарса қилсанг ҳам розиман. Оlam элидан номусга қоламан деб мени ўлдирмасанг, ўғирлатган пулларинг эвазига отимни ол,— деб барча кийган кийимларини ечди. Ва ҳаммасини унинг олдига қўйди; учқур отини, қалқон, қилич ва ўқ-ёйини ҳам унинг олдига қўйди. Сўнг, унинг кўнглини кўтариб ва кечиримлар сўраб, оёғини ўпди. Деди:

— Агар қайтишингда, яна Лайли саройнга борсанг, саломимни етказгин, деб қайси тил билан айтайн; ёхуд шундай-шундай хабаримни айт, деб қандай айта оламан. Мен шундай қаттиқ хижолатда ва шу даражада қийин аҳволда қолдимки, буни сўз билан айтиш эмас, ҳатто ўйлаш ҳам мумкин эмас.

Бу бало даштида сен йўл кўрсатувчи бўлдинг, сенга шундай илтимосларим бор: Ер қабиласини излаб қайси томонга кетган бўлса ҳам етиб олгин, у макондан ҳаргиз юзингни ўгирма; бошингни ҳам у оstonадан олма. Жисмингни унинг эшигида гард этиб, шукронасига жонингни ҳам садақа қил. Жон беришга кўнглинг кўнмаса, менда жон билан кўнгил бор. Ҳар иккисини сенга топшириб, танимни тупроққа яширайин. Сен эса, жонимни эшиги тагида топта, кўнглимни итининг олдига ташла!

Бу сўзлар Мажнуннинг ўзини ҳаяжонга солиб, эшитувчи ни ҳайратда қолдирди. Зайд Мажнунни таниб, унинг сўзлари ни англағач, ер ўпид, ҳурмат қилди. Деди:

— Эй ишқ оятига сингиб кетган замонанинг ягонаси! У ҳажр тунининг умид тонги, йўқ, балки абадий қуёши, жамоли саодат осмонидан чиқадиган, покизалик пардалари юзига ниқоб бўлган Лайли, сенинг ғамингда шундай нотавонки, сўзи элга достондир. Оғзида сенинг сифатларинг, кўнглида эса хаёлинг жилваланади. Сен бирор нарса десанг, мен унга етказиб, хабарингни айтсан. Бу хушхабар унга жондан ҳам ортиқ бўлажак, балки нима деганимдан ортиқ бўлиб тушар. Менга раҳминг келиб, шунчалик нарсаларни бағишладинг. Унга мен сенинг хабарингни етказсан, у ҳам менга икки шунча нарсалар беради. Айтган сўзларингни унга етказаман, агар буюрса, жавобини ҳам келтираман. Икки дилором ҳам муродига етади ва ўртада мен ҳам мақсадимга етишаман.

Мажнун деди:

— Эй, менинг айрилмас дўстим! Жон бағишловчи нафасинг яраларимга малҳамдир. Унинг ҳижрони менинг тилимни лол этиб, сўзлашни ҳам маҳол қилиб қўйган. Нихоят менинг ишимни сўрадинг, аҳволимнинг қандай эканлигини ўзинг кўрдинг. Мен бир дардманд, жудолик дардига тушганлигимни ва ким эканлигимни билдинг. Сен шундай дўстлик қилаётисан, ҳар нарса десанг ҳам ўзинг биласан! Энди вафо расми сенинг шиоринг бўлсин! Бор энди, худо ёринг бўлсин!

Зайд худди фалакнинг учар отига мингандек, учар юлдузга ўхшаш отини сурди. Зайд тездан қабила томон от чоптириди. Мажнун ҳам қайтиб кетди. Мажнун жон-жаҳди билан Лайли қабиласи кўчиб кетган ергача югуриб борди.

Эй, ёр манзилининг насими, сенинг нафасинг жон атрини сочади! Ўша атирдан беҳуд бўлдим, жонондан хабар бергин, йўқса ўлдим!

XXV

Қуёш чашмаси саратон буржидат макон топиб, ҳарорат зўрлигидан ҳаво ҳубоб сардобаларида** ва ўт тош мусомотида*** яширинганида Мажнуннинг ўтдек изтироб ва шамолдек шитоб билан Лайли ҳашами ўрнига келиб қўтирилтини кўргани ва ит ўз ошинасига ялингандек у итга ялингани; элдан ҳайратангиз хитоб эшишиб, ваҳшатомиз жавоб бергани; ўша ит қошидан кийиклар сұхбатига етгани; унинг мушкин оҳусидан мушк сочувчи хабар етказгани*

Бу майдонда тинмай юргурган киши, сўз майдонида шундай ўйнайди:

Мажнун Лайлининг даманига етганда, осмон қуёши ҳам сайр этарди. Ёз фаслиниң туш чорги бўлиб, жавзо ойининг энг жазирама вақти келган эди. Кун ўз ҳарорати билан жонга ҳалокат келтирас, Лайли каби жаҳонга ўт соларди. Ҳар бир эсанг ҳароратли шамол, Мажнун нафасидек жароҳатловчи эди. Мажнун қум устида оёғи куйганидан, қуюн тагида тинмай югурап эди. Осмондаги барча юлдузлар ҳам қуёшнинг ҳароратидан ернинг соясига яширинган эдилар. Кўкнинг ҳам ҳарорати ошиб, бутун танига шафақлардан ўт тулашиб кетган эди. Кимки тоғдан нишона истаса, уни бир тўда қизиган кул тасаввур қиласар эди. Тоғ ичида гавҳарлар кул ичига кўмилган чўрдек кўринар эди. Иссик ҳаво дарёга ҳам тоб соглан, унинг иссиқдан тўлғаниши эса ўзига гирдоб бўларди. Дарёда юзаётган ўрдакнинг оёқларини сувнинг қайнаши илвиратиб юборар эди. Сувнинг иссиқлигидан қутулиш учун, ўрдак, оёқларини парда ичига олган эди. Кўк ипни ҳароратли табиат қандай оқартириб юборса, пурнур қуёш экинларни ҳам шундай қовжиратиб юборган эди. Буғдойлар қовурилган нўхатлар каби ёрилиб бошоқларидан ажралиб кетган эдилар.

Хирмондаги каклик, қирғовул ва тустовуқлар ернинг қайноқ қозонидан қовирмоч тергандек бўлардилар.

Ўргамчи бўлса шувоққа парда солиб, шу парда ичидаги соя-

* Ҳубоб — сув пифаги, фалак гумбази.

** Сардоба — карвон ўтадиган йўлларда сув сақлайдиган чуқур қудуқ устига қурилган иншиот.

*** Мусомот — баданда тер чиқарадиган майда тепникчалар.

лаб ётарди. Асад ойи бошланиб, итларниң тили ергача осилиб қолган әди. Қуртларни ҳам иссиқ күйдирганидан ҳўл мевалар орасига яширинган әдилар. Қуёш меваларни парвариш чоғида, ғўрлигидаёт құритиб қўйган әди. Қўллар сувни тамом шимиб олганидан, сув ҳасратидан унинг тани тарс-тарс ёрилиб кетган әди.

Ҳажр билан кўнгли бурдаланган, ғам билан жони куйган Мажнун, ногоҳ у ерга етдиким, қабила ундан кўчиб кетган әди. Ақл ва ҳушдан бегона ҳолда у даманин* кўп айланди. Ерда нишоналар қолдириб, бутун хонадонлар у ердан кўчиб кетган әдилар. Унда-бунда қолган уй-жойларни кўриб, юзи билан остоналарини супурди. Айланиб юриб, тасодифан ўша санамнинг уйи жойлашган ерга етди. Кўнглига оловлар шундай тулашники, вужуд мулкини вайрон қилди. Ҳам жисмига, ҳам кўнглига изтироб тушди. Хусусан, кўнгил уйини безагувчи ишқ, унинг кўнглига бу даман ёр маҳомидир, тупроғи эса жонига ватандир деган бир роз солди.

Унинг димоги дилбар исини топгач, юрагидаги ишқ доғи янгиланди. Кўнглини ғам яна топтади, жони бесаранжомликка тушди. Кўнглидаги ишқнинг қўзгалони, жаҳонни ҳам пинҳона қўзғаб юборгандек бўлди. Унинг бу ўти бир лаҳза таскин топгач, у гариб мискин яна ўрнидан турди. Қадамма-қадам манзил тупроғига юзини қўйиб, ҳар қадамда саждалар қилди. Жонон уйининг ўрнини топгач, жонининг пардаси билан уни ёпди. Киприклари билан ерини супуриб, тупроғини кўзлари орасига яширди. Бало туйнугини беркитиш учун, кўз ўшлири билан лой қилди. Тандир ичига кириб, бирпас ётди-да, ўтлик дами билан уни қизитди. Қулларини кўзига сурмадек тортиб, кўз уйини сурмадек қорайтирди. Сўнгра охурга қадам қўйиб, сомон парчасидек бир нафас унда ором олди. Томидан териб олган ҳар бир донадан, кўнглига муҳаббат уругини экди. Ўз оҳидан бирдан куйган кигиз парчаларини, бошидаги ярасига маҳкам боғлади.

Ҳар томонга оҳ уриб, югуриб юрган вақтда, ногоҳ бир қўтириб итни учратди. Терисидаги яралардан гўшти қочган, қашишдан аъзоси қизариб кетган әди. Ҳам оғзи-бурнидан суви оқкан, ҳам жисми бўғин-бўғинидан айрилган. Томирларидан қон қочиб, териси суякларига ёпишиб кетган әди. Аъзосида унда-мунда бир тук, у ҳам унга бир оғир юқ бўлиб, юришга ҳам мажоли қолмаган әди, ҳатто қуйруғининг юкини ҳам кўтиришга ожиз әди. Лаблари бир-бирига ёпишмаганидан, тиш-

* Д а м а н — илгари ҳалқ яшаган (кейин кўчиб кетган) жой, вайрони.

лари иржайиб, гўё ўз ҳолига кулгаңдек бўлар эди. Ўз аъзосига қарашга уялганидан, кўзлари чуқур тортиб кетган эди. Оғзидан чиқсан нафаси, азоб-уқубат насимидир. Букик думи эса меҳнат мимининг думидир. Азобнинг кириши ва роҳатнинг чиқиши учун, унинг танига жароҳатлар юзлаб йўл ясаган эдилар. Бадани илма-тешик бўлиб, шу тешик тан унга тан хизматини ўтар эди. Яралари ичida қуртлар қайнашар, у яралар қуртлар учун ҳам юрт, ҳам озиқдир. Қуртлар унинг ярасини кавлаб юборганидан тили билан ялаганда унга малҳамдек туюларди. Итнинг ҳар нафас ўша қуртларга тил теккизиши, худди душманга қарши қаҳр-ғазаб сочмоқдек эди. Қонли жасадига қўнган зоғлар, лолага тушган доғларга ўхшарди. Ярага ёпишган чивинлардек уларнинг учиб қўнишлари янги яралар пайдо қиласарди. Пашибаларни қўригани мажоли йўғу қушларни қувшишга қандай кучи етсин? Мажнун бу аянч аҳволни кўриб, паришон ҳолга тушди ва кўнгли баттарроқ бузилди.

Итга раҳми келиб, у тўдага воситачи бўлди.

«Эй менинг бошимга тож бўлганлар, кийган кийимлари ва рангу бўйлари муборак! Бошимдаги юзларча яраларнинг нишоналари ҳар бирингиз учун ошиёндир. Оҳларим зарбидан пора бўлган кўнглимнинг тешиклари ҳар бирингиз учун ватангоҳдир. Бу харобага келиб жойланинг, чунки мен жабру жафо чекувчи кишиман. Кўзларимни чўқинг, танимни тишланг, итнинг кўз ва танини қўйинг! Агар шу ожиз итда қасдингиз бўлса, мен ҳам бир заиф итман». Бу ялиниш-ёлворишлилар қушларнинг парвойига келмаганини кўриб, овозининг борича ваҳшат солиб бақирди, қушлар бундан чўчиб, учиб кетдилар.

Ит олдига келиб, унинг гоҳ товонини, гоҳ нотавон гавдасини ўпди. Унинг танида кўпгина яраларини кўргач, ўз кўйлагини ҳам парча-парча қилиб, йиртиб олди-да, у пора-пора бўлган танинг яраларидан чиқсан қонларни тозалади. Танидаги қонларни артгач, яраларини маҳкам боғлаб қўйди. Ўз кўйлагини унга кийгазди ва у кўйлакка қонли ёшларидан гуллар солди. Итни боғлаб бўлгач, юз дард билан мунгли куйлади:

«Эй муҳаббат, вафо билан яратилган кулфатларга тўлган жонивор! Бир вақтлар соғлом ва кўнглинг шодлик, қувват билан тўлган эди. Кечалари кўршапалаклардек уйғоқ эдинг ва қоровуллар сенинг ҳушёрглигингдан бемалол кўкнори ичиб ётардилар. Ваҳиманг билан бўрининг кўзи жовдирап, ҳар тун унинг танига кўзинг олов соларди. Чангалларингга қоплоннинг кўзи тушган чоқда, ғуссадан бошдан-оёқ доғ (хол-хол)

бўлиб қоларди. Йўлбарс ҳам сенинг олдингда ўлик ҳайвондек, тирноғинг зарбидан унинг танида чизиқлар бўларди. Сенинг отилиб сапчишингдан йўлбарслар ҳам ваҳимага тушиб, хижолат тортиб, кўзини юмардилар. Кафтларинг тушган ерни эл, насрин гули ва изларингни Ҳулкар деб англардилар. Қўлларингнинг хинаси гоҳ кийик, гоҳ бугулар қонидан бўлар эди. Бўйнингга шўх гўзаллар ип боғлардилар, шоҳларнинг жилови сенинг бошингда эди. Гоҳ ғазаб билан ириллаб, гоҳ кўк шери каби ҳайқирадинг.

Энди эса шундай аҳволга тушиб, ночорликда қолибсан. Сендан эл нафратланса, мен суҳбатинг билан фахрланаман. Бир вақтлар унинг кўчасида ҳуриб, итлар билан тўс-тўполон қўпорар эдинг. Кечалари эса фифон тортиб, унинг эшигида пособонлик қиласар эдинг. Нега энди бир кун келиб вафо йўлида сен унинг қўлидан бошингга суюк егансан? Нечун бир сенга лутф этиб, бўйнингга қилода* боғлади? Жоним танларингга қурбон бўлсин, тишларингдан бағрим тешилсин! Илоҳо фалак сенинг барча азоб-үқубатларингни даф этсин. Аввалгидан ҳам чаққон, илгаригидан ҳам соғломроқ бўлгин. Бахт сенга яна йўлдош бўлиб, у эшикка яна маҳрам бўлсанг, ўзингни бегона олиб, мен хастани ҳам унутмагин. Жонимни ўша тарафга олиб бориб, кўчасининг тупроғига багишила. Итлар билан қувишиб юрганингда, мен учун улар қошида тиз чўккин. Унинг кўчасида суюк кемириб, озиқланаётган вақтингда, мен заифнинг жисмини ҳам ёд этгин.

Агар бахт толеинг ёр бўлиб, жононнинг ҳарамига йўл топсанг, давлатлилар ўша оstonадан сени қувмасалар, кимса сени у ерда «кет!» демаса, кечаси у ҳарам паноҳинг бўлиб ётоғинг даҳлизи ичида бўлганда, ётиб, иягингни оёғингга тираб, тумшуғингни ўша эшикка қўйганингда, кимсага сездирмай, менинг учун ўша эшикни ўп». Мажнун унинг оғзига кўзини суртиб деди: «Босган изларининг тупроғини ўпиб қўй. Тирноғинг билан менинг икки кўзимни ўй-да, босмоқчи бўлган қадамларининг ўрнига қўй».

Шундай сўзларни бирма-бир айтиб турган чоқда, йўловчилар кўриб қолдилар. Уни таниганлар жуда ғамгин бўлишиб, кўнгиллари бузилиб зор-зор ийғладилар. Танимаганлар эса Мажнуннинг аҳволидан ҳайратта тушиб, ўзгардилар. Қуйганлардан бири бу можародан кўнгли куйиб, ачиниб сўради:

«Эй ишқ ичида чўт бўлган, йўқ, балки самандар бўлган! Баданинг шу ўтдан ясалиб, бағринг шу ўтдан таркиб топган. Зотинг ўт билан йўғрилгандир, сени фаришта десалар ажабла-

* Итнинг бўйнига боғланадиган тасма.

нарлик эмас. Сифатларинг ҳам фариштага ўхшайди, зотинг ҳам малаксифат экан. Нега ит билан улфатсан, ит билан малакнинг қандай муносабати бор. Итга манзил бўлган ҳар қандай уйга малак тушмайди-ку? Ўртада шунчалик номуносабилклар бўлиб туриб, нима учун ёнма-ёнсизлар?» Мажнун оҳ чекиб, йиглаб деди:

«Эй, муҳаббатдан бехабар киши! Сени малак десам таажжуб эмас, чунки сенга ишқ насиб бўлмаган. Менга ўхшаганинг малак демак, ёлғончиликдир, мени дев кўрса ҳам қочади. Бутун борлиғим ҳам нобуд бўлган. Ишқ бутун вужудимни чунон ўртади. У ўтга зеҳн согланингда эди, баданимнинг кул тўдаси бўлганини кўярар эдинг. Ит юриб кетиб, шу кул тўдасида мақом тутса не ажаб? Агар ҳар қандай итга жароҳат етса, кулдан тани роҳат топади. Бу итнинг жароҳати кўп экан, уни шифо бергучи кулдан «кет» деб ҳайдаб бўлмайди. Йўқ-йўқ, унда итлик кўринмайди, итлик жаҳонда фақат менга хос. Ит мен, мен, ҳалқ ор қилган мен бўламан. Бошдан оёғигача яраланган мен бўламан. Кўп яралар танимни тугатдилар, у яраларимга малҳам бўлди. Баданида яралари бўлиб, ундан азоб чеккан кишига кимки дори-дармон билан даво қиласкан, унга жонини ҳам фидо қиласа не ажаб? Менда юз туман жон бўлса эди, баданимда ҳеч қолдирмасдан ҳаммасини ҳам бағишлар эдим. Ҳаммасини унга бағишлиб, йўлида қурбон қиласар эдим».

Шундай жозибали сўзларни айтгач, унинг жунуни (телбалиги) яна ҳаддан ошди. Ёдига дашт ҳайвонлари: кийик, қулонлар билан гашт этмоқ тушди. У итнинг қўл-оёқларини ўпив, кийиклар маконига қараб кетди. Ҳамсуҳбат улфатларини ахтариб, тездан биёбон сайрига тушди. Зайд Мажнуннинг хабарини Лайлига етказиши учун йўлга тушган эди. У ҳай қабиласига етгач, бир хилватда ой юзли Лайлини учратди. У, пардалар ичида гунча билан бу, ташқаридан туриб сирлашди. Зайд, Лайлининг бекарор, девона ёри тўғрисида нимаики билган бўлса, ҳаммасини унга бирма-бир, қолдирмасдан, батамом айтиб берди.

Лайли унинг сўзини эшитгач, тортган оҳидан кўнглининг темири ҳам эриб кетди. Жонига шундай ўт тушдикни, тутунлари бошидан ҳам ошибб кетди. Ўша тутунлар унинг бошига чиққан эдими? Ёки у қоп-қора анбарин зулфими эди? Бу хабарни эшитгач, олов ичидаги зулфи каби буралиб-буралиб ўзини унутди. Кўзидан ҳасрат ёшлари томиб, юз узр билан Зайд томонга боқди.

«Эй, сўзлари танимга жон бериб, хабарлари жисмимда қор юргизган! Жоним дардига даво топгуучи сенсан, одам демайин,

ғойибдан хабар келтиргучи сенсан» деб, кўп узрлар айтиб, унга қимматли тортиқлар берди.

Зайдни ташқарига чиқариб: «Буни олгин, ҳозирча қўлда бори шу, қилган хизматларингни унутмайман, юз шунча нарса берсам ҳам озлик қиласди. Сен бир лутф этиб, вафо кўрсатсанг, мен зору мубталодан бир мактубни, девонавашимга олиб борсангу ҳам менга жавобини келтирсанг?»

Зайд дилбарнинг тилагини қабул қилиб, деди: «Жоним билан, бу мекинг бурчимдир. Тез бўлгин, душманлар воқиф бўлиб қолмасинлар, бу ерда маҳтал бўлиб туриш зарар келтиради».

Лайли давот, қалам олиб, дарров нома ёзди. Кишиларнинг билиб қолишиларидан қўрқиб, хабарчига номани маҳфий топширди. Хабарчи номани олиб, ул гарип шайдога етказиш учун дашт томон кетди. Бутун аҳволларини айтиб, номани у бенавога топширди.

Мажнун аҳволнинг нима әканлигини билгач, ҳолдан кетиб йиқилди. Ўша юз букилган номадек, Мажнун ҳам букилиб ерга йиқилди. У номани очиб ўқиди, унинг мазмуни шундай әди.

XXVI

*Мажнун Лайланинг кеча тўлин ойи-
дек оппоқ саҳифада лайлатулқадрдек
номасини ўқиб, оғзи висол шаҳдидан
ширин бўлганда комига занбур ниши
санчилгани; қалам нукини ари ниши-
дек тезлаб, жавобида қогоз табақини
шира қилгани*

«Кўнгилга ишқдан нур берган тангри оти билан бу номани бошлайман. Ишқ майининг даъвати билан одамлар балоларга мубтало бўлдилар. Шу ишқ майдан бир ҳўплаган бағри қон шўрлик маст бўлди, маст эмас, балки мажнун бўлди. Кимгаки, у майни тортиқ этган бўлса, фироқ заҳрини қўшиб, уни аччиқ қилди. Айрилиқ балосига гирифтор бўлганларга васл шифосини ҳам ато қилди. Булбулники зору ғамгин қилдими, гул кўйлагини ҳам чок-чок этди. Парвонанинг беҳад куйиб, ёниши, шамга ўтнинг насиб бўлиши ҳам шундан». Сўз жавоҳирларини шундай сочиб, сўнгра бу нуқтани зоҳир этди.

«Хитой нақшларига ўхшаган бу сатрлар, бир шикастанинг бир хастага ёзганларидир. Яъни мен зору мубталодан, бало-

дан қутулмаган сенгадир. Эй менинг ишқ ўтидаги хасим, нечуксан? Кўнгли озор топган кимсасизим, нечуксан? Эй, менинг ишқимда беҳуш бўлмоқ учун, васл майидан бирор қултум тотмаган! Эй менинг фурқатимда бошига тош ёғиб, минг тош еса ҳам бошини яширмаган! Эй ҳажрим ўтида кул бўлган, бўлса ҳам, ҳар шуълани гул деб билган! Эй ғамим тиканини жонига урган, булбулдек ноласини жаҳонга тарқатган! Эй жиннилик занжирини қўлига солган, ваҳшийлар қўйругини арқон қилиб белига боғлаган! Фироқимда аҳволинг қандай? Иштиёқимда фикринг недир? Сочларингга хору хас ёпишса, ким уларни бир-бир тортиб олар экан? Бошинг фарқи қўшларнинг уяси эмиш, у ердан қўшларни ким қувар экан? Фалак парчалаган бошингга ким малҳам қўяр экан? Юзингга чанг-тўзон ўтирса уни доим ким аритар экан? Ғам тошидан тананг қонаса уни кўз ёши билан ким ювар экан? Кафtingга кирган тиканларни киприги билан ким чиқарар экан? Ҳажр ўти танангни ёндирганда у ўтга ким тупроқ сочар экан? Азобланган жисминг қўмга йиқилганда сенга ким ғамхўрлик қиласар экан? Ёлғиз ўзинг фарёд уриб, ҳар томон юргурганингда, фақат сояниг сенга ҳамроҳ экан. Тоғлар ораси исиб кетганда устингга фақат бойўғлигина соя солар экан. Вайроналарда сени ғаминг ҳалокатга еткизса бошинг устида бойқўшлар «дух» дея қичқирав экан. Айрилиқ оқшом бошингни олса тонг сенга ёқасини чок этиб боқар экан. Ғамдан заифланиб даштда ётганингда қўмлар сенга тўшак экан. Кечаси йиртқич ҳайвонлар атрофинингда тўпланганда олдингдаги шамъинг бўрининг кўзи экан. Қон ютиш учун пиёла ахтарсанг лоладан бошка ҳеч нарса топилмас экан. Қошингга чибинлар ўтирап, бошингда қуюн айланар экан.

Кошки юлдузлари хира олам, менга ҳам шундай неъматларни бағишиласа. Туну кун рафиқинг бўлиб, йўлсиз югуришда ҳамроҳинг бўлсан. Жаҳонда сен билан мен бўлсанму бутун коинот бўлмаса!. Гоҳ тўхтасак, гоҳ жаҳонни сайр қилиб юрсак-да, бу олам диёрида биздек яшовчи бўлмаса. Иккимиз дилҳоҳлик билан умр ўтказиб, тинчлик билан васл гаштини сурсак. Баданимга бағринг паноҳ бўлса, қўлларим мудом бўйнингда бўлса. Бошинг гоҳ елкамга суюнса, қошинг бағбақам маржонида турса. Гоҳ юзимга юзинг тегиб туриб, лабларим оғзингга баҳра берса. Сояга ўхшаб сен билан бирга ётсак-да, таним тилаган мақсадига етса.

Нима қилайки, фалакнинг бу беҳуда ғавғолари мени бу баҳтдан маҳрум қилди. Сенинг ғаминг кўп бўлса ҳам, эр киши бўлганинг учун бу осондир, осон. Қайси томонга чопай десанг, этагингни тикангина тутади. Этагинг ҳам оёғингни

богламайди, унинг ҳошияси ҳам оёгингга кишан бўлолмайди. Бир мен ожиз нотавон, оёғи боғлиқ, йўқ, балки оёғи синиқ заифман. Не туришга майлим, не юришга ҳаддим бор, юз хил бало кишанларига гирифторман. Бир томон юзлаб аламлар уйида маҳбуслик, яна бир томонда ору номус. Эрлар мажлисинанг зебу зийнати — шародбир, хотин кишининг зебу зийнати — покизалик. Бу ишқ уқубати устма-уст чирмашиб кетди, номус кетдими, ҳаммаси ҳечdir. Ғунча пардасини чок этса, раҳмсиз фалак уни барбод этади. Сенсиз ғамларим бирор лаҳза эмас, сеникидан кўп бўлмаса оз ҳам эмас. Сен ўтли оҳ тортсанг, мен ўтни юрагимда ёқаману, лекин тутун чиқаролмайман. Ғамимда ҳар қанча оҳ чексанг ҳам, Навфал билан устимизга қўшин тортиng. Қабилам юзига бало шапалоқ уриб, саройим аҳлига томон қўрқинчини солди. Отам ҳам мени ўлдириб, қонларимни ерга тўймоқ истади. Мен шунчалик ранж ва озорлар ичида бўлсам ҳам, ёrim мақсадига эришсин деб кўнглим хушдир. Гарчи воқеалар ҳалокатлидир, лекин юз мунча бўлганда ҳам ҳечқиси йўқ.

Яна, мана шундай афсоналарни ҳам айтадилар, гўё сен Навфал билан тил бириктириб, унинг безалган уйига кўз ташлаб, қизига уйланмоқчи бўлиб, оғиз солибсан. Баҳтииг ёр бўлсин, биллоҳ, мен бунга ишонмадим. Сенинг мақсадинг шундай бўлса, менинг ҳам мақсадим шудир. Бир куни боғда тамоша қилиб юрганимда, у санамни кўрган эдим. Узи дуруст, элга меҳрибон, яхшигина жон деса ҳам бўлади. Ҳақ таборак сенга қўлдош бўлсин! Бу хайрли ишинг муборак бўлсин. Уша билан хуррам бўлган чоғларингда, бу хастани ҳам гоҳ-гоҳ эслаб қўй! Инсофни ҳам тарк этмагин, мени ҳам бир йўла унутиб юборма!»

Мажнун бундай мактубни ўқиб бўлгунча тани қаламдек титраб, мадорсизланди. Зайд олдига қайта-қайта бошини қўйди ва селдек кўз ёшларини тўкиб, арз этди: «Эй чок бўлган юракка чора изловчи, малҳам орасига ништарларни жойлашибтириб келган! Келтирган номанг жонни азоблади, нима қилийки жавоб ёзгани асбобим йўқ». Зайд ўзи билан бирга қоғоз-қалам, сиёҳ ҳозирлаб, олиб келган эди. Ҳаммасини бир-бир Мажнун қошига қўйди, у эса жавоб ёзишга тушди. Зайд жавоб мактубини олиб турди-да, жадаллаб йўлга равона бўлди. Чопища шамолга сабоқ бериб, мактубни дилрабога топшириди. У суманбар хилватга кириб, мактубни очди, суман гули устига тушган анбар зарраларини кўрди. Бу қора сатрларга тездан назар солди, номадан эса шундай гавҳарлар тўкилар эди.

XXVII

*Лайли Мажнуннинг кўз қорачиги ва
қиприги қалами билан жон саҳифасида
ёзган кўнгли заҳарлари шарҳини ўқи-
гани; ишқ ҳамдардлиги тақозоси билан
Мажнун кўнглиниң жароҳатлари му-
нинг ҳам кўнглини оғритечани; унинг
ҳам қайгуланиб, еган-ичгани заҳарга ай-
лангани*

«Ишқ аҳли номидан қалам кўтарган тангри оти билан бу номани бошлайин:

У тангри шундай якка ва ягонаки, унинг ибтидоси номаълум, у шундай барҳаётки охири — ниҳояси йўқ. Тоғ балчиғи устига дўл ёғдирган, қумтупроқ устига мола юргизган. Ҳар кимни пари юз айлаган бўлса, ўжарликни унга одат этган. Айрилиқ қулфатини қаттиқ яратиб, ишқ шарбатини аччиқ яратган. Бирорни пинҳоний ишқ ўтига куйдириб, маъшуқни бераҳм этган. Неча-неча ошиқларни ношод, маъшуқларнинг истагини зулм қилган. Ошиқ кўнглини парча-парча этиб, маъшуқини бу ҳолдан хурсанд этган. Маъшуқ томон насимлар эсдириб, ошиқ ичига ўтлар туташтирган!» Мактубининг аввалини шундай сўзлар билан безаб, ундан сўнг қуидаги сатрларни бошлади:

«Ушбу ғам ва аламларнинг баёни — жоним саҳифасидаги бағрим нишонасидир. Ичи ғамингда қон бўлган мендан, ғами танимда жон бўлган сенга. Яъни расволик алангалари ичida ўтранган, афсона бўлган бу девонадан, гулюзлилар орасидаги парига ва юлдузлар орасидаги Шарқ қўёшига. Не ҳаддим билан дуо айлаб, юз мадҳ билан мақтайин сени? Мадҳингни айтгали тил қани, тил бўлса ҳам гапира оларми? Кун васфини кўршапалак қайси куч, қайси тил билан айта олади? Савсан ҳар қанча тил узайтиrsa ҳам гулни таърифлашда соқовланиб қолади. Мен шулардек бўлсам ҳам, ноилож бир неча сўзларни дейман:

Эй ҳусн ўлкасининг подшоҳи, бутун ҳусн аҳли бу ўлкангнинг қўшинидир. Эй нозу карашма боғининг атиргули, атиргул эмас, балки ноз қилишни одат қилган гул. Эй лутф дунёсининг баҳори, юзинг баҳорнинг лолазори бўлган. Саҳар ели гул сочганда, кокилларингни паришон айламасмикан? Машшота ўсма қўйганда, қошлиарингни қайрилма қилмасмикан? Хумор кўзларнинг бемор эди, энди соғ ва равшан бўлиб кетдимикан? Рухсоринг ўтидаги қора хол әлни ҳам ўзидек куйдимикан?

радими? Сумбул сочларинг гул баргига тегиб, оловга тушган қилдек ҳеч буралармикан? Юзингнинг тери ва тола-тола сочларинг, бу ҳар иккисининг обу тоби бормикан? Оғзинг камоли торлигидан кўзга илашмас эди, сўзлаган вақтда у кўринармикан? Қадди-қоматинг юриш ҳавасига тушганда, жаҳон элини ўзига гирифтор этармикан? Ноз уйқусидан уйғониб, юз ноз билан элга сўзлармикансан? Кўйингда менингдек хас каби, ҳатто хасдан ҳам қадрсиз киши топилмайди. Бу оллоҳнинг иродасидандирким, эл бунинг ҳақиқий моҳиятини билмайди. Кошки кўзим ўйилса эди, кўз тугул, бошим кесилса эди. Кўзимнинг ул дилрабо юзига тушишини ва жон билан кўнгилнинг балога дучор бўлишини аввалдан билганимда эди, икки кўзимни кўр қилган бўлар эдим. Мен ким эдиму бундай абадий дардга йўлиқиш, заррага қуёш ҳавасида бўлишлик нима эди. Беҳосдан нигоҳим юзингга тушган бўлса менинг нима гуноҳим бор эдики, бунчалик дарду балолар мен шўрликнинг қора бошига тушибди. Девона бўлиб жаҳондан чиқибман, хонумондан ажralиб овора бўлибман. Ҳар кун ўзга бир водий ватаним бўлиб, ҳар кеча яна бир дамаҳ қоронгу ерларида турайман. Қумлар менинг кўрпа-тўшагим, кулчага ўхшаган қуёш эса менинг патирим бўлди. Тоғ чўққилари менинг отим, самум ҳулласи менга тўн бўлди. Гоҳ ваҳший ҳайвонлар билан дўст ва ҳамсуҳбат бўламан, гоҳ улардан ҳам безаман. Менинг ваҳшатим дашт бўйи ёйилиб, бутун ваҳший ҳайвонлар, ҳатто-ки ғуллар ҳам мендан қўрқиб қочадилар. Ваҳший ҳайвонлар ваҳшатимдан ҳайратга тушадилар, қушлар ҳам кулфатимдан ранжу алам топадилар. Бошимдаги кулфат ва балолар ақлга сифмас даражада кўп, ҳолсизлик эса мени ҳаддан ташқари заиф этибдир. Бир хил йўқлиқ менга жисм бўлипти-да, унга вужуд деб исм берилибди.

Шундай ҳолсиз ва кучсизманки, юрганда ўргамчи танобидан йиқиламан. Кўксимни ҳижрон тифи чок этганидан, ҳашоратлар қўрқмасдан ичимга кириб жойлашганлар. Кўксим ичига кирган чибинлар гавғо қўзгатиб, чумолилар кўзим уйига ватан қурганлар.

Шундай қаттиқ қийинчиликларни тортсам ҳам, ёдинг менга тириклиқ берар эди. Шу онда гавҳарлар сочгучи қаламинг билан ёзилган номанг менга тегди. Ул номани ўқиб, сўзларидан руҳландим, ҳар ҳарфидан юзларча шафақ ва марҳаматлар топдим. Лекин у номада ёзилган икки сўз жонимга қайта-қайта ўт солди.

Биринчиси: Навфал воқеаси тўғрисида ёзганинг. Яъни «икковингиз қонхўр қўшинингиз билан менинг қабиламга тиф чектингиз» дебсан. Эй тавба, бу ҳандай балодирки, риштани

аждаҳо санайдилар. Пашшанинг ўзи нимаки, у филлик ҳаёлига тушса, ёки шерлик кучини кўрсатишлик чумолига қолиптими?

Воқеа шундай эди: у лашкарбоши (Навфал) менинг кўрганда йиртқичлар менинг қўшиним эди. Гамингда нотавонлигимни ва ишқингда жонимнинг хасталигини билгач, бирпас қошимда ўтириди-да, ундан сўнг билганича сўзлабди. Мен бўлсан дам ўзимда, дам ўзимни тутолмасдим ва бундай ажабланарли ҳол оламда кўрилмаган эди.

У сўзларкан, изтиробга тушганини кўриб, нима деб жавоб берганимни ҳам билмайман. Ул менинг ўзи билан уйига олиб кетгандан кейин, ўзингга маълум ишлар бўлди. Унинг юрагидаги ўчни тездан англаб, жоним борича йўлини тўсишга тиришдим. Натижада ўч ханжарини қинига солди ва ўз уйига қайтиб тинчланди.

У мени алдаш учун уринган вақтда, менинг уйланишим тўғрисида ҳам гапирган экан. Унинг нималар деганини ҳам англамадим, ўзим нима деб жавоб берганимни ҳам билмайман. Эсимдан ҳам чиқиб кетган экан, номангни ўқигач ёдимга тушди. Бундай ишларни менга нисбат бериш, муруват аҳлининг иши бўлмаса керак?

Мен вафо кўраманни деб, бунчалик балоларни чекаману сен эса бундай муддаоларни хаёл қиласан. Сенинг ёзганларигни қандай рад қиласай, ҳушсиз киши ҳар нарса қиласа ҳам қиласди.

Девоналил ғавғосига мубтало бўлиб, бошдан-оёқ ўзимни йўқотганман. Номангга кўнгил ва кўзим қурбон бўлсин, лекин сенга айтадиган битта сўзим ҳам бор:

Навфал тўғрисида айтганларингни мендан кўрма, мен мундай хатоларга бормайман. Бу ҳодисаларнинг ҳаммаси ишқим ва девоналигимдандир. Ишқ ва жунунга эса сен ўзинг сабабсан!

Уйланмоқ тўғрисида гапириб ўз ишинингни менга туҳмат қилидинг. Чунки Ибни Салом сенинг хаёлингни қилиб, ҳатто висолинг тамаида юрибди. Отанг эса Ибни Салом кўнглини рози қилиб, у нима истаган бўлса кўнибди. Сенинг рози ва рози эмаслигингни билмайман, билмаганим учун туҳмат ҳам қилмайман.

Ҳай-ҳай, бу қандай афсоналар, чегарадан ташқари қандай тароналар бўляпти-я?! Гёё ишқ савдоси йўлимдан уриб, ҳушимни телбалик шамоли совурди. Шуур билан сўзлаш шиорим эмас, беҳуда гаплар айтишда ҳам ихтиёрим йўқ.

Эй, парига ўхшаган ҳур! Мен телбаман, бу узрликдир, маъзур тутасан. Сенинг ғамингда нобуд бўлган эканман, но-

буд кишидан маъноли сўз чиқармиди!? Йўқнинг сўз ва хитобларини ҳам йўққа ҳисоблаш керак. Менинг йўлим йўқлик бўлган экан, сен бор бўлгин-да, бу йўққа ёр бўлгин.

Иқбол ва баҳт ёринг бўлсин, жонлар эса сенга қурбон бўлсин...» Бу мактубни ўқигунча дилкаш ёр, букилган мактубдек қадди кўп букилди. Кечгача мактубдаги ҳар бир сўзни ўйлаб, нома каби буралиб-буралиб кетди. Ниҳоят инсофга келиб, ҳақиқатан ҳам ўз сўзларининг жавоби эканини билди. Лайли ўз номасидан ташвишга тушиб, бу нома эса кўнглини хурсанд қилди. Унинг маънодор, ўлчовли хатини Мажнун тумор қилиб тақиб олгандек, бу ҳам унинг хатини тумор қилиб тақди.

Эй мактуб ташувчи әлчи! Ҳарна хабар сенга равшан бўлса айтгин. Бир сўз билан дардимга даво бериб, номанг бўлса менга чиқариб бер!

XXVIII

Мажнуннинг отаси дашт атрофини қуяндек кезиб ўз девонаниҳодини саргашталикда топмоғи; жунун даشتни қароқчилари ҳар дамда унинг ҳуши каревони одамларини савдоийлик сипоҳига асир этганидан ажисб ҳолатга тушиб қолгани; насиҳатлар ҳуш доруси билан уни бирлаҳза ўзига келтиргани ва ўзи билан уйига олиб боргани

Бу номани ёзган киши афсонани шундай маълум қилади:

Телба Мажнуннинг бенаво отаси ва юзларча кулфатларга мубтало онаси, кўнгилларини дардлар жароҳатлаган ҳолда, кўп вақтлардан бўён ўғилларидан айрилган эдилар. Ўз ўғлини соғинган ота, уни топиш ниятида иттифоқо саҳробага чиққан эди. Мабодо топиб олсан, фифон-зоримдан шояд у таъсираниб, панд-насиҳатларим унинг афғонларини тўхтатса, сўзларим шояд уни ўзига келтирса. Юзлаб нуқта айтишга тилини чоғлаб, сўзларим шояд уни уйга қайтишга мойил қилолса. Руҳини шундай тоза умидларга тўлдириб, ҳар томонга тевасини чоптириар эди. Шундай ният ва орзу билан неча кун чопгач, охири Мажнунни бир вайронада топди. Мажнун учун бу вайронада ер хонумондан ҳам яхшироқ эди, лекин ўзи бу вайронадан ҳам ҳаробароқ эди. Унинг қайғу ва аламлари ҳаддан ташқари, ақлга сигмас даражада кўп эди. Гоҳо чумолилар тутар ва гоҳо тупроқдан гўрлар ясад ўтиради. Гоҳо шошилиб

кесак ташиш билан машғул бўлар ва у кесаклардан тепаликлар ясашига уринар эди. Гоҳ бошига тупроқ сочар ва гоҳ тишлиари билан тирноқ олар эди. Гоҳ оёқларини дадил кўтариб, илдамлик билан деворга минар эди. У ҳар дамда баданларини чимдилар ва енгларини чайнар эди. Гоҳ бойқуш сайрашига ҳамдардлик билдириб, гоҳо бойўғлиниг юзидағи чангларини артар. Бойқуш ҳам Мажнуннинг қўлига тортинимай қўнар, бүм қуш бўлса ўз шохини бошига суртар.

У вайронанинг деворларига хат чизганида, ихтиёrsиз «оҳ» калимаси ёзилиб қолар эди. Замонанинг унинг бошига туширган яралари бошдаги соchlардан ҳам кўп эди. Қонли кўзидаги тикан ва чўплар, киприклиридан ҳам кўп эди.

Бундай ҳолатни кўрган отаси ҳайратга тушиб, ўз ерида қотиб қолди. Таажжуб билан деди:

«Бу ниманинг тимсоли экан, субҳоноллоҳ, бу қандай аҳвол экан? Бундай одамзодни ким кўрган экан; бу тахлит одам ҳақида гапиришмаган ҳам эди-ку?!»

Бу аҳвол отасига жуда оғир туюлса ҳам, куйганидан унинг олдига боришга мажбур бўлди. Мажнун отасини кўргач, гўё оталик ҳақини унутгандек ўзини бир чеккага олди. Отаси эса ёқасини йиртиб йиглади ва ғамгинлик билан сўради:

— Эй, юзларча яралик кўнглимнинг парчаси, мендан нега қочдинг?

Мажнун ҳам ўз отаси эканлигини билиб, бир оҳ тортиб, унинг олдига йиқилди. Отаси унинг бошини кўтариб қуchoқлади, ўйлида жонини фидо қилмоқчи бўлди. Худди икки ҳамжинс ҳарф бир-бирига туташгандек, улар ҳам бир-бирларига шундай маҳкам чирмашиб кетдилар. Ҳар бир лаҳзада йиги ва ҳижрон аччиридан ҳаяжонга тушар эдилар. Ҳаяжонлари пасайгач, у заиф мискин, яъни Мажнуннинг отаси дедиким:

— Эй юрагимнинг пайванди ва кўнглимнинг парчаси, отонадан узоқлашган фарзанд! Кўксимдаги яраларни бунчалик сўкма, бағрим қонини бунчалик тўқмасанг-чи. Сенинг кўксинг ғамдан яраланган бўлса, менинг жигарим аламдан яра бўлди. Бир дам жигаримни ковламасанг-чи, унинг не хилда эзилаётганини кўрмайсанми? Сен дунёга келмаган вақтда, қонинг қонимга аралаш бўлганда, сени не муддаолар билан тираб, садақалар бердим, дуолар қилдим. Очларни тўйғазиб, ялан-ғочларни кийинтирдим, ўлдим деганимда сени топган эдим. Уч-тўрт ёшга киргунингча менга қўл чўзмаган ғам ҳам қолмади. Сен бир қатра сут эмгунча, мен юз қатра қонлар ютар эдим. Агар товонингга тикан киргудек бўлса, менинг жигаримга ништар санчилгандек бўларди. Илм ва одоб олиш мақсади билан мактабга борганингда, сенинг гамингни еб,

мактабга бориб келишингда ҳар қадамингдан бохабар эдим. Фазлу камолга эришиб, илму ҳунар әгаси бўлишингни тилар эдим. Бевафо дунёдан менга ўлим хабари келиб, таним нариги дунёга кўчмоқчи бўлиб, худди ота-онамни ва барчани бир-бир олиб кетгандек, мен ҳам ўлим тўшагида ётсам. Сен ўша вақтда қошимда ва гоҳ оёғимда, гоҳ бошимда бўлсанг. Тангри амри билан танимдан жоним чиққанда, ҳаёт шамъим ўчганда, ип каби печу тобга тушасан, парвонадек изтиробга тушасан. Сен умримнинг давоми бўлиб, қабилам яна ёргуланди. Гарчи шамъ нуридан ажралса-да, машъял қабила йўлини ёрита олади. Эл ичиди отим ҳам йўқолмайди ва молу давлатим ҳам бегоналарга қолмайди. Қалъамга йигилган хазина—давлатим бариси сенинг қўлингда қолади. Шамоллар ҳам у зийнатли уйларимга киролмайди, ҳеч кимса ҳам саройимга қўл чўзишига ботинолмайди. Руҳим авлодим билан шодланиб, қавму тўпим бахти яшаяjak.

Мана эндиликда бу ишлар қошимга келди, айтганларим бошимга келди, тонгимга кулфатларнинг қора шоми келиб етишди, шомимнинг жўнаш тонги отди. Бошимга ҳар ёқдан ғамлар ёғилди, битта ғамим сен туфайли юз ғамга айланди. Шамъимга зулмат тушган, унинг сўнишига сенинг оҳинг сабабчи бўлди. Жоним қуши ҳар дам учишни тиласа, сенинг фарёдларинг уни ҳуркитади.

Жонингнинг бундай ишқ азобига тушишга ихтиёринг йўқлигини билар эдик. Ҳар қандай ишнинг ҳам этаги ва ҳар қандай фалокатнинг пироварди бор. Жаҳонда ишқ аҳлини кўрмаганимизми, ишқ водийсида югурмаганимизми? Бу ишда бундай тарзда мағлуб бўлиб юриш ақлли одамлар шаънига яхши эмас! Денгизга тушган ҳар бир бенаво, агар қўл-оёғи билан ҳаракат қилса қутулади. Ғарқ бўлган талпинса, чиқишига ҳам имкон топади, талпинмаса ўлмоғи ҳам мумкин. Сен ҳам бундай балода қолмагин, ўзингни бир йўли унга бағишлимагин. Билур қадаҳга тушган чумолига ҳам ундан чиқмоқ учун куч эмас, тадбир керак. Ҳар кишига қандай дард берган бўлса, давосини ҳам ўзи қилади. Ҳақ сенинг бошингга бундай балони солгани экан, уни даволашга ҳам ожиз эмас. Бу дағдадан ўзингни тортгин, ҳар қандай фикр қилиб бўлса ҳам чора топгин! Бу дардан бирданига қутулолмасанг, аста-секинлик билан қутулиш ёмон бўлмайди. Секин-аста бола мутафаккир бўлади, сокинлик билан қамиш ҳам қандга айланади. Агар киши юзга кирмоқни тиласа, унга юз йил сабр қилмоқ керак. Ҳар ким минора учига чиқмоқчи бўлса, чиқиш ва тушишда зинълари бирдақдир. Юқорига чиқиш қийин бўлса-да, ундан тушиш осондир. Сен ҳам аста-секинлик билан йўл босиб бу

ерга етибсан. Қайтиш тилагида бўлсанг, яна шунчалик йўл босишинг керак. Қайт энди, рахна боғлиқ эмас, бундай сафаринг яхши эмас! Сенсиз мен бундай зору ғамгин, онанг ҳам сенсиз беқарордир. Оқшомдан тонгача мунгли товуш билан йиглаб, тонгдан оқшомгача қонли кўз ёш тўқади. Ўғлим деб чеккан нолалари чарх ўқининг қаддини эгади. «Бўтам» деб шундай зорланиб тўлғонадики, руҳидан асар ҳам қолмайди. Йиглаб бошларини тошга ураркан, бошига урилган тошлар ҳам аламда қолади. Бу ўт димоғини куйдириб, оқ сочи эса юзига кофур сочади. Сенинг тоғдек кулфатлар тортишингни билганидан, унинг ҳам ғамлари тоғдек бўлди. Тупроққа йиқилмоғингни билгач, у ҳам тупроқ устига йиқилди. Сенсиз шундай дарду ғамларни торта бериб, бир-икки дамлик умри қолибди.

Мен ҳам, у заиф онанг ҳам шу аҳволга тушиб қолдик, кел энди, ҳар иккимизга чора топгин ахир! Ҳаётдан умидимиз кетиб, ўлиш чотимиз яқинлашибди. Бегоналарни уйга яқинлаштирма, иссиқ ўрнингни совутма! Биз иккимиз сенинг гамингда ўлсак, сен тирик бўлсангу мотамингда ўлсак. Бу ишда тангри сенга хитоб қилганда, ўйла-чи, нима деб жавоб берасан?

Отаси шундай таъсирчан илтижолар қилгач, Мажнун ҳам йиглаб отасининг оёғига йиқилди. Киприклари билан отасининг оёқ остини супуриб, жавобида доноларча фикр юритди:

— Эй қабилангнинг эшиги қиблагоҳим, оҳим дардинг ўти-нинг нури! Ўйлаган чораларинг хирмоннин кўнглімнинг ўти кул қилди. Сен ўйлаган сабрларни кўз ёшларим сели оқизиб кетди. Шунча гапирган гапларинг билан куйган кўнгил оловига сув урдинг. Иўқ-иўқ, доф устига доф солиш учун ўт ёқдинг-да, устига ёғ қуидинг! Ҳар бир айтган сўзларингга жавоб бергани менда ҳад йўқдир. Сенинг ҳукмнинг жоним орзусидир, бу ҳукмни бажо қилиш эса менинг бурчим. Сенинг олдингда нималар ҳам айта олар эдим, жавоб бўлса ҳам у яна йўқ ҳисоб.

Лекин сенга шуниси ҳам яширин эмаски, бу ишларнинг ҳаммаси тақдирдан эди. Бу балоларнинг ҳаммаси менинг бошимга тушиб, расвойи жаҳон этди, бундай балоларнинг юз бериши кишининг ўз ихтиёри билан бўлмайди. Ишқ ўти ундан чиққан бир учқун, бутун жаҳонга тўфон солади. Юз шульлани маконимга уриб, мингларча чақмоқларни вужудим хирмонига урди. Бир учқун хирмонга тушар экан, унинг куийишдан бошқа чораси бўлмайди. Раҳмсиз ишқ мингларча чақмоқшар ёғдирса, унинг қаршисида хашак нима ҳам қила олар эди. Ҳар қандай буйруғинг бўлса ҳам сўз қайтармайман,

лекин мен энди Қайс әмас, балки Мажнуунман. Сен ўйлаган сарв хасга айланди, эндиликда бўлса хас ҳам кул бўлди. Бу кулни яна қуюнлар айлантириб, сарвга ўхшатиб, осмонга чиқаар. Сен келиб менга назар солганда, мен бахти қаронинг бир жойда туришга майлим, ҳаракат қилишга маъжолим йўқ, азоб-уқубатларга гирифтор эдим. Қочишим сени танимасликдан, балки танишингга арзимасликдан эди. Ваҳший ҳайвонлар орқасидан кетиш ярамайди, одам ёввойисини эса, одам қилиб бўлмайди. Сенинг итинг бўлсан дейман, лекин ўзимга итчалик ишончим йўқ. Ит одамга бевафолик қилмайди, бошини олиб бир ёққа кетмайди. Мен, ўз эгасига узр айтиб ва бу даштда телба бўлган итман. Агар телба итнинг тузалиши ва унга ишониш мумкин бўлса, сен ҳам мени ақлли қил, ҳар ишни қилсан ҳам ишонгин. Узримни сенга айтдим ахир, ҳар бир ишимдан афв сўрайман!— деб сўзини тамомлагач, дарров ўрнидан туриб, тuya томонга қараб кетди. Туянинг жиҳозидан теизда арқон ечиб, уни ўз бўйнига маҳкамлаб боғлади. Арқоннинг бир учини отасига тутқазиб, деди: «Бу мубталога нима дессанг деявер, қўлингда бўйни боғлиқ итман!» деб ўзини тўрт оёқлик қилди. Отаси эса унинг бўйнидан арқонни ечиб, ўз юрги сари равона бўлдилар.

Навоий жунун йўлига тушса, ким унга ватани сари раҳнамоси бўлади?! Мажнуундек отаси ҳам йўқ, ўз масканига. бориш иштиёқи ҳам йўқ.

XXIX

Навфалнинг Мажнуун қабиласи меҳмонлигидан қайтгач, Мажнуун отасига мезонлик қилгани; пайвандлик или ораларида маҳкам бўлиб, меҳмон уйига келмасдан Мажнуун биёбонга азм қилиб, Лайли чўпонига йўлиққани; у чўпон итидек яшиниб, чўпон уни қўйлар орасига яширгани; Лайлини кўргач, қурбон қўйи (Мажнуун) билан хўтган жайрони (Лайли) нинг йиқилмоғи; ҳар қайсини бир васила билан ўз қабилаларига элтганлари

Сўз карвонининг карвонбошиси хуруш билан шундай қўшиқ бошлайди:

Мажнуун уйига келганда, ғамгин бўлган қариндошлари қайтадан шодландилар. Отасидаги нотавонлик йўқолди ва

онасига ҳам янгидан жон кирди. Мажнунга чиройли, ипакдан тўқилган либос кийдирдилар. «Мажнун ўзига келибди» деган дарак ҳар томонга тарқалиб кетди. Элга шоён бўлган бу хабар Навфалга ҳам бориб етган эди. Навфал ҳам ҳамиша Мажнуннинг гамини еб, доим унинг фикри ёдини қилиб юрарди, яъни фикрини унинг хаёли билан банд этган эди, жонини унинг висоли ҳайратга солган эди. Мажнуннинг келган хабарини эшитган Навфал, кўп хурсанд бўлиб, бориб кўришни орзу қилиб, отланиб Мажнун қабиласига жўнади. Бундан хабар топган Мажнун эли ҳам, меҳмондорчилик тантанасини жойига қўйиб, уни шодлик билан кутиб олдилар. Мажнун билан бу эпчил лашкарбоши катта меҳрибонлик билан маҳкам қулоқлашдилар. Мажнун эли Навфалга иззат ва икром билан оқшомгача мезбонлик қилди. Навфал бундай меҳмондўстликдан жуда хурсанд бўлди, Мажнун эса ўз қилган ишидан лол эди.

Қуёш навфали ўзини яширганда, осмон мажнунни кўз ёшини кўпайтирди.

Юлдузлар йўл кулчаларини ёйиб юбордилар. Навфал отланиб йўлга тушди. Йўл бўйи ҳамма шод-хуррам кетар, Мажнун бўлса уйда ношод қолган эди.

Мажнуннинг отаси Навфалнинг келишини ўйлаб юрарди, меҳмоннинг бу ташрифи билан муродига етди. Чунки Навфалнинг келиши уни ўз қабиласида иззат-ҳурматини ошириди ва шод-хуррам этди. У Навфалнинг Мажнунни илгари кўрганлигини ёдига туширди: «У Мажнун иши учун ўчакишиб, Лайли элига тиф тортган эди. Мажнуннинг гамини еб, уни ўзига куёв қилиш тилагини ҳам айтган эди. Шаксиз бу ишга майли борлигидан, бизнинг саройга келиб тушди. Шундай бўлмаганда эди, Мажнунни кўриш учун ҳам келмас эди. Энди мен ҳам одоб, ҳурмат юзасидан бутун ҳай қабила аҳлини тўплаб, унинг хизматига бориб ҳурмати бадалига ҳурмат кўрсатсан. Агар у лутф кўрсатиб, бу таклифга рози бўлса, муддаомизни баён қилсак. Рози бўлса баҳтдан қувонсак, йўқ деса яна қабилага қайтсак».

Қабиладаги уруғларни чақириб, уларга ўз мақсадини арз этди. Бу сўз ҳаммаларига маъқул тушди, тездан шу ишга киришишни лозим топдилар. Асл орзу Мажнун иши бўлганидан, унинг боришини лозим кўрмадилар. Бутун керакли нарсаларни тайёрлаб, ярим кечада ҳулкардек тўпланишиб, ҳар турли тадбирларни кўриб, йўлга равона бўлдилар. Йўлда бу мақсад борасида, юз хил афсоналарни, навбатма-навбат сўзлашиб, шундай сўзлар билан ўзларини хурсанд қилиб борар эдилар.

Кўпгина даштни босиб ўтганларидан кейин, Навфалнинг уйига кириб бордилар.

Навфал ҳам иззат ва икром билан меҳмонларни ўз уйига жойлаб, ором берди. Анча ўйин-кулги, ашулалар билан меҳмонларни жуда хурсанд қилди. Меҳмонлар қулай фурсатдан фойдаланиб, ўз тилакларини Навфалга айтдилар. Навфалга уларнинг тилаги ҳам маълум бўлди, ҳам маъқул тушди ва шундай деди:

— Мен ҳам илгари бу сўзни Мажнунга айтиб, унинг гамини еган эдим. Модомики унга шундай таклиф қилган әканман, ҳозир ҳам фикрдан қайтмайман. Сиз энди ўз қабилангизга бемалол бораверсангиз ҳам бўлади, тўй тайёргигини ўзим бажараман. Сизнинг ортиқча ташвишга тушишингизни мен тиламайман. Фурсатни ганимат топиб, тайёргингизни кўриб, биз томонга келинг. Никоҳ шартлари шу тарзда бўлса, Мажнунни ўзимга фарзанд қиласин...

Никоҳ ваъдаси тайнинлангач, меҳмонлар қайтишга қарор бердилар. Шодлик билан уйга қайтдилар, лекин замонанинг феълидан бехабар эдилар.

Уша кечада улар оромсиз, Навфалнигига қараб кетганларида, Мажнун аламга ботиб уйда қолган ва кўзидан гулранг ёшлилар тўкар эди. Ҳижрон ўти уни беқарор этиб, ишқ унинг ихтиёрини қўлдан олган эди. Ишқ ўти аланга олди, куйиб кетганидан бехуд бўлиб уйдан чиқди. Бошяланг, оёқяланг ҳолда гоҳ «ҳув!», гоҳ «вой!» деб дашт узра югурди. Мажнуннинг қомати ёй, оҳи ўқ бўлиб, дунёни нишонга олган эди. У бу ёйга ўқ жойлаб, дунёниг кўзига ўқ урар эди. Унинг оҳлари ҳавода осмон бўйлаб сайд этувчи қуёшдек юрар, ёрнинг муҳаббати уни қуёш чиққунига қадар югуртирасин.

Бу фалак кампири эчкисини соғиб, сут қатраларини оҳисталик билан артди (яъни шарқдан оқариб тонг отди). Шу сут билан барча ҳунарни ишлатиб, тездан тўгарак патирини кўрсатди (яъни қуёш чиқди). Шу вақт унинг кўзи бир гала қўйга тушди; чўпони таниш кўринди. Мажнунни кўрган чўпон ҳам ҳурмат билан унинг аҳволини сўради.

Мажнун деди:

— Эй муборак юзли, Мажнун сени қайдга кўрган эди? Ёруғ юзинг менга ошна кўринди, дардимга сўзинг даво кўринди. Сен ҳам мени иззат қилдинг, мен ҳам сенга әркаландим.

Чўпон унинг оёғига бош қўйиб, қуйидаги сўзларни айтди:

— Менинг ишим чўпонлик, қўй билан қўзига меҳрибонликдир. Бу тилсиз галанинг ҳамзабони, Лайли қўйларининг чўпонидирман. Сени бу қабилада азоб билан сабоқ ўқиган чоғ-

ларингда кўрган эдим. Ишқингнинг азобини ҳам биламан, ҳар қандай чора бўлса ҳам қўлимдан келади!— деди-да, Мажнун товонига бошини қўйиб, қошини этикларига наъл этди. Мажнун деди:

— Эй нафаси баданимга қон бериб, сўзи танимга жон бағишловчи! Исодек ўликни тиргизиб, ажойиб мўъжизаларни кўргазасан. Йўқ-йўқ, чўпонликдаги Мусосан, қўлингдаги таёғинг ҳам аждарга ўхшагандир. Мусо нима, балки йўлимнинг Хизири ва ғам зулматида менинг паноҳим бўлдинг. Менга оби ҳаёт бергин, яъни Лайлини узоқдан бир кўрайин. Ҳижрон билан жоним жуда хаста бўлган, раҳм қилгинки, жуда нотавонман!

Чўпон деди:

— Эй ақл-фаросат эгаси, оқшомгача менинг ҳамсуҳбатим бўлгин. Мен бутун тадбирларни кўриб, ишингга бир чора топайин.

Мажнун эса уни дуо қилди, лекин бир кун унга худди бир йилдек туюлди.

Қўёш мағриб томон юз тутгач, чўпон ҳам қўйларни Лайли қабиласи томон ҳайдади. Бир қўй терисини дарров Мажнунга бериб, деди:

— Устингга ёпинггин. Қўйдек, бу терини ўзингга кийим қилиб, бошдан-оёғингча ўраб олгин. Қўй, эчкilar орасида ёнгаш, ошиқ бўлсанг бу вақтни ганимат бил. Баҳор осмонига чиққан қуёш каби, пари юзли гўзал, яъни Лайли, қизлар билан ўйнаб-қувнаб, қўй соғишини тамоша қилиш учун келади. Сенинг бошингга етиб келгач, истаганингча уни кўрасан.

Мажнун қўй терисини ёпиниб қўйлар орасига кириб, қаддини букиб эмаклади. Замона фитна чиқаргунча, у тўрт оёқлаб борар эди. Қўйлар қабилага етганда, қизлар тамошага чиқиши учун ошиқдилар. Қизлар юлдузлар каби тезлик билан чиқдилар: Лайли улар орасидаги моҳи тобон эди. Бу ойнинг ишқ билан азоби ортиб, ўзи паришон, зулфи ва холи қоп-қорайран эди. Айрилиқ ўтидан юзларига тоб тушиб, гул барги каби юзи кўз ёшлари билан сероб бўлган эди. Кокиллари йўлинни супуриб, оламга ғавғо, тўполоннинг чанг-губорини сочар эди. Фитна унинг кўзига сурма тортиб, жон олиш учун кўзини қорайтирган эди. Юз шуъласининг тутунларидан қора рангга кирган киприклари эса ўлдирмоқни чоғлар эди. Унинг ўтлиғ юзи шундай жозибали бўлганки, Мажнунни ўлдириш у ёқда турсин, доноларни ҳам куйдиришни чоғлайди.

Шундай жамол ва юз ноз-ғамзалар билан у етиб келди. Мажнун у паризодни кўргач, ҳаёти тарзи барбод бўлди. Фа-

лакни тешиб юборгувчи бир оҳ тортиб, кўкни унга ғилоф этди. У сўйилган қўйдек типирчилаб, қўйлар орасига йиқилиб қолди. У мадорсизланиб шундай бир нола чекдики, ундан қўйлар ҳуркиб қоча кетдилар. Ҳар бириси ҳар томонга дув-дув қочдилар, фақат ўртада ғариб, гирён (Мажнун) қолди.

Мажнуннинг ўтлиғ оҳи Лайли юрагини ўртаб юборганидан, «нима аҳвол бўлди экан?» деб ёнига келди. Қараса, бир пўст ётар, пўст орасида эса у дўст яширган эди. Ниҳоят ғам ўтидан тани қорайиб, у мушк нофа тортган (яъни тери ёпинган) эди. Унинг мушк каби қорайган ҳолсиз гавдаси, Лайлининг паришон соч толасидек ётар эди.

Гул юзлига бу воқеа маълум бўлгач, у ҳам бир оҳ уриб ҳушидан кетди. Тупроққа тушган нурдек, у сарвқомат ҳур ёри устига йиқилди. Ишқ ичида тани ҳолсизланган бемадор Лайли ёр билан бирга ётди. Ошиқ ишида содиқ бўлса, маъшуқи бошида ошиқ бўлади.

Икки диллоҳнинг бундай йиқилишидан қизлар огоҳ бўлиб қолдилар. Гул юзлини дарров кўтариб олдилар. Булар ҳушсиз ҳолда ҳам бир-бирлари билан қовушолмадилар. Қизлар турли баҳоналарни топишиб, Лайлинин олиб кетдилар. У кимсамиз ғариб, ҳушсиз ҳолда саҳрода қолди, чўпон эса ҳайрагда қолиб, чора излашга тушди. Агар қабила аҳли бу воқеадан хабар топса, уни бир нафас ҳам тирик қўймасди.

Шу вақтда икки туялик туяларини жадаллатиб, етиб келишиди. Улар Мажнунни бу ҳолатда кўриб, дарров бир тевани чўкирдилар. Унинг тездан оёқ-қўлларини боғлаб, туяга маҳкам тангидилар. Қабила аҳлига билдирамай, шамол тезлигида йўлга тушдилар.

Достонларни нақл қилгучи бундай дейди: Мажнуннинг отаси уйига қайтганда, ўғлининг ҳам ўша кечаганлигини билib, уйда беором кўп йиглади. Йиглай-йиглай изидан бориб, Мажнун ётган жойга ҳам етди. Уни топиб, тевага боғлаб, жадаллик билан уйига келтирди. Уни қабилага келтиргунча, жони юз марта оғзига келди. У чўлдан қабилага келтирилганда ҳушсизлигидан қўй ва чўпонни ҳам эслай олмас эди.

Эй, Яман даштининг чўпони, иting бўлайин, ўз ёнингга олсанг-чи! Сен билан машғул бўлиб иш бошладим, сен. ҳам илтифот қилиб менинг қўлимдан тутгин!

XXX

*Мажнунни отаси кўп насиҳатлар билан
Навфал ҳашамига олиб боргани; Нав-
фал сур асбобини сурур билан чиқарга-
ни; никоҳ или ақди тузулиб, у маҳкам
бўлмасдан бурун узулгани; бир ошиқ
маъшуқи васлидан ком топгани, яна
бир ошиқ маъшуқи васлини тилаб елиб
кетгани*

Сўз дурларини терган машшота бу ҳикоя қизига шундай жилва берди:

У зори шайдо (Мажнун) уйга келганда, ҳушига келган әди. Отаси йиглаб, шикоятлар қилди ва яна кўп панд-насиҳатлар айтди. Ўз оғир аҳволидан отасига бир сўз ҳам деёлмади, ниҳояти хижолат тортганлигидан отасига қараёлмас әди. Отасининг тортган азобини кўргач, таъсиrlаниб, ўзини ерга ташлади. Юзларини ерга қўйиб, қулогини тутиб, қайта-қайта отасининг оёқларини ўпди.

— Сенинг лутфинг паноҳимдир, гуноҳимни кечиргин ахир! — деди.

Отаси ўз ўғлининг шундай ожизона эътирофини эшитгач, деди:

— Сени бу аҳвoldан қутқазиш учун, бутун қилган ишларингдан қайтиб, нима иш буюрсам шуни қилсанг. Менинг ризолигимни олмоқчи бўлсанг, шариат нима буюрса шуни қабул этгин.

Мажнун жувонмард, эҳсонли ва мурувватли кишилардан әди. Унинг ақли ҳуши жойида бўлганда беодоблик қилиши мумкин эмас әди. У, одобли улуғ одамлардек, расми одати авлиёлардек әди. Аввал худонинг ризолигини, ундан сўнг ота-она ризосини тилаб, деди:

— Сен нимадан ризо бўлсанг, уни бажариш менинг бурчимдир. Ҳукм эт, қандай иш тутайин, айтганларингни қилишда менда не имкониятлар бор?

Отаси бу гаплардан хурсанд бўлиб, Навфалнинг иши тўғрисида сўз бошлади:

— Навфал бутун Араб әлида, йўқ, балки бутун оламда ягонадир. Сенинг учун у кўп алам торти ва сенинг ишларинг учун кўп азоб-машақатлар чекди. Тақдир азалда йўқлигидан, сенинг ишингни битказиш учун бирор чора тополмади. Унинг чеккан азоблари бўйнингдаги қарзdir, унга узр кўргавиш сенинг учун фарздир. Энди унинг ризоси ва хаста отанг-

нинг ҳам илтимоси шундайdir: у билан қариндошлик та-риқини тушиб, сени унга фарзанд этсак. Унинг парига ўхша-ган, бошдан-оёғигача гўзал, дилкаш бир қизи бор эмиш, Иф-фат ҳарамидаги у гўзалнинг кўйида юзларча қабилалар сар-гардонлар. Унга етишмоқ орзусида бўлганлар беҳисоб кўп эди, лекин уни сўрашга жасорат кўрсатолмасдилар. Бу иш билан фахрланаман, агар қайтарсанг ва орқага сурсанг, қўр-қинч, ваҳималар келтиради. Мени ризо қилмоқчи бўлсанг, ўзинг ҳам ризолик бериб, бу ишни ҳал қилмоқни менга тоширгин!

Шу йўсинда Мажнун тилини боғлаб кўндирид, унинг ри-зосидан хурсанд бўлди. Хушвақт бўлганидан, оламга сифмай бутун қабила аҳлини ўз уйига чақириди. Бу тантанага керак бўлган бутун нарсаларни ортиги билан тайёрлади. Мажнунни кеча ва кундуз каби киш ва ос* либослари билан ясантиридилар. Ҳеч иш билан вақтни зое кетказмасдан, тезликда Навфалниги жўнадилар. У ҳам бу воқеадан хабар топиб, бутун ҳеш-ақрабосини тўплади. Катта тўй маросимини ясаб, меҳмонларни базмга келтириди. Хурсандчиликка берилишиб, неча кеча-кундуз майхўрликлар бўлди.

Шодлик тантанаси тўхтади, базмдан май косалари кўта-рилди. Гул юзли келин билан куёвнинг ҳар иккаласини зеб-зийнатлар билан ясантиридилар. Қизни ойдек тўққиз ниқоб ва пардалар ичига қўйдилар. Куёвни базм ичига келтириб, кипшилар орасига ўтиргиздилар. Исонамо мўъжизалар кўрса-тучи хатиб, ҳақ ҳамду саносини ўқиб, ой билан қуёшни ни-коҳ қилди ва уларнинг бошларидан кўп кумуш ва олтинлар сочдилар. Қуёш ҳам келинлардек яширинди, тун ҳам куёв каби ер узра ёстанди. Олам ҳам бу ишни мувофиқ кўриб тўқ-қиз табақда, тўққиз осмоннинг юлдузларидан сочиқ кел-тирди.

Буларнинг иккови учун уй ичида таҳт ясатилиб, кўрпалар тўшалган эди. Ўйин-кулги, вақти чоғлиқ билан уларнинг ик-ковини келтиридилар, лекин куёв билан қиз чандон кулмас эдилар. Мажнунни парига яқин ўткизиб, ўз харидорига топ-ширидилар. Навфал уй теварагини кишилардан холи қилди; элнинг ҳам қатнови тўхтади. У атрофда ҳеч қандай киши ва жонзод ҳам қолмаган эди. Вақт ярим кечага яқинлашган-да, эл ҳам ўз уйларига кетиб, уйқуга гарқ бўлдилар.

Навфал май ичиб, узоқ ўтириди, турли-туман хаёлларга борар эди. Шу хаёллари уни яширинча уй олдига олиб келди.

* Қундуз пўстини ва оқ пўстин.

Секингина уй кигизини йиртиб, ўша тешикдан мўралаб, қизининг ўрнидан туриб, Мажнун қошига бориб, ер ўпаётганини кўрди. У деярди: «Эй, танҳо (Йигит), эй пок муҳаббат юзингда балқиган, ҳам вафо нури тегрангда шуълаланган, ишқ ичра замонанинг ягонаси! Менга ҳам равшан, элга ҳам маълум бўлган бир сўз борки, у ҳам бўлса, сенинг Лайли кўйида нотавонлигинг, ишқида жаҳонга достон бўлганингдир. Унинг ғами кўнглингда маҳкам жойланиб, ишқи бўлса сенга топширилгандир. Кўнглингни унинг ўтидан совутмайсан, унинг борлигидаги ёр тутмайсан. Оталаримизнинг ризоси натижасида шундай ишларга дучор бўлибсан: ишқ ўлкасининг шоҳисан, ишқ аҳлининг ўтидан хабардорсан. Ишқ занжира гаёғи боғланган, менинг ҳам бир дардмандим бор. У дардим ўтида қуйгандир, мен ҳам ўшани деб хароб бўлганман. Лекин иккимизнинг ҳам ўтимиз яширин, на уни, на мени эл билмайди. Узинг ўйлаб қара, у ҳижронга асир бўлган, сен билан менга бўлаётган бу тўйни эшишиб қолса, бу кечада унинг аҳволи нима бўлади? Умрининг кунига завол етишади-ку!

Сирларимни сенга айтдим, энди сенга бир ўтинчим бор: Мен туфайли маломатга қолсанг ҳам, шу оғир сўровимга рози бўлсанг, мени ҳалқ олдида обрўсизлантирмаслик учун, бу ердан туриб кетсанг. Кимки бу воқеадан хабардор бўлиб, сени маломат этса ҳам, мен элнинг қаҳрли мазамматига қолмасам, сен шундай маломатларга ўзингни тутсанг. Менга сендан шундай мурувват бўлса ва шундай мардлик кўрсатсанг. Тангри таолодан умидим шуки, пок ва нодир Лайлини ўз паноҳига олиб, ҳар бир бало-қазодан омонда сақласин. Ҳажрида сени сабр ва тоқатли қилиб, васлини ҳам сенга насиб этсин!»

Мажнун бу сўзлардан озор тортиб, бечора қизнинг аҳволига зор-зор йифлаб, деди: «Эй кўнгли ранжиган! Ўз ишқ ва муҳаббатингга курсанд бўл! Ерингга вафо этмоқ шиоринг бўлсин, тангри ҳамиша сенинг ёринг бўлсин. Менинг ҳам ичимга қайғу чўкканидан, тоғ водийларга кетмоқчи эдим. Сенинг кўнглинг учун юрагим ғоят қуйган ва қайғуда ўлтирган эдим. Сен шундай лутфни изҳор этдинг, энди қандай қилиб сенга миннатдорлик билдирам? Ўзимнинг ҳам кетиш ниятим бор, кетсан сендан нима деб хафа бўламан. Мен ўзим ҳам шу соатда кетмоқчи эдим, сен сафаримга мадад бердинг. Миннатни сенга эмас, ўзимга, балки жон билан икки кўзимга қўйғанман».

Шундай дуолар ва эҳсон-мурувватлар бағишлаб, Мажнун ўрнидан турди. Ака-сингиллик меҳри билан, синглидан кўп афвлар сўраб, уйдан чиқди-да, яна ғам саҳросига қараб кет-

ди. Қиз билан куёв орасида бўлган шундай сўзларни, шундай қизиқ аҳволни кўрган Навфал, жиннилардек ва май устига наша чеккан кишилардек ўрнидан туриб, уй томон ганграган ҳолда қўзғалди. Кўрганларини эсга олиб, уялганидан на айта олар эди, на сақлай олар эди.

Уйнинг бир бурчагида қизнинг ошиғи қаҳр ва ғазаб билан беркиниб турган эди. Қўлига кескир ханжар олиб, агар улар ишратга юз қўйсалар, уларнинг ҳар иккаласини ҳам ҳалок қилмоқчи ва ўз кўксини ҳам чок этмоқчи эди. У бечора ўз ишқида пок эди, ишқ унга ўтни гулзор этди.

Мажнун ишига таслим бўлиб, ишқ маслагидан таълим олди. Унинг изларига пешонасини қўйиб, қилмишларига оғаринлар ўқиди. Ўз дилдорининг фойибона вафосидан хурсанд бўлди.

Бу яширин меҳр-муҳаббатдан бехуд унинг шавқида тоқати тоқ бўлган жазман йигит уйга кириб олган эди. У ерга йиқилиб, жонини тупроққа қўшди. Маъшуқа ўз нотавонини кўриб, ўзини юз машаққат билан фигон чекищдан тўхтатди. Меҳрибонлик билан бошига соя солиб, бошини кўтариб, кўнглини олди. Буларнинг орасида йиллар бўйи давом этган бу ишқ ҳарорати кундан-кунга зиёда бўла бориб, шу тунги васл давлати буларнинг қўлига кирмасдан келар эди. Бир-бирларига муҳаббат изҳор этишиб, бир-бирларининг дийдорларидан маст бўлдилар.

Шу кеча ҳар икков ошиқ учун нафс муроди бўлмаса ҳам бошқа ҳамма нарса мұяссар бўлди. Висол майдан маст бўлганларидан, тонг отгунча бир-бирлари билан сўзлашолмай чиқдилар.

Тонг қуши нола чекканди, ошиқ ҳам хайрлашиб, ёр билан топишганига хурсанд бўлиб, чиқиб кетди, маъшуқаси ҳам ғамдан озод бўлиб қолди.

Тонг келинининг юзи тўлишиб, оқаришиб кела бошлагандага фалак машшотаси унинг юзига қуёш кўзгусини рўбарў қилди. Тўй аҳли тонг саҳарлаб, шодлик билан қиз ва куёв олдинга келдилар. Уйда бири бор, икков йўқ эди, қиз ёлғиз эдии, лекин куёв йўқ эди. Мажнун эли ўша ерда ғамга ботиб, ўлимга ҳам рози бўлдилар. Аҳволнинг нималигини билган Навфал, нима дейишини ҳам билмай, тили лол бўлиб қолган эди. У Мажнун элидан кўп узрлар сўради, айтар сўзи сарбасар узр эди:

«Тангрининг тақдири экан, тақдирнинг чораси бўлмайди. Бу ишларга сиз ҳам, биз ҳам, ўғил ҳам, қиз ҳам гуноҳкор эмас. Бу аҳволлар тақдирдан бўлди, шукур қилинг, ортиқча ғам тортманг!» Шундай узрлар билан уларни узатиб қайтди-

да, узалиб ётди. Дард-машаққатлар берган бу сир, унинг жисмини касаллантириб, кўрпага ётқизди.

Эй доно табиб, bemorman, лекин текширипшиг мувофиқ ёмас. Бу яширин ғам жонимни олмоқда, ё уни даф эт, ё жонимни бағишла.

XXXI

Фалак золи найрангининг ўзгариб туриши Мажнунни Навфал қизи висолига еткурмай туриб айргандек Лайлини ҳам Ибни Салом маломатидан саломат айриб, ҳажринг қаро тунида икки номуродни муродга еткургани ва бадансиз руҳни руҳсиз баданга киургани; руҳ билан бадан васли мұяссар бўлгач, фироқ тигини сурib, ўша сув билан бу висол ўтини ўчиргани

Бу саҳифаларни чизган қалам, афсонани шундай ҳикоя қилиди:

Ишқ кўпроқ ҳийла ва алдовдан иборат бўлган фалак, бир неча кун Мажнун билан ҳазиллашиб, йўқ, балки, беҳаёлик билан уни уйланишга буюрди.

Иттифоқо Ибни Салом уйланиш учун тўй анжомларини тайёрлади. Бутун керакли нарсаларни ҳозирлаб, Лайли қабиласига от сурди. Улар ҳам меҳмонларнинг келиш хабарини әшишиб, Ибни Саломни уйга бошлаб жойлаштирилар. Унинг билан келган одамларни ҳам қаршилаб, май базми қурдилар. Олатда бўладиган зиёфатни, ҳаддан зиёда катта қилиб ясалдилар. Бир неча кечакундуз айш сурдилар, кечалар ҳам, кундузлар ҳам майсиз ўтмади.

Никоҳ тузиш соати келиб, бу тўй тантанасини яна ривожләнтиради. Белгиланган пайтда қабила аҳли ҳам тўпланди. Бўлмагур, бемаъни сўзларни ўқувчи хатиб ҳам никоҳ ақди билан куёвни боғлади. Никоҳ иши саранжом бўлгач, Лайли ҳарами томон юрдилар. Мингларча жафоларга йўл қўйиншиб, у ойни аждаҳога топширмоқчи бўлдилар.

Ёрнинг қўли қўлига яқинлашганда унга ажойиб воқеа дуч келди. Ибни Салом табиатида хафақон касали бор эди. Агар майни кўп исса, шундай тўлғанишга тушар эдики, ҳатто нафаси ҳам тутилиб қолар эди. Бир неча кун тўхтовсиз

ичишни давом қилдирганидан, ўша касали яна қўзгаб қолди.
У ҳушидан кетиб, ўлган кишилардек йиқилди.

Шукдай қилиб ҳаётидан ажралгач, тўй мотамга айланди.
Халойиқ ҳам уни ўлган ҳисоблаб, тездан бир уйга келтирдилар.
Барча тўпланишиб, кўёв бошига йигилдилар, келин билан ҳеч кимнинг иши бўлмади.

Бечора келинни шундай фикр босган эдики, у қаноти синган товусдек мажолсиз эди. Кўнгли юз хил фикрлар билан банд бўлиб, минг хил ўйларга борди. Ўзини ўлдириш учун бир заҳарлик пичоқ яшириб қўйган эди. Агар душман ўз мақсадига эришгудек бўлса, у чор-ночор ўзини ўлдиришга қасд қилган эди. Ет кишидан қутулиб, ўз ёрига вафодор бўлиб оламдан ўтишни ўйлаган эди. Ўзига урмоқчи бўлган заҳарли пичоқ, гўё ёвништадан баданига кор қилган эди.

Бу кеча фалакнинг иккюзламалиги кўп ажойиб воқеаларни тўғри келтирди. Бири шундай эди: жонлари дардга тўла бу икки шахсни, фалак денгизи мавж уриб, ҳар иккаласини ҳам айрим-айрим уйлантиromoқчи эди. Буларнинг ҳар бирини бошқа бирор билан жуфт қилди-ю, ҳар икки гавҳарни ҳам беҳжирим сақлади. Яна бири шуки, бу икки гамли воқеа бир кеча ичидан бўлган эди. Ҳудди шу кеча, булар тезликда бошқаларга ўз бўлмасдан, ёт бўлиб айрилишдилар.

Гўё шу воқеалардан назарини узмаган мунахжим, бу ишларни маълум бир соатга тайин қилгандек эди. Лекин бу ишда мунахжим ҳам ожизлик қиласи эди, яъни у янглишади.

Алқисса кўёв ҳолдан кетиб, кучсизлик унинг танини поймол қилганда, ўша кеча бутун эл ва аёл, кампир, қизлар унинг бўшига тўпланган эдилар.

Лайли у балодан озод бўлиб, гамғин кўнгли хурсанд бўлди. Ўзининг қошида ҳеч ким йўқлигини ва барчанинг кўёв бўшига тўпланганини кўрди. Ҳужра холи қолгач, кўнгли тўқ бўлди. Уй ёнидаги катта бир қумга кўзи тушиб қолди. Уйдан ташқарига чиқди-да, қум бўйлаб кетди. Бир лаҳза тинмай, ором олмасдан, секин-секин қадам ташлар эди. Ҳар нафасда худога шукур қилиб, ихтиёrsиз юриб борар эди. Жуда узоқ масофани босганидан, ҳай қабиласи оромгоҳи ҳам кўзига кўринмай кетди.

Мажнун ҳам биёбонда, шу томонга шитоб билар эди. Бир-бирларига яқинлашгач, ҳар иккалasi ҳам изтиробга тушдилар. Лайли унинг жонга ҳузур берувчи, ҳазин навосидан таниди. Мажнун эса унинг ёқимли ҳидидан баҳра топганидан, кўнглида фироқ ва аламлари қолмаган эди. Тезлик билан бир-бирларига етишдилар. Бундай висолни ким кўрган экан, ҳайҳот?! Улар бир-бирларига талпиндилар, шу чоқ руж

бадан ҳарамига кириб келгандек бўлди. Яъни у мажруҳ Мажнун баданига маъшуқаси руҳ бўлиб кирди. Муқаддас руҳ учиб келиб бадан тупроғи билан йўғрилиб кетди.

Буларнинг шу ҳоли, икки гавҳар бир қутида сақланган-дек, икки қуёш бир бурждан чиққандек бўлди. Бир қадаҳга икки май қуийилди, бир гунчадан икки гул очилди. Бир жисмга икки руҳ сингиб, бир кўзда икки қорачиғ кўринди. Васл бу иккиликни боқий айлаб, соқий ваҳдат қадаҳини тутди. Бу май бирини маст қилган бўлса, иккincinnини майпарааст қилди. Йўқ-йўқ, балки иккаласи ҳам маст, ҳам майпарааст бўлди. Бу турфа икки ошиқ-маъшуқнинг исмлари гарчи икки хил бўлса ҳам кўринишлари бир жисм эди. Икки қадаҳдаги оби ҳаёт қўшилса, ким уни ажратада олар эди? Буниси қанд, у бири эса тоза сув эди, қанд бўлса у сувни ўзига шимиб олди. Буниси сув эди, у бири эса сувдан ҳосил бўлган кўпиклар бўлиб, бир оҳ билан унга етишиди.

Дунё ҳам бирпас юмшаб тун фитна кўзига уйқу берди. Жаҳон вафо билан тўлиб, бутун баҳтсизликлар фалакнинг уйидан чиқиб кетди. Дунёнинг омон-омонлиги билан маккор замона атрофига девор қурилди. Буларга фалак ёр бўлиб, даврон мададкорлик қилганидан, бу ишга ақл бовар қилмас эди.

Жаҳондаги барча мажлуқотлар, шу пайтда ҳар иккаласи-нинг васлини тилар эдилар. Ўргамчи ҳам шувоқча ўралиб, иплари билан ўз тумшугини боғлаб олган эди. Кўршапалак ҳам қаноти билан оламга гарада солган эди. Бўрининг эса қулоқлари юзига тушиб, кўзининг чироги ёпилган эди. Укки бўлса ногоҳ овоз чиқариб юбормаслиги учун, тумшугини парлари ичига олган эди. Қўйчи итини уйқу деви, ҳар бир жунига кириб олгандек, босиб олган эди. Бу анбаролуд қоронғу кечада, макр билан тулкининг уясига тутун солган эди. Ҳайвонот ва қушлар тинчланиб, газанда ва йиртқичлар уйқуга чўмган эдилар.

Бундай васлнинг зое кетмаслиги учун, табиат ҳам мадад кўрсатарди. Не гард учиб, не ел эсар эди, сувлар ҳам жимгина оқиб, ҳеч қандай ўтнинг ёлқини кўринмас эди. Ҳаво мизожи ўт кўрасининг юзини тўсиб олишга мойил эди. Совуқлик сипоҳи тушмасин учун, ўтнинг пардаси тўсқинлик қилауди.

Тўққиз фалак бир-бирининг юзини тўсгани сингари шу совуқлик фалак юзини пок сақлар эди. Ҳаракатсиз юлдузлар эса, баҳтсизлик келтирувчи ниятларидан воз кечиб, саодат бағишловчи юлдузлар орасидан ўрин олдилар. Ойнинг кулчасида нур ҳам кўринмас эди, ер уни қуёш кўмачдонига кўм-

ган эди. Аторуд тонг отгунча ҳеч кўзини юммасдан, «кўз тегмасин» оятини ёзар эди. Зуҳро юлдузи ашула қилмай, чанг чалолмай, парда ичига яширинаётган эди. Қуёш шамъи ер тагига ботиб, кеча хилвати ўз шамъини чиқарган эди. Баҳром юлдузи газаб билан найза ўқталиб, ҳар ким ёмон кўз билан қараса кўр қилмоқчи бўлиб турар эди. Биржис эса шу икки дилрабога фурсат тилаб, қўйл очиб дуо қиласар эди. Зуҳал юлдузи эса бахтсизлик ёғдиришдан номус қилиб, тунга ўз юзидан қора ранг берар эди. Тун ҳам қўлларини қорага булғаб, саҳар йўлини тўсар эди. Тонг шабадасини урмас ва тун кулларини ҳам совутмас эди. Чин тонг нафас олишга ҳам ҳавас қилмас, ёлғон тонгга эса бу кечадан ўрин ҳам йўқ эди. Фалак гардишини тун дудлари тутиб, тонгнинг дамини қайтарган эди.

Элдаги ақл чарогида ёргуғ ҳам йўқ, бутун маҳлуқот чуқур уйқуга толган эди. Улар иккиси бахти уйғоқ кишилардай, бир-бирларининг дийдоридан маст бўлган эдилар. Фалакнинг йиллар бўйи давом қилган хилоф одати, ҳаракатлари бир кечада йўқ бўлган эди.

Сарв дарахтига чирмашган печак гулдек, бу икки тан ва жон бир-бирларига чирмашдилар. Гоҳ Мажнун Лайлининг оёгини ўпар, гоҳ Лайли унинг иягини силар. Гоҳ Мажнун қўлларини ҳалқа қилиб, Лайлининг танига сочи каби ўпар. Гоҳ Лайли Мажнун қўлини силар, гоҳ юзини, гоҳ кўзини сурттар эди. Гоҳ Мажнун қулочини очиб ёрининг сочини қўлига чирмар эди. Яъни ҳазинанини ҳавас қиларкан, унга илон тармасиб қолса таажжуб эмас!

Лайли гоҳ ўз дардини изҳор қиласар экан, Мажнуннинг тартибсиз соchlаридан гардини артар эди. Яъни бу қора ғамнинг губори — чангни, тоторнинг хушбўй атридан ҳам менга яхши, дер эди. Мажнун ўзини Лайли фаҳмлаб, нозу ишвалилар қиласар эди. Лайли ҳам ўзини Мажнун ҳисоблаб, ёрга яқин бўлганлигига шукур қиласар эди. Мажнун Лайли бўлиб, Лайли Мажнун бўлди-ю, ораларида иккиликка ҳеч йўл қолмади.

Улар кўп ҳолатли ишларни бошларидан ўтказган бўлсалар ҳам, покликдан ажрим эмасдилар. Ишқ аҳли булардек пок бўларкан, уларга абадий васл мұяссар бўлса не ажаб? Нафс мақсадида ошиқ бўлганлар учун ошиқлик ҳаромдир.

Бир-бирига кўнгил берган шу ошиқ-маъшуқлар, шундай қилиб васлларига эришдилар. Осмоннинг пайванди узилиб, жафо яна бошланди. Ёлғон кулишларга роғиб бўлиб ёлғон тонг ҳам ота бошлади. Лайлининг ҳам шодлиги қочиб, тонг

шамъи каби кўз ёшларини тўқди. Ҳар иккаласи ҳам бемеҳр фалакнинг ўз қуёшига юз кўрсатажагини билдилар.

Янги ўсан сарв (Лайли) юз узр-ҳурматлар билан ўрнидан туриб, шаҳло кўзларидан аргувон доналар тўқди. Ўша оқшомда бошига тушган бахтисислик ва кулфатларни бир-бир шарҳ қилиб деди: «Менинг бу ерда туришим қанча яхши бўлса ҳам, лекин қайтишим айни маслаҳатдир».

Ҳар иккиси ҳам ўша кечадан бошдан ўтказган воқеаларни айтишдилар. Бир-бирларининг оёқларини ўпиб, айрилиқ доғини тозаладилар. Гамли туннинг дарди девонага қолди; кечалари дайдиб юрувчи ой ҳам ўз минорасига чиққан эди. Агар айрилиқ тонгининг банд — тузоги очилмаса, висол шоммининг ўзи яхши давлатдир. Юз йилларча шундай шомнинг орзу-ҳавасида бўлсаларда, тонг дам ургач, унинг бир нафас әканлиги билинади.

XXXII

*Фироқ тоши кўксига урилавериб, Мажнуннинг Нажд тогини оромгоҳ қилгани;
кўзидан тўккан бағир қонидан у тоғда
лолазор очилгани; мушк бўйли оҳуси
ёди билан сўзга кириб, мушк сочувчи
насим билан наво кўргизгани*

Дардлар билан парвариш топган афсона куйловчи бу дардли афсонани шундай бошлайди:

Ўша кечаси икки дилором бир-бирларининг васлидан муродга етгандан сўнг, бири даштда қолди, бири ўз қабиласига қараб кетди. Ойнинг чодири (яъни Лайлининг уйи) бўш қолган эди, шу чодирнинг ойи қайтиб борди. Лайлининг ҳолидан эл-юрт хабардор бўлмади, унинг васлидан ким баҳра олганлигини ҳеч ким билолмади. Ибни Саломнинг номурод тўдаси Лайлининг ўз муродига етганидан гафлатда қолдилар. Тонг куёвдек безаниб, жилва билан кўринди. Асфар гули тонг нафасини ўзининг сариқ ранги билан бўғиб қўйди. Хафақон касалига йўлиқкан куёв кўз очиб, бошига тўплланган кишиларга амори (кажава) келтиришни буюрди ва ўз саройига жўнади. Касаллиги қаҷон тузалса, яна бошланган ишга майл билдиromoқ бўлди.

Лайли ўз уйига келиб, кўнгли таскин топгач, яна ҳижрон аламидан ғамга тушди. Унинг димоги ёр бўйини исказани-

дан, бир зум ҳам тинчиёлмас эди. Дардининг қаттиқлигини ҳам айшининг аччиқлигини сезар эди.

Мажнун васл давлатига эришган бўлса ҳам, васл лаззатини фаҳм этмади. У, ғам ўтида хас каби ёниб, васлнинг отинигина эшитарди, холос. Энди бу васл билан юз бор оби ҳаёт сувини ичгандек жони тоза бўлди. Замона бу ҳаёт сувини тўкиб, ўрнига яна заҳар тўлган жомни тутди. Ҳижрон шу даражага етдики, аввалгидан ҳам мушкуроқ ҳолга тушди. Кўнглига юзларча балоларнинг ваҳимаси тушгач, яна Нажд тогига жўнади. Нажд деб аталган у чўққи ер юзининг иккичи осмони ҳисобланади. Унинг учи фалакнинг қулогини тешиб, ойнинг қоплондан қасдини олган. Нажддаги қоплондан осмон асадига кулфат етарди, эчкиси эса осмоннинг жадди билан баравар югуран эди. Унинг кўксидаги ўсимликлар кўкармаган эди, на гуллар, на сабзалардан асар бор эди. Унинг учлари ойнинг қалқонига тифдек тегар, балки қуёшнинг юзи га ҳам етар эди. Унинг қиррасидаги тош парчалари, худди қиличининг дастасига қўйилган тошлардек эди. Ошиқдаги қайту тогидек, унинг борлиги тошдан иборат эди. Ошиққа жағо кўрсатиш учун, унинг қўйни ва этаклари тош билан лиқ тўлганди. Ҳар бир тикани ҳажр нишидек ўткир, ҳар бир тош парчаси эса, фироқдек ғам келтиргучидир.

Бу тогнинг тепаси Мажнунга макон бўлиб, унда Мажнун тош парчаларини тозалар, хас-хашакларини супурар эди. Мажнун бу тог тепасини ўзига манзил этгач, бутун қабилалар кўзига кўриниб туради. Лайли уйини мўлжалга олиб, ундан кўзини ҳеч узолмас эди. Ҳай қабиласига қараш билан, ўз ғамига чора тспмоқчи бўлар, ўша қабиладан чиқсан тутунни кўзига сурма қилиб сурттар эди. У қабиланинг тог каби осмонга чиқсан чанглари, Мажнуннинг кўзига тўтиё эди. Дам-бадам оҳ тортиб, яна ўша тарафга юрди. Кўкка кўтарилган ўтга ўхшаб, Мажнун ҳам алангадек тог устига чиқди. Яна ўша қабилага кўз тикиб, ўз-ўзича сўзлай бошлади. Уни ваҳщий ҳайвонлар давра қилиб ўраб олдилар, уларнинг ҳушлари жойида-ю, бу беҳуш шайдо эди. Атрофига қушлар жам бўлдилар, улар парвона, лекин бу шамъ эди. Унинг иши шундай бўлиб, ҳайвон ва қушлар билан куни ўтар эди.

Ваҳщий ҳайвонлар унинг ҳамсуҳбати бўлиб, бир жайрон унинг дўсти эди. Бу жайроннинг бўйни нозик, кўзлари шўх, баданлари маҳкам, сёқлари енгил, чопонгич эди. Унинг сурати лутф қалами билан чизилган эди, жони эса нофамушкнинг хушбўй ҳидидан эди. У жайрон бу девонанинг ёр ва ошинаси, суянганда суянчиғи эди. Мажнун меҳрибонлик билан жайроннинг бўйини қучоқлар ва юзини юзига сурттар эди.

Жайрон эса қулоғи билан Мажнуннинг кўз ёшларини артар, туёқлари билан баданини қашир эди.

Мажнун унинг васфини куйлаб, қулоғига афсоналар айтар эди: «Эй, ошиқларга ошна табиатли ва бошдан-оёғигача дўстлик меҳри тўлган. Силлиқ танларингга ипак кийим кийибсан, тагингда эса ипак ўринида қоқим — майин жунинг бор. Елканг ва сағринг тоза, пешона ва бетларинг чиройли. Емагинг лога бўлганидан, оғзингда лоланинг бир барги тил бўлиб қолибди. Тишларинг лола устига тушган шабнамдир, уни шабнам демайин, балки ипга тизилган дурдоналардир. Шу лола баргидан озиқланганинг учун дудоғинг дур устидаги ёқутга айланибди. Икки кўзингнинг қоралиги позаҳр* билан қаро орасида алоҳида ранг касб этибдир. Кўзингнинг ҳар очилиб юмилиши, бу позаҳр, элга юзларча асалдан баҳра етказади. Ё аччиқланиб одам ўлдиришга қасд қилдингмики, позаҳр кўзингни заҳарга тўлдирибди? Уни позаҳр демайин балки жон билан кўнгил орасидаги қора балодир. Жоду кўзинг Лайлиникidek шўхдир, ўзи сурмасиз бўлса ҳам доим сурмарангдир. Нозик оёқларинг йўнилган ва учи кесилган қаламга ўхшаб кўринади. Билсам, туёғинг туёқ эмас, қалам учига юққан сиёҳ экан. Бўғимли қамиш қаламдек, нозик суякларинг ҳам бир-бирига пайванддир. Таажжубки хат ёзиш учун бўғинлик қалам очибсан. Шу қаламинг билан юриб, Лайли саройига бориб жойлашгин. У баҳор гашти билан чиқиб, сен тарафга қараб юрса, четроқ жойда давра олиб, узоқдан югуриб, бошидан айланггин. Унинг атрофида чопиб айланганингда ҳар ўн қадамда тупроққа юз қўйгин. Менинг учун сайрининг йўли ва йўлининг тупроғи бўлгин. Ҳам юзими ни юзингга, ҳам кўзимни кўзингга суртайин. У хиром этган томонга сен ҳам равон бўл, лола ва гуллар орасига беркингин. У келгач, оёғига юзингни ва қадамининг тупроғига икки кўзингни суртгин. Бўзлаб менинг ғамимни ошкор этгин, ҳўнграб гарифлигимни ва мунгимни айтгин».

Мажнун кийикка шундай ёлвориб, қушларга ўзгача ҳасрат қиласади. Қушларнинг ҳар бирига дам-бадам қуш тили билан ёлвориб ғам қиссасини айтар эди. Жон саҳифасига нома ёзаркан, ҳар дамда ҳушидан кетар эди. Бу номани жоннинг иллари билан уларнинг қанотига маҳкам боғларди. Гоҳ ҳаводаги қушлар билан, гоҳ тонг шабадасидан хабар юборар эди. Кўнгли висол ҳавасига тушса ҳам, лекин бу ҳаваслар хаёлда эди. Мажнун, Лайли билан топишган вақтларини ўйлаб, кўнгли шод бўлар эди.

* Позаҳр — заҳармуҳра, заҳарни қайтарадиган даво.

Киши ҳижрон дардини юз йил тортиб, бир дам бўлсин висолга эришса, ундан сўнг айрилиқ устига айрилиқ келса ҳам ғами бўлмайди, афсуски ўша дам сенга насиб этмади!

XXXIII

Мажнуннинг ота-онаси унинг муҳлик фироқидан ҳалок бўлиб, у бу ҳолни кўргани; тупроқларига елдек етиб, ота гўри бошида етимлик дарди билан, она қабри тошида асирилик мунги билан фигон тортгани

Бу ғам базмида дардга тўлган кўп дардли навҳаларни шу хилда қуйлади:

У жигари қон, яъни гариф, хаста Мажнуннинг Навфал уйидан чиқиб, даштга қараб кетганини эрталаб ота-онаси билгандан сўнг, эл-юрт олдида уятга қолган ота-онанинг ҳаёти тор-мор бўлди. Эл ичиде шармисор бўлганидан ва алам билан куйганидан ҳар иккиси уйига қайтганларида отасини иситма тутди, бадани терга пишди. Дард билан касаллик тўшагига ётиб иссиқ терга ботиб, совуқ оҳлар тортди. Касални тузатиш учун кўп илож-чоралар қилсалар-да, тани сиҳат топмади. Ҳакимлар қанчалик маҳорат кўргазсалар ҳам табиатдан ҳарорат кетмади. Кофурни* шарбат каби ичган сари, баданидаги ҳарорат баттар кўтарилар эди. Еақтики ҳаёт дарахти баргиз қолса, ундей кишига бирдан-бир шарбат ўлим шарбати бўлади. Агар табиб касалга тухмиённа** берса, унинг доналаридан заҳарли гиёҳлар ўсади. Табибининг таранжабин (ични юмшатадиган) дориси касалнинг ичини қабзият қиласар, исканжабин (сафро моддасини йўқотадиган) дориси бўлса сафрони кўпайтирас эди. Касал учун қилинган бутун тумор, жодугарлик ва дуохонниклар касалнинг азобини яна ҳам оширишга сабаб бўлар, касаллигининг азоби қўрқинчли бўлганидан бу азобларни тўхтатишга илож топилмас эди. Кўкдан «Омонатни бер!» деган товуш келганидан сўнг, ўзидағи жон омонатини топширди. Жойи сидра бўлган унинг руҳи қуши ўз маконига қараб учди. Қабила азада қолиб, ғам аҳли оҳвойга тушди.

Бу воқеаларнинг ичидаги қолган нотавон кампирнинг аҳво-

* Кофур — гоятда оқ ва хушбўй модда.

** Тухмиённа — доривор ўсимлик уруги, ҳабдори.

ли жуда оғирлашди. Бир ёқдан ўғил ғами билан қийналиш, иккинчи ёқдан чолнинг дарду-ранжларини тортиб, натижада ўзини пора-пора этди, ҳаётидан ҳам бошқа умиди қолмаган эди. Оқ сочини юлиб елларга учирди, жисми ҳам бир соч толасидек заиф бўлиб қолган эди. Жафолар келтирувчи дунё, уни ҳам ўз жуфтининг қучогига солди. Ўғлини кўролмасдан, унинг фироқида кетган бўлса-да, лекин чолига етишди. Қабила бу бечора кампирга ҳам аза тутиб, унинг учун қора кийдилар.

Уша ерда бир гўристон бўлиб, унда ҳай қабиласининг одамлари дағн этиларди. Абадий кўз очмас уйқу чоғи келиб, иккови ҳам уша ерда ёндошлилар. Фалакнинг оундай ишларидан Нажд тоғида юрган Мажнун хабарсиз эди.

Кунлардан бир кун унинг қайғуси жуда ошиб, кўзига бир нафас уйқу кирган эди. Кўзлари уйқуга ботиб, роҳатлангач, қизиқ бир туш кўрди: Қараса икки капитар бир уйда бола очган, капитар боласининг қанотлари ўсгач, замона уни изтиробга солди. Паришоҳ хотир бўлиб, бу капитар бир муддат ҳавойи бўлиб қолди. Ота-онасидан тамом ажралиб, саҳродаги жони-ворларга қўшилди. Ота-онаси, яъни нар ваз мода капитарлар уни келтириш учун ҳавога парвоз этдилар; уни топсалар ҳам, капитар бола ром бўлмади, ўз уйига қайтмади. Улар иккови ноумид бўлиб қайтганларида, абадий бир балога учраб қолдилар. Юқоридан икки бургут учиб келиб, бу икки капитарни биро луқма қилди.

Бу тушни кўрган Мажнун кўзини очиб, қонли ёшлар тўқди. Тушининг таъбирини билмоқчи бўлар экан, бу аҳволни ўз ҳолига ўхшатди. Ота-онаси ўлиб, ҳаётининг қуёши қорайганини билди. Тоғдан саёнчиб пастга қараб югуреди, селдек кўз ёшлар тўқди. Қабиласининг қабристонига оҳ-зор тортиб йиғ-лаб борди. Қабрларни кўриб юрганида, икки қабрга кўзи тушди: улар янги ясалган, ғам лойидан усти шувалган эди. Қабрларнинг устини кулфат чанглари босиб, унинг атрофида меҳнат тиканлари ўсган. Кулфат тиканларидан қизил гуллар, машаққат райхонлари ва дард гуллари очилган. Қабрнинг лоласида эса ҳасрат, фироқ қонлари ва ғам доғлари кўринар эди. Тошлари шодлик пиёласини ушатиб, чанглари хуррамлик чироғини ўчирган эди. Улар ғам шамоли икки шамъни йиқитиб, ўчирганга ўхшайди. Бу қабрда ётганлар худди шамъ орасидаги пиликдек ғам билан синишган. Буларни ўчган икки шамъ дема, ошиқ калимасидаги алифлардир.

Жон ва кўнгилларининг қарори бўлган Мажнун, уларнинг танини шундай топтаган эди. Ота-онасининг мозорини кўргач, уқубатлар тўлган баданига худди чақин теккандек

бўлди. Бошига жуда кўп тупроқлар совурганидан, гўё кўҳна осмон бошига йиқилгандек бўлди. Азобланган баданига тошлар билан уриб, у баданинг банд-бандидан айириб юборгандек бўлди. Оҳининг тутунлари билан дунёнинг хонумонини қорайтириб юборди.

Мажнун отасининг мозорига бош урди, у тошлар унинг бошини янчиб йўқотиб юборди. Шундай жон ачитувчи фифонлар билан яширин сирларини айта бошлади: «Эй саҳро аҳлиниң асизи! Ҳимматининг каманди осмон учигача етган! Сахрогина эмас, Маккадан то Шомгача бўлган бутун дашт аҳли сенинг неъматинг дастурхонидан баҳраманд эдилар. Араблар ичида ҳурматли кишилар ҳам фармонингда эдилар, сенинг бутун баҳтсизликларинг мендан бўлди. Кўнглинг ҳам менинг ғамимда ношод бўлди, умринг ҳам менинг ишим орқасида барбод бўлди. Роҳат топаман деб мени истаган эдингу, лекин ёруғ чироғинг мен туфайли ўчди. Фарзанд деб кўп пуллар садақа қилдинг, лекин мени кўриб аламдан бошқа нарса тоғмадинг. Гавҳар билан бошингни зийнатламоқчи бўлдинг, у гавҳар бошингга тош бўлиб тегди. Яраларингга қўймоқчи бўлган малҳаминг, уни куйдиришга сабаб бўлди. Покидек ўткир тиф тиладинг, лекин ундан баданларинг тилим-тилим бўлди. Уйингни равшан қилмоқ учун шамъ тиладинг, лекин у шамъдан бутун хонумонинг куйиб кетди. Яъни мендек мубтало ва икки юзи қорани истадинг. Бу юзи ҳора сенинг ором ва қарорингни йўқотди. Ҳаётинг ҳора кунларга қолди. Эйвой, бу ғамларга қандай чидаш берайин, қайси тил билан тавба қиласайн?! ...Чунки, амринг билан йўл тутмадим, руҳингни қандай қилиб рози этайин?! Ногоҳ мендан шундай тўйиб, ғам тоғини устимга қўйдинг-да, суюкларимни бир-бир ущатиб, танимни тупроққа кўмдинг. Ҳар қанча бадбахт ва толесиз бўлсан ҳам, карам билан гуноҳимни кечиргин, руҳингни узроҳим қиласин», — деб бош ва танини тошга уриб, киприклари билан ерларни супурди.

Онасининг қабрига келиб тўхтагач, фарёд-фифонлари оламга сигмай кетди. Ёқа ўрнига кўксини чок қилиб, юрагига раҳмсиз тифлар урди. Кўз ёшининг селидан ерлар денгизга айланиб, қабрлар эса балиқлар каби кўринди. Оҳининг гидатидан қум устида тани қовурилган балиққа айланди. Тани қизиган қумда кўкси чок бўлган буғдой донасига ўхшаб қолди. Тани дард билан тўлган ҳолда, балки жисми чок бўлган ҳолда, баҳор булутидек ўкириб, сел каби юзига шапалоқ урди. Юз дард билан йиғлаб, онасига шундай марсияни ўқиди: «Эй, жонимниңг қибласи, қибламнинг нури! Қора соchlаринг менинг берган азобларимда оқарди. Жонимниңг севинчи, кў-

зимнинг чироги, кўнглум хуши, хотирамга роҳат бергучи сен Каъбам эдингу мен бутхонани тиладим, атрофингда ҳеч зиёрат қилмадим. Ҳар вақт сени изтиробларга солиб, Каъбамни ҳароб этдим. Каъбам ҳароб бўлгач, тангрига нима деб жавоб бераман? Ўзбошимча фалак, жисмингдаги садаф ичига инжу деб тош солибди. Туғилган вақтимдаёқ ўлсам бўлмасми эди, кошки туғилмаганлар билан тенг бўлсан эди. Мен баҳтсиз, қора кунларда қолган, тирик қолиб сенинг жонингга бало бўлдим. Сен менга меҳр қўйиб, қўлинг доим бешигимда бўлди. Ҳар кун мени деб қайғу ютдинг, тунларда уйқу кўзингга ҳаром бўлди. Кечалари тинмасдан зор-зор йиглаб, уйқунгни қочириган эдим. Кеча-кундуз менинг азобимда тинчлигингни йўқотиб, ичмоқ-емоқни ҳам унугтган эдинг. Бир бурда еган нонинг ҳам менга сут бўлсин учун эди. Умидинг шундай эди-ю, чарх золи сенга ўчакишиб, азоблар юки билан қаддингни буқди, ажинлар тушириб, юзингни тарам-тарам қилиб юборди. Бошинг ёстиқҳа етиб, бошинга суюнчиқ керак бўлганда; мен ҳам букилиб қошингда турсам, осмондек бошингдан ўргилсан, қулдек ўғиллигингни, ўғил бўлиб қуллигингни қиласм! Фалакнинг ҳар хил тузоқларига тушганингда, мен билан кўнглинг хурсанд бўлса.

Ҳақиқатан шундай ишлар бўлди, сен кучдан кетдинг, мен бўлсан улгайдим. Хаста жонинг борган сари қарилликка юз тутди, мен ўсиб вояга етдим. Лекин мен баҳти қора, лаънати, бир нафас ҳам қошингда ҳозир бўлолмадим. Шафқат билан қўлингни ҳам тутмадим, кўзим билан йўлларингни супурмадим. Тортган азобларингга ҳамдардлик кўрсатолмай ва айтганларингни ҳам жон билан бажаролмай, балки хизматингни кам қилишгина эмас, кўп ношукурликлар қилдим. Туну кун сендан жудо бўлиб, хабар олмасдан бевафолик қилдим. Ўзимни телбаликка солгандек бўлиб, кўнглингни ололмадим. Ўзим дардингга даво қилолмадим, қизиги шуки, мендан сенга ҳар нафасда турли-туман балолар етди, менинг аламларимни тортиб, жондан ажралдинг. Гўё сен менинг бундай бепоён ранжаларимни тортиб, ғам ва дард билан жаҳондан чиқдинг. Мен даштма-дашт, беҳуда нолалар тортиб, оёқ яланг мажнун бўлиб юрдим. Руҳингнинг жилвагоҳи жаннат босгларидир, макони жаннатdir. Уша боғда ҳам мендан шод эмаслигингни билсан, шу зулм мен учун етарлидир. Бечораман, бошқа нима қила олар эдим, дардимга қандай чора ҳам топардим».

Мажнун шундай ғарибона куйлар билан аза тутиб йиглади. Ошиқ шундай сўзларни айтгач, шикаст топган бошлирини ерга урди. Яна кучсизланиб, охири ҳушсиз ҳолда йиқил-

ди. Шу даражада ўзидан кетдики, гўё ота-онасига етгандек эди.

Эй дўст, бир нафас бошимга келиб, мен мотамзадага бир боқиб, раҳм эт! Бу кимсасиз фақиринг ҳажр доғлари ичиде етиминг ва асиринг бўлиб қолди.

XXXIV

Мажнуннинг ёр ҳажри ўтидан куйган танига ота-она ҳасрати яна икки ўлди-рувчи доғ қўйганидан машаққати қаттиқ бўлганини Лайли эшишиб, у куйганни куйдирган ўтлар тобидан иситиб, дудидан ўзининг ҳаёт рўзгори қаро бўлгани

Бу саҳифаларга зар сочувчи сўз гавҳарларини шундай сочди:

У кимсасиз бечора телба, яна ота-онасидан ҳам ажралиб қолди. Мажнунни ёр доғи ўтраган эди, бунинг устига яна отава онаи зорларининг ҳам доғи қўшилди. Ҳижрон унга заҳри қотил берган эди, бу мотам унга ажалдан илгари ўлдиргувчи бўлиб тушди. Жудолик Мажнунни ушатиш учун ўз тошини отган эди, бу мотам эса синганни яна майдалади. Дард устига дард тушганидан, у бечора гўристон ичиде қолган эди. Ота ва онасининг қабрлари унинг турар жойи бўлиб, бутун олам унга қоп-қора гўрдек кўринарди. Унинг кундалик иши қабр ёнига ўтириб, нола қилмоқ ва юзларча ғамга ўзини ҳавола қилмоқдан иборат бўлиб қолди. Ўз жонига жафолар келтириб, ўзига-ўзи азалар тутарди.

Ота-онадан жудолик икки доғ ва икки ўт эди, ҳижрон бу ўт устига ёғ тўкар эди. Гарчи бу икки доғнинг ўти яширин куйдирса ҳам, ҳижрон олови жон куйдиргувчи чақмоқ эди. Шунчалик ғам ва балолар йиғилганидан, у ғамзада мубтало йиқилиб қолди. Заифлик унинг танига ғолиб келиб, шу даманинг ичиде ётиб қолди. Ваҳший ҳайвонлар унинг бошига тўпланиб, ғавғо қилишарди, ерда фақат кийиклар ва зич гўрларгина бор эди. Унинг аҳволи шундай мушкулликка тушди.

Накл этгувчи яна шундай ривоят қиласиди, у ерда гул-юзли паризод, Мажнун васлидан шод бўлган эди, бироқ ўша васлни бу самарасиз дунё яна ҳажрга айлантирди. Лайлининг яраси малҳам топгандан сўнг, ҳайҳот... яна бир ўт уни

тамоман ёндириди. Бу ўт у санамни куйдириб, Эрам боғининг гулини дўзахгасолар эди. Бетоб тани дармонсиз ва азобга тушган, жони ғоят қийналган эди. Ёрига тушган бу мотам, Лайли учун худди ўз ота-онасининг аламини тортгандек туълди. Бу ҳол унинг дард-аламини ошириб, ғам йўлини узунроқ қилди. Мажнун бошига тушган воқеаларнинг сабабчиси ўзи эканлигини билар эди. Мажнун ота-онасининг ҳалок бўлишлари, унинг Лайли кўйида дард тортишидан бўлди. Фалак туғдирган бундай ҳодисаларга бевосита сабабчи бўлди.

Бу кулфатлар Лайлининг ғамини ортдириб, уни ғам ўтига исириқ қилиб ташлади. Ғам-ҳасратлардан зорланиб, йиги таронасини қўйидагича бошлади:

«Эй, ўзбошимча тескари дунё, зулмингданвой, юз туманвой!.. Қачонгача жонимга ситам ва кўнглимга аламни насиб этасан?! Бир гулни шапалоқлаб, япроқларини узисб совурмоқ қачонгача?! Бир баргнинг ҳоли шундай бўлгач, яна уни барча халқнинг оёқ остига ташлайсан. У барг сенинг юлдузларингга ўхшаш, әлга бахтсизлик ва ғам келтирадиган эмас эди. Бир сарвга қўйл узатиб, шоҳларига юзларча шикаст бериб ўтинларини тўхтосиз ёндириб, шоҳларини ўт қилиб, ўтини кулга айлантиришдан муддаоинг нима?! У сарв сенинг наҳс, жаҳонни хароб қиладиган зузанабинг* эмас эди-ку! Бунча энди бир лаълга тош уриб, уни икки тош орасида майдаламоқ? Буларга қаноатланмай, тошлар орасида талқон қилмоқчисан. Аторудинг билан бәраварлашиб, қонидан ранг олган эмас эдим. Бир кийик боласи мушкини кўриш билан, уни ўлдириш учун ўч ханжарини тортидилг. Уни сўйиб ташлаш билан қаноат қилмай тамоман аъзосини парча-парча қилдинг! Бу хуш бўй таратувчи бир кийик боласи эди, сенинг шум асадинг эмас эди. Бир ажойиб тустовуқ учун тузоқ қўйиб, тутиб олгач, уни ўлдиришга ошиқасан! Ошиғич рашишда унинг парларини юлиб, ўт устида кабоб қилмоқчи бўласан. Нима бўлса-да бир тустовуқ эди, у овчилик қиладиган наср тойиринг—қийгиринг эмас эди-ку? Заиф, бенаво юз дард-балога мубтало бўлган Лайлини ўлдириш билан кифояланмай, ҳажр ўтига хас каби ташлайсан. Муддаоинг нима, бу Лайли сенинг маккор золинг эмас эди-ку?!

Совурилгайсиз эй ўтиб кетувчи фалаклар! Қўзғолинг, эй ҳазар билмас юлдузлар! Жисмимни қилдек қилдингиз, жонимни хароб қилдингизлар! Бугдой каби қоврилиб, сомон каби соврилишим қачонгача? Ҳам борлигим уйи бузилди, ҳам

* Зуванаб, зузаноба — қўйруқли юлдуз, наҳс юлдузи.

тоқатим иплари узилди. Жисмим чангларини оҳим учирив юборди, эй ҷарх, ҳали ҳам гуноҳим аригани йўқми? Қийноқларинг кўнглим уйин бузди, эй фалак, азоб-уқубатларинг тугамадими?! Бу азоб-қийноқлар ҳам меники, ёримдаги ранж ҳам меники. Унинг ота-онаси нинг ўлиши, менинг ҳам ғамларимни сширди. Агар у дардга тўлган бўлса, менинг дардим икки бор кўпайди. У ота-онанинг ғамини тортса, мен ҳам унинг, ҳам уларнинг ғамини чекаман. Лайли жудолик балсига йўлиқкан, шунинг учун ҳам, унинг икки Мажнунча азоби бор. Унинг учун умрни ҳавас этиш ортиқча бўлганидан, жонидан кечиши ҳам таажжуб әмас!»

Лайлининг фифон ўти ҳаддан ошгач, жисмига ҳарорат тулашди. Бу ўтдан гулюзли Лайли, ботаётган қуёшдек қизиди; гул барги каби юзини терлар босиб, иситма ўтидан тўлгана бошлиди. Терлари гул юзига томиб, иситмаси билан юзи чўғдек қизарган эди.

Онаси Лайлининг бу ишидан хабардор эди. Қизини ногоҳ шундай ҳолде кўриб, кўнгли изтиробга тушди, гёё жигари кабоб бўлди. Жигари пора бўлган она, бағрининг куйишига чидаёлмай, отасини ҳам хабардор қилди. Ота ҳам қизининг қаттиқ аҳволини кўриб, маломатга тушди. Ота-она ва қавмуқариндошлари йиғилишиб, Лайлининг бошига табиблар келтириганди.

Қуёш (Лайли)нинг эса изтироби ошиб, юзи саргайиб, танида иситмаси ҳам зўрайди. Табиб, хастанинг сиҳат топишини истаса ҳам, хастанинг баданида заифлик устун келган эди. Исонефас ҳаким ҳаракат қилди-ю, лекин қуёшнинг ҳарорати ҳеч камаймади. Шунча муолижалар билан ҳам аҳволи яхшиланмади, ажал етганидан кейин, муолижадан нима фойда чиқади? Ҳар кун унинг дармонсизлиги ортиб, ғамлари ҳам узоққа чўзилар эди.

Борган сари бош оғриги кучайиб борар экан, қулогига шундай сўз эшитилди:

«Дард ва мотам асирилгида қолган Мажнун ҳам ўлим ҳолида экан, у зорлик ва ҳижронда йиғловчи Мажнун гўристонда ўлган кишидек бўлиб ётар экан. Гоҳ ўзида, гоҳ ўзида кегиб, кўзи ўлик кўзицек нурсиз бўлиб қолган эмиш. Тани ўз мотами билан азобланар, дардинг эса жисмидан жонини олмоқда. Юзларча ғами устига яна мотам тушиб, сенсиз мотамга мотам қўшилди. Жони ғам ва дард бўлан поймол бўлиб, аҳволи ҳаддан ташқари ҳароб бўлган».

Маҳваш, яъни Лайли бу сўзларни эшитгач, бир ўти минг бўлди. Умрининг кемаси балчиққа ботиб, ўлишига ақли етиб ётди.

Эй табиб, энди парҳез қилмайман, чунки дардим ўти борган сари ошмоқда. Шарбатдан менинг ичим куиди, қўлимга сув шарбатини бер!

XXXV

Ҳазон ели боғ зеболаги ҳаёти шамъини ўчирганда Лайли ҳаёти баҳорининг гулларини ажал ҳазони совуқ шамоли кўкка совуриб, Мажнуннинг руҳи булбули бадан қафасини гулбун узра ташлаб, у яраланган гул барги сўлгунча учиб кетгани

Куз фаслининг совуқ шамоли етиб, бўстоннинг чиройини сомон ранг қилди. Сариқ касалига йўлиққандек, бутун япроқлар саргайиб кетдилар. Ҳамма барглар ер тўшагида касаллардек оёқ узатиб ётдилар. Баргларнинг ғанди пастда, гўё чўзилган оёқлар эди. Меҳржон* шамоли келгач, барглар ҳам ўз жонларига умидсиз қарай бошлаган эди. Дараҳтлар ҳам титрамоқча бошладилар, мевалар уй кунжига жойландилар. Сарсар чаманга торож келтириб, бўстон аҳли гулларни эса ялангоч қила бошлаган эди.

Чинор ичига тушган ўт ҳам ўз учқунларини кўкка етказди. Бўстон болалари (сабза-кўкатлар) бу ҳийлани англаб, ўзларининг пилтадек вужудларини куйдирдилар. Чинор баргини шамол боғ томон учирса, қизил барглар билан гул тўкилгандек бўлар, чанг-тўзонлар боғни тунга айлантирган, япроқлар юлдузлар оламига ўхшар эди.

Шуниси қизиқки, юз туман юлдузларнинг барчаси тупроқ-қа кириб йўқолдилар. Ҳар бир муборак юлдуз (барг) ойна эди, унинг банди ойнаникидек эди. Олтиндан бўлган ойна ҳеч нарсани кўрсатмагандек, бу ойналарда ҳам ҳеч нарса кўринмас эди. Ошиқнинг юзи лаълга ўхшаш кўз ёшидан қизаргандек сариқ барглар ҳам ўз новдасидан қизарар, ўша ёшлар бу юзга чизиқлар қолдириб ҳар томонга қатралардек нақшлар қўярди.

Ҳар бир барг дараҳтларга ўлим номаси, барглар эса нуқталарадек бир-биридан айрим эди. Ел сув устига сариқ барглар тўкиб, кўкимтири сахифаларга зар сочар эди. Йўқ-йўқ, у оқар сув соғ тиғ, унинг ғилофи олтиндан қилинган эди. Чи-

* Меҳржон, маҳражон — куз фаслининг ўргаси.

ройлик қўлга хина қўйилгандек, токларнинг барги ҳам қизил ранг билан безалганлар. Гулда сумбул очган, гулгун юз, а кокил ёйилган фасл кетиб, лоланинг кафтига доф қўйди ва бинафшанинг сочини буради.

Бир вақт совуқ сарсар шамоли келиб, сув ҳарири узра мармар тошини ёпади. Боғ гулнинг мотамини тутиб, шамолнинг хуруши осмонга етмиш. Булбул ўзини азали ҳисоблаб, ўз пардаларини қора кигиз қилиб бўйнига илган. Богнинг ахволи шу қўйга тушиб, навбаҳори хазонга учради. Гулшанга кўз уруш очиб, дараҳтларнинг баргини тўка бошлади. Гулнинг баргини эса ерга тўкиб, шоҳларини ерга teng қилди. Ҳам лоласини заъфарон, ҳам баҳорини хазон қилди. Куз келдида, гулнинг баргларини ҳар томонга учирди ва совурди.

Лайлики, ҳусн боғи, бошдан-оёқ жаннат гули эди, унинг касаллик шамоли тезлашиб, бўстонидаги барглар ҳам тўкила бошлади. Сочлари камандининг чигаллари ечилиб, жонлар бўйнига солинган ҳалқаларни олди. Ҳусн шоҳини касаллик ношод қилиб, ўз тутқунларини ҳам озод қилиб юборди. Озод бўлганлар тез кетсалар ҳам гирифтор бўлганлардан бири тек қолди. Қошлари икки қулочини очиб, кўзларининг уйига посбонлик қиласар, яъни у уйга ноз кириб, элга таннозлик кўрсатмасин дер эди. Қон ёши гулни тоза қилди, ўлим машшотаси эса юзига упа-элик қўйди. Яъни «ишқ сени жондан ажратса, дунёдан қизил юз билан кетгин», дегандек бўларди. Юзидағи ўсма, сурма, упа-эликларни тернинг суви ювиге кетди. Яъни унинг боғи куз фаслида гул, бинафша, сабзаларини йўқотган эди.

Асалдек ширин лаблари иссиқдан қуриди, йўқ, балки бирбирига ёпишган эди. Яъни уруғлар муҳрдек босилиб, оғзини сўзлашдан ҳам тўхтатиб қўйди. Бағбақа ўрни чоҳдек чуқурлашиб, ундан қора хол қудуқдаги кабутардек эди, яъни бу кабутар ўлгуси ва тупроққа кўмилгусидир.

Шундай бандга тушгач, гулнинг устига бинафша рангли парда ёпди. Яъни дилкаш қуёш ботаётган вақтда, унинг юзини бинафша ранг булат ёпса яхшироқ бўлади.

У нозанин мусоғир шу ҳолда ўлим талвасасига тушди. Бу оламдан кетиши кераклигини ва жонини топшириш мажбуриятида эканини аниқ билди.

Кўпчилик элдан қочиб, бир оз вақтга хилват талаб қилди. Уз олдига онасини чақириб, юрагидаги яширин сирларини арз этди:

«Эй жони менинг маконим бўлган, жонингга менинг хаста жоним фидо бўлсин. Менинг ғамларимни тамоман ўзингта олиб, дард-аламларимга қолдинг. Мен агар минг йил тирик бўл-

сам ҳам, қайси тил билан узрингни айта оламан? Қисқаси гулим хазон бўла бошлади, бу гулистанга қишининг изғирини тушди. Жафо қилгучи фалак боғимдаги гулни ва гулимдаги сувларни қуритди. Сарвимга қизиқ ҳоллар тушиб, чаманин тарқ қилиш зарур бўлиб қолди.

Ҳар ҳолда кетар вақтим етиб, бу боғда туришим тугабдир. Бундай видолашиб маҳалида, сиримни яширишдан фойда йўқ. Сен билдингу, аммо уни кўнглингда сақладинг, мен энди уни ошкора айтаман:

Ҳозир омонатни топшириб, тупроққа кетар эканман, кўп аза тутма, кўз ёшлиаринг селини оқизма. Юзингни шапалоқ билан мажруҳ этиб, бедодлик билан ўз жонингга озор берма. Бу сўзларим матьқул тушмаслигини биламан, лекин сенга ўзга бир васият қиласман. Менинг мотамим учун кўп аза тутиб, ўзингни уриб юзингни қорайтирганин. Мумкин қадар сабр қилиб, тинчлик ихтиёр қилгин. Тангри сенга сабр берсин, қабиланг устида омонда сақласин. Гул кечса ҳам чаманга дард юзланмасин, кун ботиш билан осмон юзини тўзон қопламасин».

Шундай кўп дуолар қилгандан сўнг, яширин сақлаган сирини очиб деди:

«Бу мотам ошкор бўлгандан сўнг, бутун тогу сахро ҳалқлари биладилар. Шаксиз, менинг у гарibi зорим, қайгу шоммида қора кунда қолганим, менинг ёдим жисмининг ҳаёти бўлган, ўлмоғи эса хайрбодим бўлганим, шамолдек даштларда ҳар тараф сайдиб этиб, тоғ орасидаги садодек чирманиб юрса ҳам, бу сўзлар, қулогига етади, бу ҳодисани эшигади. Эҳтимол бу жон қийновчи қиссадан у интизор воқиф бўлиб, менинг руҳимни истаб, унинг руҳи ҳам ўз гавдасини таркэтар ёхуд бу тарафга келиб, умрим қуёшидек бошимга келар. Жонни фидо қилмоқ билан фироқ жабридан қутулиб, элга ишқ йўл-йўригини кўрсатар. Тупрогини тупрогимга ҳўшиб, жонини эса мен томонга йўллар.

Унинг зор гавдаси жонсиз бўлиб, тупроқ устида ётса, зинҳор уни ҳурматлаб, менинг ёнимдан ўрин бергайсан. Унинг жисми муқаддас, асли покдир, кўз ёшинг билан ювсанг ҳам арзиди. Сен гина қилмай, меҳрибонлик билан унга жон пардасидан кафан қилгин. Мени ҳам ўша кафанга ўраб, икки баданга бир хил кафан қил. Фарзандингдек унинг ҳурматини жойига қўйиб, ўз фарзандинг билан бир ерда ётқиз. Жон жонга уланса, икки фарзандни бир тобуттга ётқиз», деб онасиға васиятини тугатиб, сўздан тўхтади, кўзини юмди. Мажнун сўзини айтиб жон берди: энди ҳар қанча Лайли деб чақирсанг ҳам у йўқ эди.

Бу қора кунни кўрган онаси шундай қаттиқ фарёд чекдики, гўё у фарёд ўқи учиб осмон бағрини ҳам тешиб ўтди. У дилрабонинг, яъни Лайленинг бошидан, ўлим айлангандек айланди. Унинг товонларига кўзини қўйиб, киприклари билан қитиқлаб уйғотмоқчи бўлар, яъни уйқу вақти эмас, кўзингни оч, оёққа тур, хандон ташлаб, сўзлагига дер эди. Гоҳ унинг қўйлини қўйнига маҳкам тортиб, титраб, йиглаб, уни қучоқлар, яъни унинг уйқусини ғоят қаттиқ гумон қилиб, уни уйғотиш учун қўйлини тортарди. Унинг тўзғиган соchlарини тўплаб, у қоронғи мотам кунидаги шамъ (яъни Лайленинг югини) кўргизмоқчи бўлди. «Кечанинг қоронғилиги қолмади, кўзингни оч, ухлаш муносиб эмас» дерди. Гсҳ юзини юзига қўйиб, кўз ёшлари билан юзига сув сепарди. Яъни юзига сув тегиб, ногоҳ у ой сесканиб уйғонармикан, деб ўйларди.

Шундай аҳвол билан кўп тўлғанди: лекин оғир уйқуга толган маҳваш кўзини очмади. Унинг уйғонишидан умиди узилгач, қўёшга абадий шом тушди. Оқ сочини ёзиб, фифонлар чекди, ўрилган соchlарини юлиб ташлади: оҳи билан жаҳонни куйдириб, уни совутиш учун кофур сепар эди. Кўксини ёқасидек чок қилиб, кўнглидан аланталар чиқарди. Гўё тонг ёқасини йиртиб, фалаклар қуёши ўзининг учқунларини сочгандек эди. Тирноқларини юзига урар, тирноқлар эса тирноқча келадиган ерларни ўйиб олар эди. Ўйилган ерлардаги қонлар, кўз булогидан оққан қонлардек оқарди. Фифон тортиб айтарди: «Эй бўтам, қандай оғир уйқу экан бу?! Кўзингни оч, ҳаволар соф, қизлар эса гулшанга бормоқчилар. Барчалари чорбоғ сайрига майл қилишиб, «Лайли келармикан» деб маҳтал бўлиб туришибди. Улар юз хил зар-зеварлар тақиб ясангнлар, ҳаммалари кўз тутмоқдалар. Ўрилган соchlарингни ёзиб, оламга хуш ҳидларини таратай. Уни ювиш билан зулмат орасидаги ҳаёт сувини кўрсатай. Уни тарааш учун қўл очиб, қоронғилик ичидаги йўллар кўрсатай. Ўриш, таралиш тугагач, бўйи бастинг ганижи узра икки илон ташлай. Илон ҳам эмас, қора чилвир, унда кўнгилни боғлайдиган бурамлар бор. Ўсмадан қошингни кўқартириб, кўзинг мижжаси қиличига яшил қин ясай. Кўзларингга сурма қорасини тортай-да, эл кўзига дунёни ҳам қорайтай. Сенинг юзингга эликни суртмоқчи бўлганимда, унга юзим қизиллигини қўшай. Ёмон кўздан сақлаш учун юзларингга нил чекай. «Бол» сўзи остига нуқта қўйганларидек, ширин лабинг остига хол қўяй. Бўстондаги гултоҷихўрз доналари каби юзингга яна хол қўяй. Сочингни шундай рўмол билан боғлайки, унда ҳам кўринсин, ҳам яширинсин. Шундай гул ранг либос кийдираики, ақл ҳам лол бўлиб қолсин. Сени замона офати каби ясантироиб.

гулшан сари юборай. Қизлар билан гулшанда хиром қилиб, диги аҳлига зоҳидликни ҳаром қил.

Мажнун ҳам интизорлик тортиб, боф ичра зорланиб фиғон қилмоқда. Сен кечикиб борганингда, у дилтант бўлиб, дарҳол қайтса ва мендан сўраса нима деб жавоб бераман? Ҳам уни, ҳам мени зор қилма, ундан мени шармисор қилма!»

У оҳи билан жаҳонни ва осмонни бундай қорайтирганида, ташқарида отаси бош яланг, ёқаларини йиртиб, кўксига тош уриб йигларди. Ёлғиз отаси эмас, балки бутун қавму-қарин дошлари бу азада ҳасрат ёши тўкардилар.

Тақдир Лайлини шу ҳолга солди, энди Мажнун сўзини бошлай:

Мажнун ўликлар билан бирликда қабристонда ялангоч ётарди. У ҳам гўристон ичидаги бўлган ўликлар каби жондан ажралган ва тани ҳам тупроққа аралашган эди.

Лайлига эса бундай нотавонлик етиб, бу хастажонлик уни ийқитган эди. Маъшуқа шундай дардли бўлгалида, ошиқнинг иши албатта ҳалок бўлиш-да.

Мажнун гоҳ тушида, гоҳ хаёлида, ишқилиб ҳамиша Лайли билан бирга бўларди. Гоҳ пок кўнгил, гоҳ ҳотиф уни дилдоридан воқиф қилиб, маҳваш ажал қўлидан майни олгунча бўлган ҳолларни айтар эди.

У девона, яъни Мажнун симобга ўхшаб титраб-қалтираб ётганида, тўсатдан қулогига бир овоз эшитилдики, у қуйидаги шум хабарни эълон қилмоқда эди:

«Эй, дарду бало қўшинларининг шоҳи! Ишқ аҳли эшигинг олдидаги тупроқ бўлган зот!

Эй дард ўлкасиннинг қаҳрамони ва ишқ аҳлининг ҳукмрони! Ишқ аҳли қулиғига ҳавасида бўлган, тургин, эндиликда ётиш чорги эмас! Тоза боғингга хазон тушиб, чирогинг эса тонг шамолига учради. Булбул бўлсанг парвоз қил! Лайли шамъига парвоналигинги бошла!

Ёр сафар ишига киришди, бир ҳамроҳга маҳтал бўлиб сени кутиб турмоқда. Унга йўлдош бўласанми ёки у ўзи ёлғиз сафарга кетаверсинми?»

Мажнун аҳвол нималигини билгач, тани жуда кучсизлашиб кетган бўлса ҳам, қоплон каби ўрнидан сакраб турди ёки осмон кийиги тоғдан иргигандек бўлди. Дарҳол қабила томон югурди ва оғзида висол куйини тараннум этиб, жонини қўлга олиб садақа қилмоқчи, Лайли учун ўз жонини қурбон қилмоқчи бўлди. Шодлик кўз ёшини ёмғирдек ёғдириб, яшиндек сакраб юрарди. Мехрининг ўти жаҳонни ёритиб, балки қуёш каби бутун дунёга нур таратиб, ўлдирилишдан кўнглида ҳеч қандай қўрқинч бўлмай, душманидан ҳам ваҳимага

тушмасди. Эл эса унинг ҳайбатидан ва баъзилар ваҳший ҳайвонларнинг оғатидан қўрқувга тушардилар. Шу онда у Лайли эшигига қадам қўйди, лекин йиртқич ҳайвонлар орқада қолди. Мажнуннинг бундай ҳайбатидан Лайли қабиласи одамлари қўрқиб, жойларидан қимиrlаёлмай қолдилар. Лайлининг ҳовлисига етганида, у ҳеч тортинмай уй ичига кирди.

Лайли ўлими олдида, онасига қилган васиятларида, Мажнун бу даргоҳга келаркан, унга ҳеч қандай озор берилмаслигини илтижо қилган эди. Бу жондан азиз ёри, балки абадий йўлдоши уй ичига кириб, бир-бирини кўргач, ҳам у, ҳам бу муродларга етдилар.

Лайли жононига қандай жон фидо қилган бўлса, Мажнун ҳам жонондек жон берди. Лайли абадий уйқуга кўз юмиб, йўлдошига етишди, Мажнун эса унинг йўлидан бош тортмай, ўз жөнини фидо қилди.

Ҳисобсиз кишилар уйга кириб, Мажнун ишига назар солганиларида, унинг жонсиз гавдаси ерда узала тушиб, Лайли билан баравар ётганини кўрдилар. Кўрилмаган бундай воқеа қабилани ҳайратга туширган эди. Уларнинг бундай ишқ ичida ўлмоғи барча әлнинг ҳам ишқини пок айлади.

Таъзия ўтини пасайтирганларидан сўнг, ўртада шундай бир ажигб сўз ўтди: қайси суратда кўмиш керак.

Барчалари дедиларки: «Бу ҳар икки ғамгин бутун бузукликлардан пок эдилар. Ҳаёт чоғларида бу раҳмсиз ишқ уларни бир нафас бўлса ҳам шодлантирмади. Айрилиқ биёбонида жонларидан тўйиб, армон билан оламдан ўтдилар. Уларнинг руҳлари жаннатда абадий висолга етишади. Шунинг учун ҳам ҳар икки бадани қўшиб, бир кафан, бир гўр ясаш керак. Жонлари бўлса бир-бирига қўшилди, тупроқлари ҳам тупроқларига қўшилиши мувофиқдир».

Лайли ҳам шу васиятни қилганини эсларига туширгач, барчалари шод бўлдилар ва керак нарсаларни ҳозирлаб, ўликни одат бўйича ясантирдилар. Бир тобутга солдилар икковни, жонсиз келину ўлик куёвни. Ҳар икки гавда бир кафангага жойланди, йўқ-йўқ, балки икки жон бир гавдага кирган эди. У икки дилоромнинг бир тобутда ётиши, худди бир бодом пўсти ичидаги бўлган қўш донаға, дугонаға ўхшар эди. Йўқ-йўқ, уни қўш дона дема, у дона дугона ҳам эмас, дугона икки бадандан иборат бўлиб, ҳар иккаласининг бошқа-бошқа кафандарига бор. Булар шундай бир дона эдиларки, аслида икки жузув деб айтиш мумкин бўлса ҳам, лекин ҳар бири бир-бирига ёпишган бир узв эди. Буларга васл ваҳдатининг шиддати, иккилиқ мажолини бермаган эди. Ҳар икки бадан дона

каби бир бўлганидан, дона қобуғи каби кафандари ҳам бир бўлди.

Алқисса бу жонажон ёрлар, абадий висолни топгач, тобутлари устига чиройли рангдаги ажойиб нақшли ипак пардаларини ёпдилар. Уларни бош устига қўтариб, гўристонгчача олиб бордилар. Бу икки дилрабони тобут билан гўр ичига оҳистагина олиб кирдилар. У мўлжалланган жойгача олиб бориб, тупроқ ғарифхонасига қўйдилар.

Уларни тупроққа қўйгач, у қоронғи гўрдан, ҳайҳот, тезда чиқдилар.

Қора булутлар ой билан қуёш юзини бекитгани каби гўр бир бўлгандек қабр ҳам бир бўлди. Ишқ аҳлининг умид шамълари ўчди, чунки ой билан қуёш ерга ботган эди... На ишқ аҳлининг шоҳи ва на ҳусн осмонининг моҳи қолди.

Лайлининг ота-онаси, қавму-қариндошлари биргаллашиб, ҳар кун икки маҳал йиғилиб, қабр устида йиғлашар эдилар. Замон ўтиши билан, булар ҳаммалари ҳам бир-бир тупроққа жойланди.

Эй фифон чекувчи, йиғла! Умр уйи барбод бўлмоқда... У икки ёр кетган бўлса, мен ҳам, дилнавоз ёrim ҳам қолмаяжакмиз!

XXXVI

Ишқ таърифидаки, айнининг нурли тобланиши тупроқни чашмадек оқизади; шинининг учқунлари шуъласи кўнгуллар қўшинига нуқсон етказур; қофининг вазмин тошли тоги кимга юкланса нобуд этар ва нуқталарининг тоза доги ҳар чоқ кўнгилга тушса лопанинг беш баргидек қонга бўйяди

Эй ишқ, ажойиб кимёсан, балки оинайи жаҳоннамосан. Сенинг зотингда кимиёлик ҳам, оина жаҳоннамолик ҳам бор. Сенингки зотинг иккidan экан, ҳар иккисини ҳам исботлаб берайин.

Сени кимиё дедим, мартабанг ундан ҳам буюкроқдир. Фалак сенга шундай куч берганки, мисни ҳам олтин қиласан. Яратгувчи инсонни халқ қилган экан, гавдасининг лойи тупроқдан бошқа нарса эмас. Сен инсонга яқинлашгач, унга ошнолик қилгач, у кимиёга айланди. Инсоннинг юзини, балки хоксор танини ҳам олтин қилдинг. Бу билан чекланмай,

у бечорани хас каби жудолик ўтига солдинг. У ўтда тўлғаниб, куйиб, бутун вужуди тамоман эриди. Ўзи ҳар қандай губордан холи бўлса ҳам, шу куйиш билан унинг вужуди олтиндек пок бўлди. Бу тупроқдан яратилган гавда олтин бўлди, сараланиб покиза ҳолга келди. Ўтда куйиб, пок, губорсиз бўлди, олтингина эмас, кимиёваш бўлди. Ситаму жафолар кўрсатсанг ҳам, тупроқни кимиё қиласан.

Эй, ишқ! Иккинчидан, сени жаҳонни кўрсатадиган кўзгу каби жуда ёргу дедим. Бунда ҳам тафовут бор, кўзи ўткир кишигина унинг фарқини билади.

Искандар ҳам пўлатдан бир оина ясад, Рум элида миора солиб, минорадан ўша оинани Фарангистонга қаратган эди. У оинанинг жамолида бутун Фарангистон акс этиб, кўриниб турарди. Оинанинг шундай зиёли хислатини билишгач, унга «Оинаи жаҳоннамо» деб ном беришди. Ҳақиқатда оинаи жаҳоннамонинг ўзиdir.

Эй, ишқ! Жаҳонни нурлантирувчи қуёш ҳам сенсан, оламни кўрсатувчи кўзгу ҳам сенсан. Кимнинг кўзи сенга тушган бўлса, у ер ва кўкдаги нарсаларни аниқ кўрди: сени кўришни ихтиёр этган замон ҳар томонга боқса ёрини топди. У ўз вужудини йўқотиб, абадий ҳаётга эришди. Ишқ бахт ва давлат ҳисобланиб, киши булардан бир нафас ҳам холи бўлмайди.

Унинг сирини икки хил қилиб айтдим; аввалгиси рамзий ишқдир. Кимки дард, эриш, куйиш, юзларга шуъла билан ёргуланиб, поклик васфига эга бўлса, шундагина биронга ошиқ бўлади. Унинг ишқи ичидатортган фироқ ва дардлари уни ўзлигидан тамом ажратиб, ягона қилиб қўяди. Сўнгги ишқни ҳақиқий деб билгилки, давлат унга рафиқдир.

Аввалгисида киши тозаланиб, иккинчисига ўтса, йўқ-йўқ, ўтиш эмас, балки ҳақиқий ишқни ўзига тортиб, кўнглига висолнинг уругини экса, ҳам уни бутунлай торож этиб, унинг рамзий шаклидан асар қолмаса, кўринадиган жойдан кўринмасдан мақсадга сингиб кетса, ҳаётдан ва коинотнинг яратилишидан мақсад шудир.

Мажнун бу икки ишқнинг бирига етишиб, иккинчисидан ҳам баҳра топди. Бу ишлар Мажнуннинг ўзидан бўлмай, балки ишқ уни ўзига жазб этган эди.

Кимки ишққа дучор бўлиб ёки эҳтирос машъаласи унга шуъла урса, тоғ бўлса ҳам вужудини сув қилиб бор йўғини нобуд этиб юборади. У ишқ чақмоғи Тур тоғидан ловуллаб кўрингандা, шу тоғ ҳам сувдек эриб чайқалган эди. Бу шуъла кўнгилга тушиб таъсир қилгач, куймоқдан бошқа чора йўқ. Бу ишқ ўти кимга насиб бўлса, ундан жаҳоннинг куйи-

шига ажабланиб бўлмайди. Утда қил қандай буралса, куйгани ошиқнинг жисми шундай тўлғонади. Бу ўт ошиқни кўз ёшига гарқ этса ажабланма, чунки чақин чақан жойга ёмғир ёғади. Кўз ёши бу ишқ ўтини камайтиrolmas экан, бу таажжуб әмас, чунки чақиннинг ёмғир сувига не парвоси бор? Кимки ёлғондан куйиш, оҳ-воҳ ва зор билан ўзини ясама ошиқ қилиб кўрсатар экан, ундан кишининг ишқ ўти ёлни ўзига тортолмайди, ёлғон тонигга ўхшаган беҳуда бўлади. Капалакнинг ранги қанчалик дилга ёқимли бўлса-да, аммо парвонадек ўз жигарини куйдирувчи әмас. Ҳар қандай ранги сариқ кишини ошиқ деб бўлмайди, чунки ҳар бир сариқ гул ҳам заъфарон бўлолмайди. Жазб этолмайдиган сариқ юз риёли бўлади, самғ* қаҳрабо ўрнига ўтмайди. Сариқликда қанчалик машқатлар кўрган билан зирних** олтин бўла олмайди. Ҳар қандай оҳ ҳийладан иборат бўлса, у иссиқ ҳам, совуқ ҳам әмас. Ҳақиқий ошиқ ногоҳ совуқ оҳ чекса, унинг шу совуқ оҳи ҳам оламга ўт солади.

Куз шамоли совуқ нафаси билан япроқни қурилади ҳам қорайтиради. Бедард кишининг тўйкан кўз ёши мешқдан*** тўкилган томчига ўхшагандир. Ишқ аҳлининг кўз ёши тўкиши шамънинг дурданалар тўкишига ўхшайди.

Кишининг дардли бўлишига сабаб ишқидир, ишқ кишини иккала дунёдан „ам ажратиб қўяди. Парвонани ишқ маст эт-маса, ўзини доим ўтга уармиди? У куяр вақтда жонидан кечган экан, икки жаҳон билан унинг нима иши бор?

Икки дунё ишидан хабардор бўлганда телба ногоҳ ўзни ўтга солармиди?

Ўтнинг сачрашидан боланинг хабари йўқ, ўзининг куйишини ҳам билмайди. Узоқдан қараганда киши фақат ўтнинг алангасини кўради, куйган киши нишона кўрсатади.

Ишқ кимгаки азалдан насиб бўлса, унга ҳеч қандай зарар тегмайди, у озод ва пок бўлади. Парвонанинг қанотидағи холлар — ишқ доғининг нишоналари. Яратилишиданоқ унинг қанотида доғ бор, ишқ уни ҳеч бир тарқ этган әмас. Бу ишқининг ўтига даво ахтариб бўладими, ҳар бир орзуманд кишига у насиб бўлармиди?

Е раббий, мендек дардман, ҳижронда қолган кимсанинг жонини ишқ ўти куйдирса ҳам кўнглимни бу ўтдан ғамгин килма, балки шавқини дам-бадам кўпайтиргин. Севги ўти-

* Самғ — дарахт елими.

** Зирниҳ — Олтингугурт билан маргимуш аралашмаси.

*** Мешқ — қўй ёки очки терисидан қилинадиган сув ёхуд қимиз сақлагич.

нинг чўғларидан танимни қуритиб, шуъласидан кўзимки равшан қўилгин. Оҳимни у ўтнинг тутунига ўхшатиб, шу тутун билан кўз ёшимни равон этгин. Кўнглимнинг қуши самандар каби ишқнинг ўтхонасида ором топди. Шу ўтнинг учқунларидан кўнглим қушига дона сочгин, унинг тутантериқ хас-хашакларидан ошиёна бергин. У дона билан кўнглим қушини тўқ этиб, ўша шуълалар орасида йўқ қилиб юборгин.

Эй косагул, оташпарамстлар оловини ёқкин! Менинг ғамим обнус* ёғочига ўхшаган қора қайғудандир. Яъни бир пиёла муғона майингдан бериб, у билан ичимга ўт солгиш!

XXXVII

*Фалак эҳтиромли, қуёш нисбатли осмон
бўлган шаҳзода, яъни Султон Увайс ба-
ҳодир мадҳида хотима; насиҳатлар
бисотида кўп лаъл ва яхши сақланган
дур ва панду насиҳатлар дастурхонида
мевалар ва гуногун нозу неъматларни
ул ҳазратга қулоққа олмоқ ва оғизга
солмоқнинг чақириги*

Эй замоннинг соқийси, ғам аҳлига шодлик қадаҳини тутгин. Қадаҳингни гардун қилиб, аввал унга шафақ ранг бода қуйгин. У пиёла лиммо-лим бўлиб тўлгач, сўнгра менга ҳавола қилгин. У қадаҳни кўриш биланоқ ҳушдан кетиб, бирданига шундай сипқорайинки, осмонга ўхшаш у тўлиқ қадаҳ. Ўз атрофида бир томчи юлдузини ҳам тополмасин.

Шундай қилиб, сўзимни фалакдек юқорилатиб, юлдуздек дурлар сочайин. Дарёнинг дурри ва коннинг лаъли каби сўзларни топгач, уларни шаҳзодага багишлайин.

У адолатли шаҳзодадир, унинг етти отасигача шоҳ бўлгандир. Бутун коинот, замсна султони шаҳзода Увайс даргоҳининг тупроғи ҳисобланади. Унинг зотига иззат ва тамкин хос бўлиб, ишида лутф, чаққонлик ва ғазабдир.

Уруш чоғи қаҳр-ғазаби жўш урса, базм чоғи май пиёласини кўтарганда лутф багишлайди. Фақат базмда әмас, лутф доимо у билан биргадир, унинг гавдаси холис лутфдан яратилгандир. Амаки, тоға ва оталари ҳам, унинг ўзи ҳам ҳаёли ва одоблидир. Унинг табиатида саховат билан шижоат бўр, шундай бўлгач, унга бутун дунё итоат қилар экан, ажабланмас-

* Обиус — қора тусли қаттиқ ва хушбўй дараҳт.

лик керак. Уни мақташ, осмонни буюк деган сўздири. Ақл билан ёйлаб қарагандо, у сўзига содиқ киши экан, саҳифалар узра қалам тебратиб шафқатли кишилардек унга насиҳат қилиш мувоғиидир. Э мулк гулшанининг истиғноли сарви, нозли сарв ҳам эмас, балки жуда ҳам юксак сарви!

Бу сўзларимга қулоқ солиб, бу дурларни қулоғингга исирға қилган. Жаҳоннинг бевафо эканлигини ва умр биносининг бебақо эканлигини унутма. Жаҳсон сувнинг устида, умр бўлса елнинг устида қарор топгандир. Ким сув билан тупроққа шод бўлди? Шамолга қачон суюниб бўлибди? Киши юз йил жаҳонда шоҳ ёки хонақоҳда гадойлик қилса ҳам, ўлим аждари оғзини кенг очганда, ютилиш учун шоҳ билан гадо тенгдир. Сен хоҳ айш ичидаги бўлгин, хоҳ ғаму дард орасида бўлсанг ҳам ҳақни бир нафас унутма. Ҳам худонинг қаҳридан қўрққин, ҳам раҳматидан умидвор бўлгин. Агар шоҳлар менга бўйсунсик десанг, қашшоқ, гадолардек доим ўзингни паст тутгин. Шоҳлар шоҳи бўлганингда ҳам фақир одамлардан узоқлашма, уларнинг йўлига тупроқ бўл.

Ота-сналарга баравар эҳсон, муруват кўргазгин. Сенинг доимо одат ва расминг уларга қуллуқ қилиш бўлсин, буни иккни дунёда ўзингга саодат билгин...

Сенинг отанг шоҳ Султон Ҳусайннинг акасиdir, у сенга ҳам ака, ҳам ота ўрнидадир. Бу икки отага ўғиллик қилгин, йўқ-йўқ, шу икки шоҳнинг қули бўлгин. Бу икки жаҳон соҳибларига сен фарзанд бўлдинг. Иккисини ҳам ўзингдан хушнуд қилгин, бу дунё ва охиратда сенга фойда бўлади. Уларга қуллик қилишинг, сенинг шоҳлигинг ва жаҳонпаноҳ шаҳаншоҳлигингдир. Бири сендан ризо бўлса, биридан карам, илтифот топасан.

Бир мамлакатнинг ҳукмдори бўлиб, иқбол ва шавкатнинг ногорасини чалгудек бўлсанг, зинҳор зулм ипини узиб, инсоф ва адолат биносини қургин. Мамлакат халқига меҳрибонлик қилиб, қўйларга чўпондек муомалада бўлгин. Ким бўрилик қилса уни қувлаб, ўша ернинг ити билан уни овлагин. Золимларнинг зулмидан халқни асраб, қўйни ҳам бўридан омон сақлагин! Мазлумга золим зулм этгудек бўлса, унинг додини бериб, мазлумнинг хотирини шод қилгин. Мазлум ўз мақсадини арз этолмаса қайта-қайта сўрашни фарз билгин. Уларнинг аҳволини сўрар чоқда сенинг ҳунарнинг лутф бўлсин, шундагина уларнинг изтироби таскин топади. Мулоҳимлик билан унинг ҳолатини англаб, адл билан уни ғамдан қутқар. Амалдорларингни зулм қилишдан тортиб, ўзингни ҳам зулмдан тийгин. Қассобнинг қора молини парвариш билан семиртириши, уни ўлдириш-сўйиш учундир. Парваришдан ҳўқиз

нима баҳра оларди; у ботмонлаб семирса бўлди. Элнинг молини ўзингникideк билиб, элни ўз бола-чақангдек билгин. Яъни, ўз бола-чақанг қандай асралиб, молинг қандай сақланса, элнинг бола-чақасини ҳам шундай асраб, эл молини ҳам ўғридан омон сақлагин. Элнинг моли золимларга кетса, маҳшар куни шоҳ жавобгар бўлади. Агар шаҳарларда бошлиқ бўлсанг, сахрода (қишлоқда) ҳам шунингдек сиёsat юритгин. Токи мусофиirlар, йўловчилар, савдогарлар озор топмасинлар. Қароқчи савдогарни тўғсанда, қўлидаги паншаҳасини ҳам найза ўрнида ишлатиб, уриб ола беради. Шуниси қизиқки, ўғридан қолган нарса билан жонини қутқариб шаҳарга етганда тамғачи* ҳам унинг бошига келиб дўқ билан закот сўрайди. Бундай нарсалардан ўзингни асрагин. Шундай ишларнинг фойдасини кўргач, хурсанд бўласан.

Ҳар қандай ёмонликлар хотирингга келса, тангрини эсингга туширгин. Зулм қилиш мақсадинг бўлиб қолса, шоҳни (Хусайн Бойқарони) кўз олдингга келтир. Мана шунда бутун ишларнинг жойида ва кўнгилдагидек бўлади...

Эй соқний, бир қадаҳ олгин, шаҳзода унга май қуийиб, менга узатсин. Олдин ўзи шимириб, сўнгра менга ҳам ичирсин.

XXXVIII

*Бу дард йигиси тугашининг тарануми
ва бу ҳасратномаси охирининг айтилиши
ва тартиби авзойининг афсонасини
тузмоқ, хато ва камчиликлари рақам-
ларига эзтироф айтиб, бу бобда ҳақдан
авф сўрамоқ*

Шукрлар бўлсинки, бу дард достонининг ҳар сўзида дардининг юзларча нишонаси бордир. Унинг варақлари жон пардалариданdir, ошиқлар бу варақларни жонлари билан безагандирлар. Кўзининг қорачифини сиёҳ қилиб ёзгани қора қайғу можаросидир. Бунда ёзилган ҳар алиф, ошиқларнинг кўксига кесиб ёзилган алиф нишонидир. Бунинг нуқталари яширин тикан нишоналаридан, йўқ, балки у доғ қоралариданdir. Ҳар бир дол ҳарфи ҳам бўлган қадди, дард сўзининг икки ёнидаги долларидан. Бундаги айнларнинг кўриниши, ҳижрондаги ошиқларнинг кўксига урилган наълга ўхшагандир. Бу асар-

* Тамғачи — савдогарлар молидан бож оловчи.

нинг ҳарфма-ҳарф сарлавҳаларининг* қизилда ёзилиши ошиқларнинг қонидандир. Саҳифаларнинг юзида дард жилвалинади, мистар** чизиги ҳажрнинг катта йўлидир. Андуҳ қўшини орасида тўполон-ғавғо кўтарилиб жон мулкини олишга зўр беради. Бундаги ҳар бир сатр уруши қўшинига ўхшаб саф тортгандир. Йўқ, бу сафларнинг бариси меҳнат ва ғам аҳлидир, ғам даشتida мотам туттган кишилардир. Буларнинг ҳаммаси Мажнун ғамидан аза тутиб, Лайли ўлимни учун қора кийгандирлар. Яъни бу фироқнома менинг қаламимдан тўкилган томчилардир.

Бу мотамномани қанчалик чўзган бўлсам, шунча мотамзада бўлдим, ниҳоят, йиғлаб-йиғлаб тугатдим.

Эй тонг шамоли, тўхтамасдан әсгин, тинмоқни мижозингга лойиқ кўрмасдан тоғ, дашт, водийларга ва жаҳоннинг бутун бурчакларига бориб, жаҳондаги ишқ аҳлига, бу қиссанинг тугагани тўғрисида нидо қилгин.

Қаердаки беқарор овора, баҳти қаро кишилар бўлса, уларнинг ҳаммаси менинг олдимда тездан ҳозир бўлсинлар. Менинг бу улуғ мотамли қора шаҳримга кириб кессинлар. Бу ер ишқ мамлакати бўлиб, бунда сарсон, саргашта бўлганлардан бири шарқ қуёшидир. Бунда ишқ аҳли учун мадрасалар қурилгандир, дард аҳли унда мажлислар тузмоқдалар. Кимнингки хаёлида ишқ ичра камолга эришиш орзуси бўлса, бу мадрасага жойлаб, ҳужрасига керакли нарсаларни ҳам тайёрлаб берайин. Бошлаб сабоқларини ёзив, мадрасада бировга шуни вазифа қилиб берайинки, у бу варақларни ўз олдига қўйиб, унга шундан сабоқ берсин. Кимки шунга қобилиятли бўлса, ғам ва балоларнинг дарсини ўқисин. Бу ҳужрадагиларнинг овқати жигарни куйдирадиган ғамлардир, суви ўрнида бўлса, қон қатраларидир. Кундузи ўқиладиган сабоқлар бало ва ишқ йўлида юз мубталолик ҳадисларидан иборатдир. Кечки емоқлари эса чироқ, андуҳ ва бағир доғи тутунларидир.

Кимнингки иши ривожланиб, ишқ аҳли орасида шуҳрат топиб, миясида ишқ жўш уриб, овозидан балонинг хуруши чиқса, вужудини муҳаббат ўти тутиб, унинг тутунларидан қўёш бекилса, оҳининг шамоли куйган вужудининг тупроғини учириб, кўз ёшлари унинг ўтини ўчирса, жисмидан асар қолмай, кўнглини ҳам йўқотган бўлса, ана шундай кишилар учун бу ишқ ерига иморат солиб, элнинг киришини кўзда тутдим.

* Ҳар бобнинг сарлавҳаси қизил сиёҳда ёзилган, шунга ишора қилинаётir.

** Мистар — чизиқсиз ҳоғозга чизиқ тушириш учун қалин ҳоғозга иплар тортиб ясалган чизгич; транспорант.

Замонанинг ягонаси бўлган у Мажнун ва Лайлilar ишқ йўлида ягонадирлар. Улар бу тупроқ дунёсидан чиқиб, жаннат сари кетдилар. Мен улар учун бу ерда қароргоҳ, муҳташам мозор ясадим. Бу мозорнинг саноқсиз айвон ва пештоқлари минора ва гумбазларга ўхшайди. Фалакдек юксак бу гумбаз шу иккисининг қабриди. Қандилига бекитилган шамъга кечаси юқоридан нур ёғилиб туради. Нозикликда у гумбазнинг кабутарлари парига ўхшагандир, йўқ-йўқ, ҳарам кабутарларидир. Бу гумбаздаги кабутарлар учолмайдилар, чунки фаришталар қанотлари билан уриб, уларни учгани қўймайдилар.

Ишқсиз кишилар бу ерга келмайдилар, бу ердаги завқ ва хушнудликлардан маҳрумдирлар. Ишқсизлар бунда кўринмайдилар, бу ернинг зиёратчилари малаклар эмас, ишқ ахлидир. Бу ғам ва дард кўрган кишиларнинг ҳар бири, ишқда ягона бўлганларнинг барчаси буни қабул қилишиб бу парсада яширин йўллар топдилар.

Кимки бу ҳарамнинг маҳрами бўлиб, ундан файзлар олса, кимнингки муроди ва эътиқодининг сармояси ишқ бўлса, ундей кишини бу жаннатга келтириб, бу мартабага сазовор этгин. Доимо унинг аҳволини завқли қилиб, ишқ бобида камолга етказгин. Унинг ишқини ўлмас, абадий этиб, ишқда уни йўқоттин.

Ишқдан ёт бўлган нопоклар ўзига ёлғондан ошиқ номини берсалар, шишадан тўкилган қизил майдек кўзидан қон ёш тўйкан нопокнинг йўли фасод тўфони ичида бўлади. У ёлғон ошиқ илон каби ўралгани билан унинг кўнглида заҳардан бошқа ҳеч нарса йўқдир. Ўзини ясама ошиқ қилиб, мақсад ва муддаоси нафс бўлса, ундей ёлғончи ошиқни асло муродига етказма ва бу жаннат bogигa яқинлаштирганин.

Мен хастаки бу асарни ёзибман ва таҳрири учун қалам тортибман, бу абадий ишқни ҳикоя қилишдан мақсадим афсона эмас эди, афсона деб ёзмадим. Балки бунинг мазмунига руҳ мойил бўлди, лекин афсона бунга бир баҳона, сабаб бўлди. Бу сатрларга тийран мазмун ёзилди, афсона бўлса унга ярашиқ либос бўлиб туши.

Анави гуруҳ* ҳам сўзда шукуҳ, дабдаба билан бу номани ёзиб, саҳифалар юзини безаган эдилар. Гарчи уларнинг сўzlари ва ғавғолари жаҳонни ва кишиларни ўзига қаратган бўлса ҳам, лекин улар ёзган нозик маъноларнинг шавқи форсча бўлиб, унда туркича завқ озроқ эди. Форси тил

* Кизомий Ганжавий ва Хусрав Деҳлавийлар кўзда тутилади.

билин сўзлар назм әтилганидан, фақат форсча биладиганлар-гина баҳра топдилар.

Мен эса қиссаларни турк тилида тузиб, бу афсонани ҳи-коят қилдим. Бу асарнинг шуҳрати жаҳонга тўлиб, турк эли ҳам баҳра топсин дедим. Чунки ҳозир жаҳонда соғ идрокли, хуштабиат турклар кўпайган. Гарчи бу асаримнинг ўгити камроқ бўлса-да, ғам емаслик керак, чунки унинг аслида завқ кам эмасдир.

Инсоннинг тилаги камолга эришмоқдир, яна унга дард-шавқ ҳам мақсад бўлмоғи лозим. Кимки билимдан экан, ун-дай кишининг дарди бўлмаса, ундан нима фойда? Мажнун жаҳон аҳлига ўт солса, Афлотун ҳам шу ўтда куядиганлар-нинг бири бўлади.

Булбул сайраб турганда, кишининг анқо билан нима иши бор? Қулоқ солгувчи ишқ дарди билан тарбияланган бўлса ҳикояда ҳам шундай дард бўлмоғи керакдир. Эшитгувчи дард-га пайванд бўлса, унинг бағри ўтта ўхшаган бўлади.

Ёнаётган чоқда ўтга қарагин, сув уни ўчирса, ёғ ёнди-ради.

Мен ҳам бу майни сузиб, туркича нағмалар тараннум этдим. Бу нағма эл кўнглига мувоғиқ келади, чунки бу нав-ҳанинг мунги кўпроқдир. Мунглиман, мунгдан хабардорман, дардли кишиларнинг сўзи менинг сўзимдир. Шубҳасиз бу асар қачондир бир ўқилса, ўқувчининг хотири бузилади. Мажнун Лайлини ёд этгандаги каби унинг кўзидан селдек ёшлар оқади. Гуноҳ ва хатоларим орасида қолиб бу нома-нинг юзини қора қилдим. У сув етишиб, ёзилган барча гуноҳ можаролари қорасини ювиб кетсин. Ёраб, менинг бу ёзган-ларимни ҳар ким ўқиб англаса, ўқиганларини андиша билан ўйлаб, менинг муддаоларимни тасаввур этса, мақсади айб излаш бўлмаса, шундай кишиларга бутун фанинг эшигини очиб бергин! Оёғига ишқ кишинини боғлаб, оғзига дард ва шавқ шаробини қўйган. Уни жунунин занжирига боғлаб, банд лар билан уни баҳтиёр айлагин. Ишқ ғами билан уни хурсанд қилганингда, мени ҳам унинг хотирига туширгин. Шояд шу вақтда бир оҳ тортиб, менинг гуноҳларим чангини ўчирса, ўша оҳ шамоли менинг заиф танимни учириб, раҳмат уйидан қарор топсин.

Гуноҳларим кечирилсин, омин, тангри тилагимга етказ-син, омин!

МУНДАРИЖА

V боб.	Олдида тавҳар бир қатра сувдек туюладиган сўз гавхари васфида	3
VI боб.	Балийлик осмонининг жаҳонга нур таратувчи юлдузи мадҳида	5
IX боб.	У тун дагдагаси таърифида	7
X боб.	Қайснинг йўқлик мажлисидан қутулиб, вужуд бешигига тутилгани	11
XI боб.	Қайснинг донолик мактабида илмлар варақаларини ўргангани	13
XII боб.	Баҳор фарроши ҳар нафас эслган шабадаларни пулфамоги	18
XIII боб.	Қайснинг айрилиқ тунида шабнам гулоби юзига сочилганидан кўзи очилгани	21
XIV боб.	Қайснинг ҳажр шомиди андуҳ гуруҳи уйидан чиқиб висол қабиласи томон юргани	25
XV боб.	Қайснинг гойиб бўлганидан қабила аҳли жабардор бўлгани	28
XVI боб.	Мажнуннинг бехабар ошиқлигидан Лайленинг отаси хабардор бўлгани	31
XVII боб.	Мажнуннинг фироқ чоҳида тандир ичидаги ўтдек ўртаниши	33
XVIII боб.	Лайленинг хиромон сарви гулшандан уйи сарига юргани	37
XIX боб.	У мушкин оҳу овига бани асад аҳлининг қасди	39
XX боб.	Мажнуннинг отаси уни ишқ биёбонидан келтиргани	42
XXI боб.	Мажнуннинг ваҳшатли элдан улфатлик ипини узгани	45
XXII боб.	Навфал Лайли гавҳарини Мажнун шодаси тизимиға тизиши	49
XXIII боб.	Лайленинг отаси ўз кишиларини Навфал лашкари қошида кучсиз кўргани	52
XXIV боб.	Мажнуннинг Навфалдан айрилгани	55
XXV боб.	Куещаш маси сарнатон буржиди мақон топгани	58
XXVI боб.	Мажнун Лайленинг кеча тўлин ойидек оппоқ саҳифада номасини ўқигани	63
XXVII боб.	Лайли Мажнуннинг кўз қорачиги ва киприги қалами билан ёзган кўнгли шарҳини ўқигани	66
XXVIII боб.	Мажнуннинг отаси дашт атроғини қуюндеқ кезиб ўз девонаниҳодини топмоги	69
XXIX боб.	Навфалнинг Мажнун отасига мезбонлик қилгани	73
XXX боб.	Мажнуннинг отаси кўп насиҳатлар билан Навфал ҳашамига олиб боргани	78
XXXI боб.	Фалак золи найрангининг ўзгариш туриши	82
XXXII боб.	Фироқ тоши кўксаiga урилавериб, Мажнуннинг Наждотгини оромгоҳ қилгани	86
XXXIII боб.	Мажнуннинг ота-онаси унинг муҳлиқ фироқидан ҳаллок бўлгани	89
XXXIV боб.	Мажнуннинг ёр ҳажри ўтидан куйган танига ота-она ҳасрати дое қўйгани	93
XXXV боб.	Лайли ҳаёти баҳорининг гулларини ажал ҳазони соvuқ шамоли қўкка совургани	96
XXXVI боб.	Ишқ таърифида	102
XXXVII боб.	Султон Узайс баҳзదир мадҳида хотима	105
XXXVIII боб.	Бу дард йигиси сугашининг тараннуми	107

На узбекском языке

АЛИШЕР НАВОИ

ЛЕЙЛИ И МЕДЖНУН

Пересказ в прозе

Редактор Н. Норкулов
Рассом Дм. Цирин
Расмаллар редактори И. Кириакиди
Техн. редактор Т. Смирнова
Корректор Ш Собирова

Босмахонага берилди 15/VII-1976 й. Босишга руҳсат
ётилди 15/X-1976 й. Формати 60 × 84¹/₂. Босма л. 7,0.
Шартли босма л. 6,51. Нашр л. 6,65+0,97 вкл. (0,65 +
1,4 вкл.). Тиражи 75000. Фабур Гулом номидаги Ада-
биёт ва санъат нашриёти. Тошкент. Навоий кӯчаси, 30.
Шартнома № 91—76.

Ўзбекистон ССР Министрлар Советининг Нашриётлар,
полиграфия ва китоб савдоси ишлари бўйича давлат
комитетининг Тошкент полиграфикомбинатида тай-
ёрланган матрицадан Морозов номидаги босмаочча-
да литография ва мелованни ўзбек тилидаги босилди. Са-
марқанд. Кузнецкая кӯчаси, 82, 1976 йил. Зак. № 5570.
Баҳоси 5-муқовада 55 т. 4-муқовада 91 т.

Навоий Алишер.

Лейли ва Мажнун. (Насрий баённи тузув-
чилар А. Умарий ва Ҳусайнзода. Тузатиш ва
тўлдиришлар билан нашрга тайёрловчилар
В. Раҳмонов ва Н. Норқулов.) Т., Адабиёт ва
санъат нашриёти, 1976 й.

112 б.

Алишер Навоининг «Лейли ва Мажнун» достони
инсоний изтироблар ва ёниқ севги фожиаси ҳақида
ғўзал қўшиқидир. Асарда Лейли билан Мажнун ма-
шҳадатлари оташин кўйланиб, уша давр ижтимоий
иллатлари фон этилади. Достонда чин муҳаббат, ин-
соний баҳт учун кураш улугланади.

Буюк ўзбек шоирни ўз ижодини кент халқ омма-
сига тушунарли бўлишини оразу қилган эди. Ушбу
насрий баён ҳам шу мақсадга хизмат қиласди.

Навоий Алишер. Лейли и Меджнун.